

MATTHAI **(The Gospel According to** **Matthew)**

Jisuh a tâconae

Luk 3:23-38

¹ Abraham hoi Devit e catoun lah kaawm e, Jisuh Khrih a thonae lairui cauk teh,

² Abraham capa Isak, Isak capa Jakop, Jakop capa Judah hoi a hmaunawnggha naw.

³ Judah ni Tamar hoi a khe e capa Perez hoi Zerah, Perez capa Hezron,

⁴ Hezron capa Aram, Aram capa Amminadab, Amminadab capa Nahshon, Nahshon capa Salmon,

⁵ Salmon capa Boaz, Rahab hoi a khe e. Boaz capa Obed, Ruth hoi a khe e. Obed capa Jesi, Jesi capa Devit siangpahrang.

⁶ Devit capa Solomon, Uriah e a yu hoi a khe roi e,

⁷ Solomon capa Rehoboam, Rehoboam capa Abijah, Abijah capa Asaph,

⁸ Asaph capa Jehoshaphat, Jehoshaphat capa Joram, Joram capa Uzziah,

⁹ Uzziah capa Jotham, Jotham capa Ahaz, Ahaz capa Hezekiah,

¹⁰ Hezekiah capa Manasseh, Manasseh capa Amon, Amon capa Josiah,

¹¹ Josiah capa Jekhoniah hoi a hmaunawng-hanaw, Babilon lah a kampuen tawmlei vah a khe e ca catounnaw doeh.

¹² Babilon kho lah a kampuen aw hnukkhu, Jekhoniah capa Shealtiel, Shealtiel capa Zerubabel,

¹³ Zerubbabel capa Abiud, Abiud capa Eliakim, Eliakim capa Azor,

¹⁴ Azor capa Zadok, Zadok capa Akhim, Akhim capa Eliud,

¹⁵ Eliud capa Eleazar, Eleazar capa Matthan, Matthan capa Jakop,

¹⁶ Jakop capa, Meri e a vâ Joseph, Khrih tie Jisuh teh Meri koehoi a khe.

¹⁷ Abraham koehoi Devit totouh a se hlaipali, Devit koehoi Babilon kho lah a kampuen aw htotouh a se hlaipali, Babilon kho lah a kampuen aw hoi Khrih totouh a se hlaipali touh a pha.

Jisuh khenae

Luk 1:35

¹⁸ Jisuh Khrih a khenae teh, hettelah ao. A manu Meri teh Joseph yu lah pacei lah ao navah tak cungtalah a hmawng roi hoehnahlan,

¹⁹ Kathoung Muitha e camo teh a vawn toe. A vâ Joseph teh tamikalan lah ao dawkvah, Meri kaya sak hane a ngai hoeh dawkvah, arulahoi ma hanlah a kâcai.

²⁰ Hottelah a kâcai navah, a manglah Bawipa e kalvantami, ahni koe a kamnue pouh teh, Devit capa Joseph, na yu Meri paluen hane hah na lungpuen hanh, atu e a vawn e camo teh Kathoung Muitha lahoi doeh a vawn.

²¹ Ahni ni Ca tongpa a khe vaiteh, Jisuh telah na phung han. Bangkongtetpawiteh, a taminaw yon thung hoi a rungngang han dawkvah atipouh.

²² Hete akong teh Bawipa ni profetnaw hno lahoi sutdeilawk akuiep nahane doeh.

²³ Sutdeilawk teh, Khenhaw! tanglakacuem ni vawn vaiteh ca tongpa a khe han. A min teh Emmanuel telah a phung han. Emmanuel tie teh Cathut maimouh koe ao tinae doeh.

²⁴ Joseph a kâhlaw teh, Cathut e kalvantami ni lawk a poe e patetlah a yu teh a paluen.

²⁵ Hatei, camin a khe hoehroukrak tak cung-talah hmawngkhai hoeh. Hote capa hah Jisuh telah a phung.

2

Jisuh a bawk awh

¹ Herod teh siangpahrang lah ao navah, Judah ram Bethlehem kho dawk Jisuh teh a khe. Hatnavah âsikathoumnaw teh Jerusalem vah a pha awh.

² Ahnimouh ni, kanîtholah amae Âsi ka hmu awh dawkvah, ama bawk hanelah ka pâtam awh. Judah siangpahrang ka khe e teh na maw ao telah a pacei awh.

³ Hote lawk hah a thai awh navah, Herod siangpahrang hoi Jerusalem e tami pueng a tâsue awh.

⁴ Vaihma bawi kalennaw hoi cakathutkung-naw pueng a pâkhueng teh, Khrih teh na maw a khe han telah a pacei.

⁵ Hotnaw pueng niyah, Profet buet touh ni sut a thut e teh,

⁶ Oe, Judah ram Bethlehem kho, nang teh Judah ram khopuinaw hlak vah na thoungca hoeh. Bangkongtetpawiteh, ka tami Isarelnaw kaukkung Bawipa teh nathung hoi a tâco han, ahni ni Isarelnaw teh a khoum han, hettelah Cakathoung dawk ao. Hatdawkvah Judah ram, Bethlehem kho dawkvah Khrih teh a khe han atipouh awh.

⁷ Hahoi, Herod ni âsikathoumnaw hah a ru lah a kaw teh, Âsi a kamphawngnae atueng hah kahawicalah a pacei hoiyah cet a nateh camo ca hah kahawicalah tawng awh

⁸ Na hmawt awh pawiteh kai hai ka bawk van nahan, bout na thaisak awh, telah lawk a thui teh Bethlehem lah a patoun.

⁹ Siangpahrang e a lawk hah a ngai awh teh a cei awh navah, kanîtholah a hmu e âsi teh ahnimae hmalah a cei dawkvah camo ca a onae lathueng a pha teh a kâhat.

¹⁰ Hote âsi bout a hmu awh toteh a konawm awh teh puenghoi a lunghawi awh.

¹¹ Im thung a kâen awh navah a manu Meri hoi camo ca teh a hmu awh, a tabo awh teh camo a bawk awh. Amamae hno tabunaw a paawng awh teh sui, frankinsen hoi murah poehnonaw hoi a bawk awh.

¹² Herod siangpahrang koe bout ban hoeh nahanlah a manglah Cathut ni kâhruetcuetae a poe dawkvah, alouke lam lahoi amamouh kho lah a ban awh.

Jisuh Izip ram lah a yawngkhai

¹³ Ahnimanaw a cei awh hnukkhu, Cathut e kalvantami teh Joseph e a mang lah a kamnue

teh, thaw nateh camo hoi a manu hah Izip ram lah yawngkhai leih. Lawk bout ka dei hoehroukrak hote ram dawkwah awh. Herod siangpahrang ni camo hah thei hanlah a tawng han toe atipouh.

¹⁴ Hahoi, Joseph a thaw teh, camo hoi a manu hah a hrawi teh, karum vah Izip ram lah a yawngkhai.

¹⁵ Herod siangpahrang a due ditouh hote ram dawkvah ao awh. Het hateh, Ka Capa hah Izip ram hoi ka kaw toe, telah Cathut ni Profetnaw hno lahoi a dei tangcoung e a kuep nahane doeh.

Herod ni camonaw a thei

¹⁶ Âsikathoumnaw ni na dum awh toe tie Herod ni a panue navah, a lung puenghoi a phuen. Tami lungkaangnaw koe a pacei tangcoung e âsi a kamphawngnae koehoi, Bethlehem hoi a tengpam kho dawkwah e camo tongpa kum hni touh hoi a rahim pueng hah tami a patoun teh a thei sak.

¹⁷ Profet Jeremiah ni a dei e,

¹⁸ Ramah kho thungvah khuika hoi hramki e lawk ka thai. A canaw ao hoeh toun dawkvah Rachel ni a khuika e cing thai hoeh, tie lawk hatnavah a kuep.

Nazareth kho Jisuh khosaknae

¹⁹ Hatei, Herod a due hnukkhu, Izip ram vah Joseph e a mang lah Bawipa e kalvantami teh bout a kamnue pouh teh,

²⁰ Thaw nateh a manu hoi camo hah Isarel ram lah cetkhai leih, camo thei hanlah katawngnaw teh a due awh toe, atipouh.

²¹ Joseph a thaw teh a manu hoi camo hah Isarel ram lah a ceikhai.

²² Hatei, Herod yueng lah a capa Akhelaus ni Judah ram dawk bawi lah ao tie a thai dawkvah, hote ram koe lah cet ngam hoeh. A mang lah Cathut ni kâhruetcuetnae bout a poe e patetlah Galilee ram lah a cei.

²³ Profetnaw ni sut a dei aw h e lawk, Khrih hah Nazareth tami telah a kaw aw h han, tie a kuep nahanelah Nazareth kho daw k a pha aw h teh hawvah ao aw h.

3

Baptisma Jawhan ni lamthung a rasoun

Mrk 1:3-8; Luk 3:2-17

¹ Hatnah e tueng nah, Baptisma kapoekung Jawhan teh, Judah ram kahrawngum vah,

² Kalvan uknaeram teh a hnai toe. Hatdawkvah, pankângai aw h leih telah a pathang.

³ Profet Isaiah ni sut a dei e teh, Kahrawng um vah kahram e lawk ni, Bawipa e lamthung teh pathoup aw h. A lamthung teh lan sak aw h ati navah, hote Jawhan doeh a dei ngai nah.

⁴ Jawhan teh Kalauk muen hoi kawng e a khohna teh, a keng daw k phaiyuen taisawm a kâyeng teh, samtong hoi khoitui hah a canei.

⁵ Jerusalem, Judah ram, Jordan tui teng e tami pueng ni Jawhan teh a pâmam aw h.

⁶ A yonnae pueng a pâpho aw h teh, Jordan tui daw k Jawhan e baptisma teh a coe aw h.

⁷ Farasinaw hoi Sadusinaw, baptisma coe hanelah a tho aw h e hah Jawhan ni a hmu navah, Oe, Tahrn hrnthoe catounnaw, ka tho hane

lungkhueknae dawk hoi na hlout aw h nahanelah apinimaw kâhruetcuetae na poe a vaw.

⁸ Pankângainae hoi kamcu e tawksaknae hah sak aw h.

⁹ Abraham teh kaimae na pa doeh telah pouk aw h hanh. Na dei pouh aw h, Cathut ni hete talungnaw hah, Abraham e a canaw lah a coung sak thai.

¹⁰ Thingkung koevah Cakâ sut ta lah ao toung dawkvah, a paw kahawi ka paw hoeh e akung pueng teh, tâtueng vaiteh, hmai daw k phum lah ao han.

¹¹ Kai ni teh pankângainae baptisma tui daw k na poe aw h. Ka hnuklah ka tho e teh kai hlak hno a sak thai. Ahnie khokkhawmrui patenghai rasu pouh hanelah kai ka kamcu hoeh. Ahni ni teh Kathoung Muitha hoi hmai hoi baptisma na poe aw h han.

Jisuh Baptisma coenae

Mrk 1:9-11; Luk 3:21,22; Jhn 1:31-34

¹² A kut daw k para a sin teh kacailah pheng a hut. Cakang ka tak e teh capai daw k a cui. Hatei, cahiknaw teh karoum thai hoeh e hmai hoi sawi lah ao han atipouh.

¹³ Hatnavah, Jisuh teh Galilee ram lahoi Jordan palang vah Jawhan koe baptisma coe hanelah a tho.

¹⁴ Jawhan ni, kai nouh nang koe baptisma ka coe hane ei, nang ni kai koe lat na tho atipouh teh a cakâ.

¹⁵ Jisuh ni, Cathut ni taw k sak hanlah na ngaikhai e pueng teh taw k hanelah ao daw kvah,

atu baptisma na poe leih atipouh. Hahoi torei teh, Jawhan ni a tarawi pouh.

¹⁶ Jisuh baptisma a coe hnukkhu tui dawk hoi a thaw navah, kalvannaw a kamawng teh, Cathut e Muitha teh Âbakhu patetlah a kum e hah a hmu teh a tak dawk a cu pouh.

¹⁷ Kalvan hoi e lawk ni, ahni teh ka pahren poung e hoi ka lungkuiep e Capa doeh, telah a dei.

4

Jisuh Tacueknae

Mrk 1:12-13; Luk 4:1-13

¹ Hahoi, Jisuh teh kahraimathout koe tacuek sak hanelah, Kathoung Muitha ni kahrawngum vah a hrawi.

² A hnin 40 rum 40 touh rawca a hai toung dawkvah kamlum hanelah ao toe.

³ Katacuekkung ni rek a hnai teh, hettelah ati, nang teh Cathut Capa katang lah na awm pawiteh, hete talungnaw hah vaiyei lah a coung nahan kâ poe haw, ati pouh.

⁴ Hatei Jisuh ni, tami teh vaiyei hoi dueng hring mahoe, Cathut e lawk poe e puenghoi yah a hring han telah Cakathoung dawk thut lah ao atipouh.

⁵ Hahoi Kahraimathout ni Jisuh hah khopui kathoung thungvah a hrawi teh, bawkim som dawka ta.

⁶ Nang teh Cathut Capa katang lah na awm pawiteh, talai lah tâtawt haw. Bangkongtet-pawiteh, kalvantaminaw hah nang han lah lawk ka thui toe. Talung dawka, na khok na hmang

hoeh nahanelah, ahnimouh ni a kut hoi na tawmdawm awh han telah Cakathoung dawк thut lah ao atipouh.

⁷ Jisuh ni, na Cathut hah na tanouk mahoe h telah thut lah bout ao, ati pouh.

⁸ Hahoi teh Kahraimathout ni Jisuh hah mon ka rasang poung koe bout a ceikhai teh, talaivan uknaeram puenghoi talai bawilennaе pueng hah a patue.

⁹ Na khokcuengkhuem laihoi kai na bawк pawiteh, hete hnopai pueng hah na poe han atipouh.

¹⁰ Jisuh ni, Setan cet. Na Cathut dueng hah na bawк vaiteh, A thaw dueng hah na tawк han tie Cakathoung dawк thut lah ao atipouh.

¹¹ Hat toteh, Kahraimathout ni a kangheng takhai. Hahoi kalvantaminaw a tho awh teh, a khetyawt awh.

Jisuh kamthang lawк dei kamtawngnae

¹² Jawhan thongim a pabo awh, tie Jisuh ni a thai toteh Galilee ram lah a cei.

¹³ Nazareth kho a ceitakhai teh Zebulun hoi Naphtali ramri tuipui teng kaawm e Kapernuam kho a pha teh hawvah ao.

¹⁴ Hot hateh Profet Isaiah ni sut a dei tang-coung e lawк a kuep nahane doeh.

¹⁵ Sut a dei e lawк teh: Zebulun hoi Naphtali ram tuipui teng ceinae lamthung, Jordan palang ran Jentelnaw e Galilee ram,

¹⁶ hmonae thung kaawm e tami pueng ni, angnae kalenpoung teh a hmu awh. Duenae tâhlip thung kaawm e pueng koevah, angnae teh a pha.

¹⁷ Hatnae tueng hoi teh, Jisuh ni, pankângai a leih. Kalvan uknaeram teh a hnai toe telah kamthang lawk dei e a kamtawng toe.

A hnukkâbangnaw apasuek kawnae

Mrk 1:16-20; Luk 5:2-11; Jhn 1:35-42

¹⁸ Jisuh ni Galilee tui teng a cei navah, a hmaunawngaha roi, Piter tie Simon hoi a nawngaha Andru, ahnimouh roi teh tangakamankungnaw lah ao roi teh, talî dawk tanga a heng roi lahun e hah a hmu.

¹⁹ Ahnimouh roi koevah, ka hnukkâbang roi haw atipouh. Tami kamankung lah na sak roi han atipouh.

²⁰ Ahnimouh roi ni tamlawk a ceitakhai roi teh, a hnuk tang a kâbang roi.

²¹ Hahoi, bout a cei teh, alouke hmaunawngaha roi, Zebedee e capa Jem hoi Jawhan teh, a na pa hoi long thung vah tamlawk a cip roi e hah a hmu teh a kaw.

²² Ahnimouh roi nihaiyah, vai touh lahoi, a na pa hoi long hah a ceitakhai roi teh, a hnuk a kâbang roi.

Patawnae a dam sak

²³ Jisuh teh Galilee ram pueng dawk a cei teh, amamae kamkhuengnae sinakok dawkvah, a cangkhai, uknaeram kamthang kahawi a pâpho. Patawnae puenghoi patawnae ahri pueng a roum sak.

²⁴ A kamthang teh Siria ram pueng dawk a kamthang dawkvah, athung kahrai kâen e naw, kapathunaw, kamkhuennaw, puenghoi yah a cawngca e patawnae, damhoehnae kaawm e

pueng hah, a thokhai aw hah, ahnima e pataw-nae pueng hah, a roum sak pouh.

²⁵ Galilee ram e, Dikapolis ram e, Jerusalem e, Judah ram e, Jordan palang teng e tamihupui ni a hnuk vah a kâbang aw hah.

5

Monsom Cangkhainae Yawhawinaenaw

¹ Hote tamihupui hah a hmu navah Bawipa teh mon lah a luen. A tahung navah, a hnukkâbangnaw ni rek a hnai aw hah.

² Hahoi, a kâko a ang teh a hnukkâbangnaw a cangkhai.

A yawkahawinaw

³ Muitha koe lah ka mathoe e taminaw teh, a yawhawi aw hah, bangkongtetpawiteh, kalvan uknaeram teh ahnima e doeh.

⁴ Ka khuikap e taminaw teh, a yawhawi aw hah, bangkongtetpawiteh, lungpahawi e lah ao aw hah han.

⁵ A lung ka do, a lung ka nem e taminaw teh, a yawhawi aw hah, bangkongtetpawiteh, Cathut ni a kam pouh e ram a coe aw hah han.

⁶ Lannae hah a von lah ka hlam e taminaw teh, a yawhawi aw hah. Bangkongtetpawiteh, Cathut ni a lungngai aku ep sak han.

⁷ Tami kapahrennaw teh, a yawhawi aw hah, bangkongtetpawiteh, pahren lah ao van han.

⁸ A lung kathounge taminaw teh a yawhawi, bangkongtetpawiteh, Cathut a hmu aw hah han.

⁹ Roumnae ka sak e taminaw teh a yawhawi aw h, bangkongtetpawiteh, Cathut e canaw telah kaw lah ao aw h han.

¹⁰ Lanna e kecu daw k rektap lah kaaw m e taminaw teh a yawhawi aw h, bangkongtetpawiteh, kalvan uknaeram teh ahnima e lah ao.

¹¹ Kai kecu daw k tami pueng ni yon na pen aw h teh na rektap aw h navah, a yawkahawi e lah na o aw h.

¹² Na konaw m aw h. Puenghoi na lunghawi aw h. Bangkongtetpawiteh, kalvan vah nangma e taw kphu kalenpoung ao. Hettelah doeh nangmouh hoehnahlan profetnaw hai a pacekpahlek aw h.

Talai e palawi lah na o aw h

¹³ Nangmouh teh talai e palawi lah na o aw h. Palawi tie teh, a paanna e kahmat pawiteh, a paanna e hah bangtelah hoi maw bout hmu thai han toung. Tâkhawng hoi coungroe hane hloilah, banghai cungkeina e aw m hoeh toe.

Talai angna e lah na o aw h

¹⁴ Nangmouh teh talaivan e angna e lah na o aw h. Monsom kaaw m e khopui teh bang ni hai ngue thai hoeh.

¹⁵ Hmai paang e hah apinihai tangthung hoi ramuk boihoeh. Im thung angna e a poe thai nahanelah, hmaiimkhok daw k doeh ouk pâhung aw h.

¹⁶ Hot patetvanlah, nangma e angna e teh tami mithmu vah ang naseh. Ahnimouh ni nange hnokahawi na sak e hmaw t aw h vaiteh kalvan kaaw m e nangma e na Pa teh a pholen aw h han.

Kâlawk ka kuep sak e Jisuh

¹⁷ Kâlawk hoi Profet lawknaw raphoe hanelah kai teh ka tho telah pouk awh hanh. Raphoe hanelah ka tho hoeh, kuep sak hanelah doeh ka tho.

¹⁸ Atangcalah na dei pouh awh. Kalvan hoi tai a rawk hoehroukrak, kâlawk dawk e dekhrei e hoi calung buet touh boehai kuep laipalah awm mahoeh.

¹⁹ Hatdawkvah, apipatet ni hai hete kâpoelawknaw dawk kathoengcae buet touh boehai a tapoe teh, hot patetvanlah, ayânaw hai cangkhai pawiteh, kalvan uknaeram thungvah kathoengcae lah ao han. Hatei, apipatet ni hai kâpoelawknaw hah a tarawi teh, hot patetvanlah, ayânaw hai cangkhai pawiteh, kalvan uknaeram thungvah ahni teh kalen lah ao han.

²⁰ Nangmouh koe na dei pouh awh. Nangmae lannae teh Farasinaw hoi cakathutkungnaw e lannae hah tapuet hoehpawiteh, kalvan uknaeram thung na kâen a mahoeh.

²¹ Tami thet hanh. Apihai tami ka thet e teh, lawkcengnae a khang hanlah a kamcu tie kâlawk karuem teh na thai awh toe.

²² Kaie kâlawk teh, apipatet hai a hmaunawngaha koe a lung ka khuek e teh, sanhedrin lawkcengnae taki ka tho a khang han. Apipatethai a hmaunawngaha kaisue sin e teh lawk tâtuengnae koevah a pha han. Apipatethai a hmaunawngaha thoe ka bo e teh, Hell hmai dawkvah hmaikaknae a khang hanlah a kamcu.

²³ Hatdawkvah, bawk nahanelah hnopai na

sin navah, na hmaunawnggha ni na toun tie na panuek pawiteh, thuengnae khoungroe hmalah, na hnopai hah tat nateh,

²⁴ na hmaunawnggha hoi hmaloe kâmaihawi ei, hahoi torei na hnopai hah thuengnae bout sak.

²⁵ Na ka toe e hoi lam reirei na cei roi lahun nah, hnâbonae hah karanglah sak leih. Hoehpawiteh, na ka toe e ni lawkcengkung koe na thak vaiteh, lawkcengkung ni karingkungnaw koe na poe vaiteh, nang teh thongim thung paung lah na o han toe.

²⁶ Atangcalah na dei pouh: na laiba na patho hoehroukrak thongim hoi na tâcawt thai ma-hoeh.

Uicuk hanh

²⁷ Na uicuk mahoe hoi tie kâlawk karuem teh na thai awh toe.

²⁸ Kaie kâlawk teh, uicuk ngainae lungthin hoi ayâ yu ka khen e tami teh, a lungthung vah hote napui counkacoelah a yonkhai toe.

²⁹ Hatdawkvah, aranglae na mit ni na yon sak pawiteh, hote na mit hah cawngkhawi lawih. Na takbuem lahoi hell daw k na bo hlahk teh, na tak daw k e puengcang buet touh a rawk e heh bet ahawihnawn.

³⁰ Hot patetvanlah, aranglae na kut ni nakung-hai na yon sak pawiteh, hote na kut hah tâtueng lawih. Na takbuem lah hell daw k na cei hlahk teh, na tak daw k e puengcang buet touh a rawk e heh bet ahawihnawn.

Yuvâ kâkapeknae

³¹ Apihai a yu mat ngai pawiteh, yu manae ca poe seh tie kâlawk karuem teh ao toe.

32 Kaie kâlawk teh: Apihaiyah uicuknae laipalah, a yu ka mat e teh, a yu hah a yon sak. Hot dueng laipalah, ma lah kaawm e napui hah ka lat e tami hai bout a yon sak.

Thoebonae

33 Laithoe hoi thoebo hanh. Cathut koe thoe na kâbo e teh cak seh, tie kâlawk karuem teh na thai awh toe.

34 Kaie kâlawk teh, thoebonae khoeroe sak awh hanh. Kalvan noe lahoi thoebo awh hanh, hotteh Cathut e bawitungkhung doeh.

35 Talai noe lahoi thoebo awh hanh. Talai teh Cathut khok tOUNGNAE doeh. Jerusalem noe lahoi thoebo awh hanh. Jerusalem teh Siangpahrang e khopui doeh.

36 Na lû noe lahoi thoebo hanh. Na samrui buet touh boehai na pangaw sak thai hoeh. Na tamang sak thai hoeh.

37 Na lawk hah ue pawiteh ue, nahoe pawiteh nahoe tie lah awm nah nei. Hethloi e lawk teh kahawihoehe doeh a tâcokhai.

Pathung hanh

38 Mit yueng lah mit, hâ yueng lah hâ tie kâlawk karuem teh na thai awh toe.

39 Kaie kâlawk teh: na ka rek e hah cakâ awh hanh. Na hmaibei tambei awh pawiteh, avanglae rek patueng pouh awh.

40 Na angki na lawm awh pawiteh, na kâkhu e hah rek poe sin awh.

41 Na ka ukkungnaw ni meng touh na cet sak awh pawiteh, meng hni touh cet pouh awh.

42 Ka hete hah poe awh. Cawi han ka ngai e tami hah pâban hanh.

Na taran lungpataw

⁴³ Nama hoi kâkuen e tami hah nama patetlah lungpataw nateh, na taran hah hmuhma, tie kâlawk karuem teh na thai awh toe.

⁴⁴ Kaie kâlawk teh kalvan kho kaawm e nangmae Na pa e capa lah na o thai nahanlah na tarannaw hah lungpataw awh. Thoe na ka bo e naw hah lungpataw awh. Nangmouh na ka maithoe e hah hawinae sak pouh awh. Nangmouh ka tarawk ni teh na ka rektap e naw hanelah Cathut koe ratoum pouh awh.

⁴⁵ Bangkongtetpawiteh kalvan kho kaawm nangmae na Pa ni tamikahawi hoi tamikahawihoe e lathueng vah kanî a tâco sak. Tamikahawi hoi tamikahawihoe lathueng vah kho a rak sak.

⁴⁶ Nangmouh lungpataw naw koe dueng na lungpataw awh pawiteh bangmaw tawkpheu kaawm. Tamuk kacawngnaw ni patenghai yah hettelah ngoun teh a sak awh nahoehmaw.

⁴⁷ Kawibang koe dueng khetyawtnae na sak pawiteh bangmaw bet na tapuetae kaawm vaw. Kayuemoehnew ni patenghai yah hettelah ngoun teh a sak a nahoehmaw.

⁴⁸ Hatdawkvah nangmae kalvanlae Na pa teh a kuep e patetlah nangmouh haiyah kuep van awh atipouh.

6

Karoedengnaw poe awh

¹ Hnokahawi na sak e taminaw hmalah na tawk na sak awh hoe nahanlah kâhruetcueta awh. Telah hoehpawiteh Kalvan kho kaawm

nangmae na Pa koehoi tawkpheu na coe awh mahoe.

² Hatdawkvah hno na poe awh navah ka kâsaknaw ni a sak awh e patetlah sak awh hanh. Ahnimanaw teh taminaw e barinae a ngai awh dawkvah tamikâluinae koe, lamsalunnaw koe, mongka ueng laihoi sinakok koe a sak awh e patetlah sak awh hanh. Atangcalah na dei pouh awh. Ahnimouh teh amamae tawkpheu hah a hmu awh toe.

³ Hno na poe awh navah na poe tie a kamnue thai hoeh nahanelah aranglae na kut ni a sak e hah avoilah e na kut panuek sak hanh.

⁴ Arulahoï na sak e kahmawtkung na pa ni tawkpheu hah kamcengcalah na poe han.

Ratoumnae
Luk 11:2-4

⁵ Na ratoum awh navah ka kâsaknaw patetlah ratoum awh hanh. Ahnimouh teh tami pueng ni na hmu kong titeh sinakok koe a kangdue awh teh ratoum e hah a lungpataw awh. Atangcalah na dei pouh awh. Ahnimouh teh amamae tawkpheu hah a hmu awh toe.

⁶ Na ratoum awh navah na imthungkhu kâen awh nateh takhang na khan awh hnukkhu mithmuhoehnae koe kaawm e na pa koe ratoum awh. Mithmu hoeh e kahmawt e na pa ni tawkpheu hah kamcengcalah na poe awh han.

⁷ Na ratoum awh navah Jentelnaw patetlah cungkeihoehe lawk hoi boutbout pâbo awh hanh. Ahnimouh ni teh lawk moikapap dei e lahoi mae lungngai akuep han telah a pouk awh.

⁸ Hotnaw patetlah sak aw h hanh. Bangkongtet-pawiteh nangmouh ni na ngai aw h e hno pueng teh na hei aw h hoehnahlan vah nangmae na Pa ni a panue toe.

⁹ Hatdawkvah na ratoum aw h hane teh: Kalvan kho kaawm maimae na Pa, na min barinae aw m lawiseh.

¹⁰ Na uknaeram phat lawiseh. Na lungngainae kalvan vah akuep e patetlah talai van hai kuep lawiseh.

¹¹ Von kaw k khuem rawca sahnin kaimouh na poe aw h haw.

¹² Ayâ ni ka tak daw k a yon e ka ngaithoum e patetlah kaimae yonnae hai na ngaithoum haw.

¹³ Yon tacueknae daw k ka baw k payon hoeh nahanlah a thoena koe hoi na rungngang haw. Uknaeram, bahu, hoi bawilenna e pueng teh a yungyoe nange doeh. Amen. telah ratoum aw h.

¹⁴ Nangmouh koe yonnae ka sak e naw hah na ngaithoum aw h pawiteh nangmae kalvanlae na Pa ni nangmae yonnae hai na ngaithoum van han.

¹⁵ Hatei, nangmouh koe yon kasaknaw e yonnae hah na ngaithoum aw h hoehpawiteh nangmae na Pa ni nangmae yon hai ngaithoum van mahoeh.

Rawcahainae

¹⁶ Nangmouh teh rawca na hai aw h navah ka kâsaknaw e patetlah na minhmai daw k kamnuek sak aw h hanh. Ahnimouh teh rawca a hai aw h, tie hah taminaw hmalah a minhmai daw k a kamnue sak aw h. Atangcalah na dei pouh aw h. Ahnimouh teh amamae taw kphu hah a hmu aw h toe.

17 Hatei, nangmouh teh rawca na hai aw h navah taminaw e hmalah kamnuek sak aw h hanh.

18 Mithmuhoehnae koe kaawm e na Pa hmalah dueng kamnuek sak aw h. Na lû satui kâhluk nateh na sam hak so aw h. Na minhmai hak pâhla aw h. Mithmu hoeh e ka hmawt e nangmae na Pa ni tawkphu hah kamcengcalah na poe aw h han.

Kalvan vah râw pâkhueng aw h

Luk 11:34-36

19 Sumei hoi khakbara ni a ca thainae koe, tamru ni a paru thainae koe talai van vah na hno pâkhueng aw h hanh.

20 Sumei hoi khakbara ni a cathaihoehnae koe, tamru ni a paruhoe hnae koe kalvan kho vah na hno hah pâkhueng aw h.

21 Bangkongtetpawiteh na hno aonae koevah na lungthin hai ao van.

Tak e angnae teh mit

22 Mit teh tak e hmaiim lah ao. Na mit hawi pawiteh na tak abuemlah a ang han.

23 Hatei, na mit hawihoeh pawiteh na tak abuemlah a hmo han. Na tak daw k kaawm e na angnae hah hmot pawiteh hote hmonae teh banghloimaw a hmo han.

Cathut hoi Tangka

24 Apihai bawi kahni touh e san lah aw m thai hoeh. Bawi buet touh hah pahnawt vaiteh buet touh hah a lungpataw han. Hoehpawiteh buet touh hah banglahai na pouk hoeh vaiteh, buet touh hah na kâuep han. Cathut hoi tangka san lah vai touh lahoi mek na tawk thai mahoe h.

*Na lungpuen hanh**Luk 12:22-31*

²⁵ Hatdawkvah bangne ka canei han tihoi na hring na hanlah na lungpuen awh hanh. Bangne ka khohna han tihoi na tak hanlah na lungpuen awh hanh. Rawca hlak hringnae heh apfu bet ao nahoehmaw. Khohna hlak na tak apfu bet ao nahoehmaw.

²⁶ Kahlun kamleng e tavanaw hah kenhaw. Hote tavanaw ni cati hai patûe awh hoeh, cang hai a awh hoeh, capai daw k pâkhueng awh hoeh. Hatei, nangmae kalvanlae na Pa ni hotnaw hah a kaw k. Hote tavanaw hlak nangmouh teh apfu moi na awm awh hoeh maw.

²⁷ Apimaw a lungpuennaeh lahoi amae hringnae hah bet ka saw sak thai han.

²⁸ Bangkongmaw khohna hane daw k na lungpuen awh. Kahrawng e lilikungnaw hah bangtelamaw a roun g ati e hah kenhaw. Thaw hai taw k awh hoeh. Pahla hai sawn awh hoeh.

²⁹ Solomon siangpahrang e khohna e ni hote akung e khohna boehai phat hoeh.

³⁰ Yuemnae kayounnaw, sahnin kahring ni teh tangtho hmai daw k phum e phonaw patenghai hottelah Cathut ni pathoup pawiteh nangmouh natawng teh hot hlak na pathoup awh mahoe h na maw.

³¹ Hatdawkvah bangne ka canei han, bangne ka khohna han ti hoi na lungpuen awh hanh.

³² Jentelnaw ni doeh het patet e hnonaw daw k a lungpuen awh. Nangmouh ni na panki awh e hah nangmae kalvanlae na Pa ni koun g a panue.

³³ Hatei, Cathut uknaeram hoi a lannaeh hah hmaloe tawng awh. Hathnukkhu hote hnonaw

teh na poe sin awh han.

³⁴ Hatdawkvah tangtho hanelah lungpuen awh hanh. Tangtho e hnin ni nang han lah a lungpuen han doeh. Sahnin kaawm e hno kahawihoehe hah sahnin hanelah a khout.

7

Ayânaw lawkceng awh hanh.

Luk 6:41-42

¹ Nangmouh teh lawkceng lah na o awh hoeh nahanlah, ayânaw hah lawkceng awh hanh.

² Ayânaw lawk na ceng e patetlah nama hai lawkceng lah na o van han.

³ Na mit dawk e thingtaboung teh na pouk laipalah, hmaunawnggha mit dawk e songnawng teh bangkongmaw khuet na hmu vaw.

⁴ Na mit dawk thingtaboung ao nahlangva vah na hmaunawnggha koe na mit dawk e songnawng ca hah na lat pouh vai khuet na ti a vaw.

⁵ Ka kâsak e naw : na mit dawk e thingtaboung hah hmaloe takhoe awh ei. Hat boipawiteh nouh na hmaunawnggha mit dawk e songnawngca hah kacaicalah na hmawt vaiteh na lat thai ti.

⁶ Kathounge hno hah Uinaw poe awh hanh. Pale hah voknaw hmalah tâkhawng awh hanh. A khok hoi coungroe awh vaiteh, nama koe lah kamlang awh vaiteh na kei awh han.

Het, tawng, takhawng

Luk 6:41-42

⁷ Het awh. Poe lah na o awh han. Tawng awh, na hmu awh han. Takhawng awh, takhang teh nangmouh hanlah paawng lah ao han.

⁸ Apihai ka hete ni teh a hmu. Ka tawng e ni teh a pâphawng. Ka takhawng e teh paawng pouh lah ao.

⁹ Nangmouh thung dawkvah, na ca ni vaiyei a hei nah talung ka poe hane tami na o a maw.

¹⁰ Hoehpawiteh, tanga a hei nah tahrin ka poe hane tami na o a maw.

¹¹ Nangmouh ni patenghai canaw hanelah, hno kahawi poe hanelah na panuek awh pawiteh, kalvan kho kaawm e nangmae na Pa ni natawng teh, ka hetnaw hah banghloimaw kahawi e poehnonaw hah a poe han!

¹² Hatdawkvah, nama koe ayânaw ni hnokahawi sak sak han na ngai e patetlah, ayânaw koehai sak van. Hethateh, kâlawk pueng hoi profetnaw e lawk doeh.

Kabueng e longkha hoi ka kaw e longkha

¹³ Kabueng e longkha daw kâen awh. Rawknae koe ka phatkhai e longkha hoi lam teh a kaw dawkvah, ka dawn e tami apap.

¹⁴ Hringnae koe ka phatkhai e longkha hoi lam teh a bueng dawkvah kâen e tami teh a youn ca.

Thingkung hoi a paw

¹⁵ Profetkaphawknaw hah kâhruetcuat awh. Nangmouh koe a tho awh navah, tupho a kâkhu awh teh tu patetlah a kâsak awh. Athung teh Asui ka matheng lah ao awh.

¹⁶ Hotnaw teh amamae a paw lahoi na nout a thai. Pâkhing tangdun daw hoi misurpaw paw boihoeh. Pâkhingkung daw hoi thaibunglung paw paw boihoeh.

¹⁷ Hot patetvanlah, thingkung kahawi ni a paw kahawi a paw teh, thingkung kahawihoehe ni a paw kahawihoehe a paw van.

¹⁸ Thingkung kahawi ni a paw kathout paw boi hoeh, hahoi, thingkung kathout ni a paw kahawi paw boihoeh.

¹⁹ A paw kahawi ka paw hoeh e thingkungnaw pueng tâtueng vaiteh hmai dawk phum lah ao han.

²⁰ Hot patetvanlah profetkaphawknaw teh amamae paw lahoi nout thai e lâh ao.

²¹ Bawipa, Bawipa ka tet e pueng ni kalvan uknaeram thung a kâen aw h han tinae nahoeh. Hatei, kalvan kho kaawm e a Pa lungngai ka sak e dueng ni doeh a kâen han.

²² Tami moikapap ni hot hnin toteh, Bawipa, Bawipa, na min lahoi Cathut lawk ka dei a nahoehmaw. Na min lahoi kahraituilinaw hai ka pâlei a nahoehmaw. Na min lahoi kângairu hnonaw hai ka sak a nahoehmaw. , telah ati aw h han.

²³ Hat toteh, kai ni nangmanaw khoeroe na panuek aw h hoeh. Cet aw h. Hnokahawi ka sak hoeh e naw, telah kancengcalah ka ti pouh aw h han.

Im kasakkung

Luk 6:47-49

²⁴ Hatdawkvah, apipatet hai ka dei e lawknaw hah a thai teh ka tarawi e tami teh, lungsong daw k im ka sak e tami a lungkaang e hoi a kâvan.

²⁵ Kho a nan, tui a len, kahlî a tho teh hote im hah a hmang. Hat nakunghai rawm hoeh.

Bangkongtetpawiteh, lungsong dawk adu a ung dawkvah.

²⁶ Hatei, apipatet hai ka dei e lawknaw hah a thai teh ka tarawi hoeh e teh, sadi dawk im ka sak e tami ka pathu e hoi a kâvan.

²⁷ Kho a nan, tui a len, kahlî a tho teh hote im a hmang toteh kayawicalah a rawp teh peng kâraphoe teh a rawk.

²⁸ Jisuh ni hete lawknaw pueng kOUNG a dei hnukkhu vah, tamimaya teh a cangkhai e dawK a kângairu awh.

²⁹ Bangkongtetpawiteh, cakathutkungnaw patetlah cangkhai laipalah, kâkataawnnaw patetlah a cangkhai.

8

Hrikbei e a dam sak *Mrk 1:40-44; Luk 5:12-14*

¹ Jisuh mon lahoi a kumcathuk navah tami moikapap ni a hnuk a kâbang awh.

² Hatnavah ka hrikbei e tami buet touh ni a tabo teh, Bawipa na ngainae awm pawiteh na thoung sak thai, atipouh.

³ Jisuh ni, ka ngainae ao, thoungnae koe phat lawih, atipouh teh, a kut a dâw teh a tek. Dawngdengca dawK a hrikbei a kahma teh thoungnae koe a pha.

⁴ Jisuh ni, hete kong heh api koehai na dei pouh hoeh nahanlah kâhruetcuét. Vaihmanaw koe cet nateh, na tak hah patue. Ayânaw koe lawkpanuesaknae lah ao nahan, Mosi ni kâ poe e patetlah thuengnae hah sak, atipouh.

*Ransabawi e a yuemnae**Luk 7:1-10*

⁵ Hathnukkhu, Kapernuam kho lah a cei navah, ransabawi buet touh a tho teh,

⁶ Bawipa, kaie ka san buet touh teh a kutkhok roup a kamkhuen, puenghoi patawnae a khang teh im vah sut a yan telah a kâhei.

⁷ Jisuh ni, ka tho vaiteh ka dam sak han, atipouh.

⁸ Hahoi ransabawi ni, Bawipa im dawk na tho hane heh kamcu hoeh. Lawk kam touh ma na dei pawiteh kaie ka san teh a dam han doeh.

⁹ Bangnuenae lah, kai teh kâtawwnae rahim vah san lah ka o eiteh, ransanaw hah ka uk. Buet touh cet ka tet pouh pawiteh a cei, buet touh hi tho ka tet pouh pawiteh, a tho. Ka san haiyah hete tawk ka tet pouh pawiteh, a tawk telah ransabawi ni atipouh.

¹⁰ Hote lawk hah Jisuh ni a thai navah a kângai lah a ru teh, atangcalah ka dei e teh, hettelah totouh e yuemnae hah Isarel miphunnaw dawк patenghai ka hmawt boihoeh rah.

¹¹ Bout ka dei e teh, tami kapap ni, kanîtho, kanîloumlah hoi tho vaiteh kalvan uknaeram thungvah Abraham, Isak, Jakop tinaw hoiyah cungtalah a tahung aw h han.

¹² Uknaeram thung e naw teh hâ kata hoi khuikanae, alawilah, hmonae koe pâlei lah kaawm han telah a hnukkâbangnaw koe a dei pouh.

¹³ Hathnukkhu ransabawi hah, cet leih. Na yuemnae patetlah nang koe awmseh, atipouh.

Hatnah tahma vah a san e patawnae pueng a kahma teh damnae a hmu.

Tami moikapap patawnae a dam sak

Mrk 1:29-34; Luk 4:38-41

¹⁴ Hathnukkhu vah, Piter im Jisuh a tho teh, Piter e a masei napui a pataw teh sut a yan e hah a hmu.

¹⁵ Hote napui e a kut hah a tek pouh navah, a patawnae a kahma pouh dawkvah, a thaw teh, Bawipa hah kahawicalah a khetyawt.

¹⁶ Tangmin vah, kahraikathout ni a man e taminaw hah a thokhai aw h teh, a lawk hoiyah hote kahraituulinaw hah a pâlei pouh. Ka pataw e pueng hah a dam sak.

¹⁷ Het hateh, profet Isaiaah ni a dei e, ahni ni maimae patawnae pueng a phu toe, tie lawk a kuep nahane doeh.

Jisuh hnukkâbang e

Luk 9:57-60

¹⁸ Tami moikapap ni Jisuh a kaven aw h e a hmu aw h navah, namran lah cei hanelah kâ a poe.

¹⁹ Hatnavah kâlawk ka cangkhai saya buet touh ni a teng vah a tho teh, Bawipa, na ceinae hmuen koe kâbang van han atipouh.

²⁰ Jisuh ni Asuinaw ni khu a tawn. Kahlun kamleng e tavanaw ni kâhat nahane tabu a tawn aw h. Tami Capa teh a lû toung nahane boehai aw m hoeh atipouh.

²¹ A louk e a hnukkâbang buet touh nihai, Bawipa, ka cei vaiteh, apa e ro hah hmaloe ka pakawm ei nei, atipouh.

²² Jisuh ni, ka hnuk kâbang haw. Kadoutnaw ni amamae tami kadoutnaw hah pakawm a ngoun seh, atipouh.

Tuicapa a roum sak

Mrk 4:36-41; Luk 8:22-25

²³ Hatnavah, long thung a kâen teh a hnukkâbangnaw ni a kâbang aw. Talî daw k tuicapa thouk a thaw dawkvah long hah muen a khu.

²⁴ Hatnavah Jisuh teh a i.

²⁵ A hnukkâbangnaw ni, Jisuh hah a pâhlaw aw. Bawipa maimouh pueng teh due aw han toe hei, na rungngang aw leih atipouh aw.

²⁶ Jisuh ni, yuemnae a thakayounnaw, bangkongmaw na taki aw, telah atipouh hnukkhu, a kangdue teh, kahlî hoi tuipei hah a yue teh a roum sak.

²⁷ Ahnimanaw ni, bangpatetlah e tami ma aw, kahlî hoi tuicapa ni hai a lawk a ngai pouh bo aw titeh a kângai lah a ru aw.

Kahraikathoutnaw pâleinae

Mrk 5:1-17; Luk 8:26-37

²⁸ Namran lah kaawm e Gadarenes ram lah a pha navah, kahrai ni a man e tami kahni touh hawvah ao roi, apihai hote lam a dawn thai aw hoeh nahanlah a mathengpaan roi. Phuen hoi a tâco roi teh Jisuh a dawn roi.

²⁹ Cathut Capa Jisuh, kaimouh hoi bangtelamaw na kâkuet vaw. Atueng a pha hoehnahlan kaimouh hah rektap hanelah khuet na tho vaw telah hramki laihoi ati roi.

³⁰ Ahnimouh hoi ek ahlahoehnae koe voknaw moikapap a pâ awh.

³¹ Kahraituilinaw niyah, Jisuh kaimouh na hrek pawiteh hote voknaw thungvah na kâen sak telah a kâhei awh. Jisuh ni, cet awh atipouh.

³² Kahrainaw hai a tâco awh teh voknaw thung a kâen awh. Vok kaawm e pueng teh tui teng pango dawkh hoi a tâto awh dawkvah tui dawkh koungh a due awh.

³³ Vok kakhounnaw kothung a yawng awh teh, kahraikathout ni a man e tami roi e kong hoi a hmu awh e naw pueng hah a dei awh dawkvah,

³⁴ Kothung e taminaw pueng ni Jisuh kâhmo hanelah a tâco awh. Jisuh hah a kâhmo awh toteh kaimae ram thung hoi a tâco hanelah a kâhei awh.

9

Kutkhok kamkhuen e a dam sak *Mrk 2:3-12; Luk 5:18-26*

¹ Hahoi, Jisuh ni long dawkh a kâcui teh, a ma onae kho tui namran lah a pha navah,

² a kutkhok kamkhuen e tami buet touh ikhun dawkh sut ka yan e hah ama koe a thokhai awh. Jisuh ni hotnaw e yuemnae hah a hmu navah, ka kamkhuen e tami hanelah, ka capa, kângai hanh. Na yon ngaithoum lah ao toe.

³ Cakathutkungnaw tangawn ni teh Cathut ka tapuet lah lawk a dei telah a pouk awh.

⁴ Jisuh ni hotnaw e lungpouk hah a hmu navah, nangmouh ni bangkongmaw utsinnae lung na tawn awh.

⁵ Bang lawk maw dei bet ka yawihnawn. Na yon ngaithoum lah ao toe tie maw bet ka yawihnawn, nahoehteh thaw nateh cet leih tie maw bet ka yawihnawn.

⁶ Tami Capa teh talaivan vah yon ngaithoum thainae kâtawnnae ka tawn tie nangmouh ni na panue awh nahanelah, thaw leih. Na phailei hah sin nateh nama im vah cet leih, telah ka kamkhuen e tami hah atipouh.

⁷ Ahni ni a thaw teh a ma im vah a cei.

⁸ Tami kamkhuengnaw ni a hmu awh navah a kângairu awh teh, taminaw koevah hettelah sak thainae kapoekung kahring Cathut hah a pholen awh.

Matthai a kawnae

Mrk 2:13-17; Luk 5:27-32

⁹ Hote hmuen koehoi Jisuh a cei navah, tamuk cawngnae im dawk ka tahung e Matthai hah a hmu navah, ka hnuk kâbang haw atipouh. Ahni hai a thaw teh, a hnuk a kâbang.

¹⁰ Hathnukkhu imthung bu ca hanlah a tahung navah, tamuk kacawngnaw hoi tamikathoutnaw a tho awh teh, a hnukkâbangnaw hoi rawca reirei a ven awh.

¹¹ Farasinaw ni a hmu awh toteh, a hnukkâbangnaw koe, nangmae Bawipa teh bangkongmaw tamuk kacawngnaw, tamikathoutnaw hoi cungtalah reirei a canei vaw, atipouh awh.

¹² Jisuh ni a thai navah, a tak kadamnaw ni tâsibawi panki awh hoehteh. Kapatawnaw ni doeh a panki awh.

¹³ Thuengnae hlak hai pahrennae doeh ka ngai tie na thai panuek aw h nahanlah cet a nateh kamtu aw h. Tami kalannaw kaw hanlah ka tho hoeh, tamikayonnaw hanelah doeh ka tho, atipouh.

Rawcahainae kong a pacei aw h

Mrk 2:18-22; Luk 5:33-39

¹⁴ Hatnavah Jawhan e a hnukkâbangnaw ni ahni koe a hnai aw h teh, kaimouh hoi Farasinaw ni rawca ka hai aw h. Bangkongmaw na hnukkâbangnaw ni rawca a hai aw h hoeh vaw, atipouh aw h.

¹⁵ Jisuh ni, yupaluenkung teh amae a huikonaw hoi rei ao navah, ahnimouh teh a lungmathoe a maw. Yupaluenkung hah a huikonaw hoi kapek teh alouklah ceitakhainae tue ka phat han. Hattoteh ahnimouh ni rawca a hai aw h han.

¹⁶ Khohna a kapawn e hah a katha e hoi ouk bo aw h hoeh. Hottelah bo pawiteh bonae ni bo e hah vak sawn vaiteh hoe kâphi han.

¹⁷ Hot patetvanlah, phaivuen um karuem daw k misurtui katha e hlun boihoeh. Hottelah hlun pawiteh, phaivuen um karuem tangpaw k vaiteh, misurtui a yu han, phaivuen um hai karaw k han. Ahruem e misurtui teh a katha e phaivuen um daw k doeh ouk hlun. Hottelah hlun to doeh kahni touh hoi a cuem han, atipouh.

Ka dout e napui hoi thikui e napui

Mrk 5:22-43; Luk 8:41-56

¹⁸ Hete lawknaw a dei lahun nah, bawi buet touh a tho teh, a tabo laihoi Bawipa, ka canu teh atuhlangca a due toe. Hatei, na tho teh, a van

vah na kut na tOUNg sin pawiteh bout a hring han atipouh.

¹⁹ Jisuh ni a thaw teh a hnukkâbangnaw hoi ahnie a hnuk a kâbang awh.

²⁰ Hatnavah, kum hlaikahni touh thung thikui patawnae ka tawn e napui buet touh ni,

²¹ a kâkhu e hni pawî ma hah dek ka tek pawiteh ka dam han telah a pouk dawkvah, rek a hnai teh hni pawî hah dek a tek.

²² Jisuh ni a kamlang teh hote napui hah a hmu navah, ka canu, kângai hanh. Na yuemnae ni na patawnae a dam sak toe, atipouh. Hat nah hote napui teh a patawnae a dam pouh.

²³ Bawî im a pha awh toteh, tapueng longpan kakhawngnaw hoi taminaw teh ruengrueng ati awh e a hmu navah,

²⁴ na phoun awh haw, napui ca teh kadout e nahoe, ka ip e doeh, atipouh. Hahoi ahni-manaw ni a panuikhai awh.

²⁵ Haw e taminaw hah kOUNg a tâco sak teh, imthungkhu a kâen, napui ca e a kut dawK a tek pouh tahma vah, napui ca teh hluet a thaw.

²⁶ Hote kamthang teh khoram pueng dawK a kamthang.

A mit ka dawnnaw hoi lawkanaw a dam sak

²⁷ Jisuh ni hote hmuen koehoi a tâco navah, a mit ka dawn e tami kahni touh ni a hnuk a kâbang roi teh, Devit capa, kaimouh roi heh na pahren haw, telah a hramki roi.

²⁸ Imthung a kâen navah a mit ka dawn e roi ni rek a hnai roi. Bawipa ni hete heh kai ni ka

coung sak thai tie hah na yuem roi maw telah a paei. Ahnimouh roi ni, ka yuem Bawipa ati roi.

²⁹ Ahnimouh roi e a mit dawk a tek pouh teh, na yuemnae patetlah nangmouh roi koe awmseh, atipouh navah ahnimouh roi e mit teh a ang.

³⁰ Jisuh ni, apihai panuek sak roi hanh lah a, telah kâhruetcuetae a poe.

³¹ Hatei, ahnimouh roi ni a cei roi teh, hote kamthang hah ram thung pueng a pathang roi.

³² Ahnimanaw a cei a hnukkhu, kahrai ni a man e tamipathu buet touh ama koe a hrawi awh.

³³ A thung e kahrai a pâlei pouh toteh, hote ka pathu e ni lawk a dei. Ka kamkhueng e pueng teh a kângai lah a ru awh teh, Isarel miphun dawk het patetlah e hmawt boihoeh rah ati awh.

³⁴ Farasinaw ni kahraituulinaw e bawi a kâuep laihoi doeh kahraituulinaw a pâlei ati awh.

³⁵ Jisuh ni khopui khote pueng dawk a cei teh, sinakoknaw dawkvah uknaeram kamthang kahawi hah a cangkhai. Patawnae a cawngca hoi kapatawnaw a dam sak.

³⁶ Ahnimanaw teh ngawt a tawn awh toung dawkvah, tukhoumkung kaawm hoeh e, pah-nawt e tunaw patetlah a hmu.

³⁷ Hatnavah, Jisuh ni, canga hane moi ao. Ka tawk e naw teh a younca.

Thaw katawkkung ayounca

³⁸ Hatdawkvah, law katawnkung koe ratoum awh, canga sak hanelah thawtawkkung a patoun thai nahanlah atipouh.

10

A hnukkâbang hlaikahni touh

¹ A hnukkâbang hlaikahni touh hah a kaw teh, kakhine muithanaw pâlei thainae, patawnae aphunphun dam sak thainae kê a poe.

² Guncei hlaikahni touh e a minnaw teh, apasuek vah Piter telah kaw e Simon hoi a nawnggha Andru,

³ Zebedee e capa Jem hoi a nawnggha Jawhan, Filip hoi Bartholomew, Thomas hoi tamuk ka cawng e Matthai,

⁴ Alfe capa Jem hoi Thaddaeus telah min katha hoi kaw e Lebbeus, Kanaan tami Simon hoi Judah Iskariot, ahni teh Jisuh ka pahnawt e doeh.

A hnukkâbang hlaikahni touh patounnae

⁵ Jisuh ni hete hlaikahni touh hah a patoun teh, kê a poe. Nangmouh teh Jentelnaw onae koe cet aw h hanh. Samaria kho thung kêen aw h hanh.

⁶ Isarel mip hun kahmat e tunaw onae koe hmaloe cet aw h.

⁷ Na cei aw h nah kalvan uknaeram teh a hnai toe telah pâpho aw h.

⁸ Kapatawnaw hah damnae poe aw h. Kad-outnaw hah thaw sak aw h. Ka hrikbei naw hah thoungsak aw h. Kahraituulinaw hah pâlei aw h. Nangmouh teh aphu laipalah na coe aw h dawkvah, aphu dâw laipalah poe aw h.

⁹ Sui, ngun, rahum tangkanaw hah tangkabom thung kêen aw h hanh.

¹⁰ Kahlong na cei nah lam hanelah, yawngya, angki kahni touh, khokkhawm, sonronnaw hah

kampu awh hanh. Bangkongtetpawiteh, ka tawk e teh paca hanlah a kamcu raw doeh.

¹¹ Bangpatet e khopui khotenaw dawk na kâen awh navah, api hoi maw a kamcu tie hah pacei a nateh, hote kho dawk hoi na tâco awh hoehroukrak ahnie im dawkvah awm awh.

¹² Imthung na kâen awh nah, yawhawinae awm naseh telah pato awh.

¹³ Hote imthung ni kamcu pawiteh nangmouh ni na dei awh e yawhawi lungmawngnae teh ahnimouh koe phat lawiseh. Kamcu hoehpawiteh nangmouh koe bout ban lawiseh.

¹⁴ Apipatet haiyah, nangmouh na luen sak awh hoeh, nangmae lawk hai ngâi awh hoehpawiteh, ahnie im thung hoi na tâco awh navah, hoehpawiteh, hote kho thung hoi na tâco nah, na khoktabei dawk e vaiphu hah takhawng sin awh.

¹⁵ Atangcalah na dei pouh awh. Lawkcengnae hnin dawkvah hote kho hateh, Sodom hoi Gomorrah kho hlah hoe a khang awh han.

Ka tho hane runae

¹⁶ Asui um vah tunaw tha e patetlah kai ni nangmouh na patoun awh. Hatdawkvah, tahrin patetlah lungang a nateh, Bakhu patetlah asue laipalah awm awh.

¹⁷ Taminaw hah kâhruetcueth awh. Lawkcengnae hmuen koevah na thak awh han. Sinakoknaw dawk na hem awh han.

¹⁸ Khobawinaw hoi siangpahrangnaw koevah Kai kecu dawk na thak awh han. Ahnimanaw hoi Jentelnaw koe lawkpanuesaknae lah ao nahan lah.

19 Hottelah na thak awh toteh bangtelamaw ka dei han tie hah kângai awh hanh. Dei hane lawk hah atueng a pha toteh na coe awh han.

20 Na mahmawk na dei awh e na hoeh. Nangmae na Pa e Muitha ni nangmouh lahoi yah a dei e doeh.

21 Hattoteh hmaunawnggha reira due sak hanlah a kâthak awh han. A na pa ni capa hah a thak han, canunaw ni hai manu na pa hah taran vaiteh a due sak awh han.

22 Taminaw ni haiyah, Ka min kecu dawk na hmawt ngai a mahoe. Apipatet haiyah a pout ditouh ka cak e teh rungngang lah ao han.

23 Kho buet touh dawk na rektap awh pawiteh, kho buet touh dawk yawng awh. Atangcalah na dei pouh awh. Isarel kho pueng, koung na katin awh hoehnahlan tami Capa teh a tho han.

24 A hnukkâbang e ni kacangkhaikung tapuet hoeh. A san ni a bawipa tapuet hoeh.

25 A hnukkâbang e teh kacangkhaikung patetlah san teh a bawipa patetlah awm pawiteh a khout. Imkung hah Beelzebub telah kaw awh pawiteh a imthungnaw natawng teh hoe a kaw awh han nahoehmaw.

Cathut takinae

26 Hatdawkvah, ahnimanaw hah taket awh hanh. Ramuk e pueng peng kamnuek han. Arulah kaawm e pueng hai ka kamphawng han.

27 Kai ni a hmonae koe na dei pouh e naw hah nangmouh ni a angnae koe dei awh. Na hnâ koe duem ka dei teh na thai awh e naw hah lemphu hoi hramkhai awh, atipouh.

28 Tak ka thet thai niteh, muitha ka thet thai hoeh e hah taket awh hanh. Tak hoi muitha hah hell dawk mek ka thet thai e hah hoe taket awh.

29 Pusu kahni touh hah rahum tangka phek touh hoi ran nahoehmaw. Nangmae na Pa koehoi laipalah hote pusu buet touh boehai talai bawt mahoe.

30 Na sam patenghai koug touk e lah ao.

31 Hatdawkvah taket awh hanh. Pusunaw hlak nangmouh teh apu na o awh.

Tami hmalah Khrih kampangkhai

32 Apipatet haiyah, tami hmalah Kai na kampangkhai e teh kalvan kho kaawm e a Pa hmalah ahni hah ka kampangkhai van han.

33 Apipatet haiyah taminaw hmalah Kai hah na ka pahnawt e teh, kalvan kho kaawm e a Pa hmalah ahni teh ka pahnawt van han.

Roumnae laipalah kâkapeknae tahloi

34 Talai van vah roumnae tho sak hanelah a tho telah pouk awh hanh. Roumnae tho sak hanelah ka tho hoeh. Tahloi patoun hanelah doeh ka tho.

35 Na pa hoi capa, manu hoi canu, mani hoi langa, kâkapek sak hanelah doeh ka tho.

36 Imthungnaw haiyah taran lah ao awh han.

37 Apipatet haiyah, Kai hlak a manu, a na pa lungpataw pawiteh, kai hoi ka kamcu hoeh. Apipatet haiyah, canu capa hah Kai hlak lungpataw pawiteh kai hoi ka kamcu hoeh.

38 Apipatet haiyah amae thingpalam hrawm hoi ka hnukkâbang hoehpawiteh kai hoi kamcu hoeh.

³⁹ A hringnae ka vum e teh hringnae a sung han. Kai kecu dawk a hringnae ka sung e teh, hringnae a coe han.

Tawkphu na hmu han

⁴⁰ Nangmouh na ka dâw e teh Kai hai na dâw toe. Kai na ka dâw e teh kai na kapatoukung hai a dâw toe.

⁴¹ Profet e minhmai khet lahoi ka dâw e teh, profet e tawkphu hah a coe han. Tami kalan e minhmai khet lahoi ka dâw e teh, tamikalan e tawkphu hah a coe han.

⁴² Apipatet haiyah, a hnukkâbangnaw e minhmai khet laihoi hete kathoengcae tami buet-buet touh hah tui pânding manang buet touh banghai ka pânei e tami teh, atangcalah na dei pouh awh, tawkphu coe laipalah awm roeroe mahoeh, telah lawk a thui.

11

Jisuh hoi Baptisma Jawhan

¹ Hottelah a hnukkâbang hlaikahni touh hah kê a poe hnukkhu, cangkhai hane hoi kamthang pâpho hanelah khopui khote tangkuem koe a cei.

² Khrih ni a sak e pueng hah Baptisma kapoekung Jawhan ni thongim thung hoi a thai navah, amae a hnukkâbang kahni touh a patoun teh, a ka tho hane teh nang tOUNg na maw.

³ Hoehpawitech alouke maw ka ngaihawi awh han rah, telah a pacei sak.

⁴ Jisuh ni, Jawhan koe cet roi nateh na thai awh e hoi na hmu awh e pueng hah dei pouh awh, atipouh.

⁵ Mit kadawnnaw ni kho a hmu aw h toe. Kamkhuennaw ni lam a cei aw h toe. Ka hrikbeinaw ni a thoung aw h toe. Hnâpangnaw ni hnâ a thai aw h toe. Kadoutnaw ni a thaw aw h toe. Karoedengnaw ni hai lunghawinae kamthang a thai aw h toe.

⁶ Kai kecu daw k a lung ka pout hoeh e teh a yawhawi telah atipouh.

⁷ Ahnimouh a cei a hnukkhu, Jisuh ni Jawhan deingainae lahoi rangpuinaw a dei pouh e teh, nangmouh ni bang hmu hane lahoi maw kahrawng na tâco a vaw. Kahlî ni hon a nawi e phonaw khet hanelah maw na tâco aw h.

⁸ Hoeh teh, khohna kahawi ka khohnat e khet hanelah maw na cei aw h. Khohna kahawi ka khonaw teh siangpahrang im doeh ouk ao.

⁹ Profet khet hanelah maw na cei aw h. Bokheiyah. Profet hlak kalen e lah ka o ka ti.

¹⁰ Cakathoung daw k thut e teh, khenhaw! na cei nahane lamthung ka rasoun hanelah kaie patoune hah na hmalah ka patoun ati navah ahni doeh a dei ngai nah.

¹¹ Atangcalah ka dei. Napui ni a khe e naw thung daw k Baptisma Jawhan hlak kalen e buet touh boehai kamphawng hoeh rah. Hatei, kalvan uknaeram daw kvah kathoungpoune hah ahni hlak a len han.

¹² Baptisma Jawhan koehoi kamtawng teh atu totouh kalvan uknaeram hah a kâtuk aw h. Kâtuk e naw ni hai thama lah a kâen aw h.

¹³ Jawhan a pha hoehnahlan totouh kâlawnaw hoi profet lawknaw ni na cangkhai aw h.

¹⁴ Nangmouh ni ka lawk hah na thai panuek awh pawiteh ahni teh ka tho hane Elijah doeh toe.

¹⁵ Thai nahan hnâ ka tawn pueng ni thai naseh.

¹⁶ Hete miphunnaw hah bang hoi maw ka bangnue han vai. Pawi koe ka tahung e camonaw hoi a kâvan awh.

¹⁷ Kahawicalah ratoung tamawi ka tum a haiyah na lam awh hoeh. Khuika la sak nahaiyah na kap awh hoeh.

¹⁸ Jawhan teh catnet laipalah a tho navah, kahrai ni a man e doeh bout na ti awh.

¹⁹ Tami Capa teh canei laihoi a tho navah, ka carawng e, misurtui kâso e, tamuk kacawngnaw hoi tamikayonnaw e huiko lah kâsak e bout na ti pouh awh. Hateiteh, a lungangnae ni, a canaw a hlout sak telah a ti.

Pankângai hoeh e khonaw yawthoenae

Luk 10:13-15

²⁰ Hatnavah, athaonae a kamnue saknae khonaw ni pankângainae a tawn awh hoeh dawkvah, hote khonaw hah Jisuh ni a yue.

²¹ Oe! Khorazin, na yawthoe. Bethsaida, na yawthoe. Nangmouh koe thaonae hno ka sak e naw hah Taire hoi Sidon khonaw dawkvah ka sak boipawiteh, hotnaw ni buri kâkhu hoi vaiphu kâphuen awh vaiteh, pankângai awh han ei nan toung mah.

²² Atangcalah na dei pouh awh, lawkcengnae hnin dawkvah, nangmouh teh Taire hoi Sidon khonaw hlak na khang awh han.

²³ Kapernuam kho, nang teh kalvan totouh tawm lah na kaawm ei nakunghai, phuen kho

totouh pabo lah na o han. Na thungvah thaonae hno sak lah kaawm e naw hah Sodom kho dawkvah ka sak pawiteh, hote kho teh atu sittouh kangdout han ei.

²⁴ Atangcalah na dei pouh awh. Lawkcengnae hnin dawkvah Sodom kho hlak hoe na khang awh han, atipouh.

Hnori kaphawtnaw tho awh

Luk 10:21-22

²⁵ Hatnavah, Jisuh ni, kalvan hoi talai kaukung a Pa, nang ni a lungkaangnaw hoi kathoumnaw koe kângairu hnnonaw hah na hro teh, camonaw koe na pâpho dawkvah na lungmanae teh ka pholen.

²⁶ Oe apa hottelah na ngainae ao.

²⁷ A Pa nang ni hnocawngca pueng kai koe na poe toe. Pa laipalah apinihai Capa panuek hoeh. Capa hoi Capa ni a kamnue pouh e hloilah apinihai Pa teh panuek hoeh.

²⁸ Hno ka ri ni teh kapatangnaw kai koe tho awh, kai ni na kâhat sak han.

²⁹ Kaie kahnam hah phawt awh. Kai koe kamtu awh. Kai teh lungdonae hoi lungnemnae lah ka o. Na hringnae ni kâhatnae a hmu han.

³⁰ Bangkongtetpawiteh, kaie kahnam teh phu a nep. Ka hno hai a pâhaw, atipouh.

12

Jisuh teh Sabbath Bawi lah a o

Mrk 2:23-28; Luk 6:1-5

¹ Hatnae tueng nah, Jisuh teh Sabbath hnin vah, catun lawnaw dawk a cei navah, a

hnukkâbangnaw teh a vonhlam aw h dawkvah, catun vuinaw hah a pahroe aw h teh a bap aw h.

² Farasinaw ni a hmu toteh, sabbath hnin sak hoeh hane kawi hah na hnukkâbangnaw ni a sak aw h, telah atipouh aw h.

³ Jisuh ni, Devit teh a huinaw hoi a vonhlam aw h navah,

⁴ Cathut e im daw k a kâen teh, a ma ni a cakawi hoeh e, a huinaw ni hai a cakawi hoeh e, vaihmanaw ni dueng a cakawi e vaiyei a ca e hah na touk a boihoeh maw.

⁵ Vaihmanaw nihaiyah, bawkim daw k sabbath hnin a hnan aw h ei, tounhoehe lah ao tie hah kâlawnaw daw k na touk a boihoeh maw.

⁶ Kai ni ka dei e teh, hie hmuen koe bawkim hlak hoe kalen e ao.

⁷ Thuengnae hlak pahrennae hah ka ngai tie Cakathoung daw k kaawm e na thai panuek aw h pawiteh, yon ka tawn hoeh e naw hah yonpen aw h mahoe h ei.

⁸ Tami Capa teh sabbath hnin kaukung lah ao, atipouh.

Kutvang kamkhuen e a dam saknae

Mrk 3:1-6; Luk 6:6-11

⁹ Hote hmuen koehoi a cei teh sinakok thung a kâen. A kutvang ka khem e tami buet touh ao.

¹⁰ Tami tangawn ni Jisuh a yon tawngnae lah, sabbath hnin vah patawnae roum sak kawi maw, titeh a pacei aw h.

¹¹ Jisuh ni, tu buet touh na tawn e ca hah sabbath hnin vah, tangkom thung baw t pawiteh rasat laipalah kaawm hane tami buet touh bang-hai nangmouh thung daw k na o aw h maw.

¹² Tami teh tu hlak aphu ao nahoehmaw. Hatdawkvah, sabbath hnin hnokahawi sak kawi lah ao, atipouh.

¹³ Hote a kutvang kadout e koevah, na kut hah dâw haw, atipouh navah ahni ni a kut a dâw teh, avanglae kut patetlah ao.

¹⁴ Hattoteh Farasinaw a tâco awh teh, Jisuh bangtelah hoi maw thei han telah a kapan awh.

Cathut thaw ka tawk e

¹⁵ Jisuh ni a panue dawkvah, hote hmuen koehoi alouklah a cei teh, moikapap e taminaw ni a kâbang awh teh, ahnimae patawpanatnae kaawm e pueng hah a dam sak pouh.

¹⁶ Ahnimouh ni pung a pathang awh hoeh nahan kâhruetcuetae a poe.

¹⁷ Hot teh, profet Isaiah e lawk a kuep nahane doeh.

¹⁸ Isaiah ni a dei e lawk teh, thai awh haw, ka rawi e ka san, ka pahren poung e ahni dawkvah ka lung ahawi tanggak. Ahni dawka muitha ka caksak han. Jentelnaw hah lawkcengnae kâ ka poe han.

¹⁹ Oun hoeh, hram hoeh. Hatdawkvah ahnie lawk apinihai lam dawka thai mahoe.

²⁰ Coungroe e lungpungkung khoe hoeh, hmaikhu kapap e hmaipalai dout hoeh, A lawk teh tânae koe a pha nahanlah a sak han.

²¹ A min haiyah Jentelnaw ni a kâuep awh han, telah a pâpho.

Jisuh hoi Beelzebub

Mrk 3:23-27; Luk 11:17-22

²² Hatnavah, kahrai ni a man teh, mit ka dawn, lawk ka a e tami buet touh a ma koe a thokhai awh. A mit bout a ang teh, lawk bout a dei thai nahanlah Jisuh ni ahawi sak.

²³ Hawvah ka kamkhuengnaw pueng ni a kângairu awh teh, ahni heh Devit e capa han na maw telah ati awh.

²⁴ Farasinaw ni a thai awh navah, ahni teh kahraituilinaw e bawi Beelzebub a kâuep laihoi doeh kahraituilinaw hah a pâlei thai, ati awh.

²⁵ Jisuh ni hotnaw e pouknae a panue pouh dawkvah, bangpatet e uknaeram haiyah amamouh hoi mamouh kâpo awh hoehpawiteh, rawknae koe a pha awh han. Bangpatet e khoram hoi imthung haiyah amamouh hoi mamouh kâpo awh hoehpawiteh kangdout thai mahoe.

²⁶ Setan ni Setan hah pâlei pawiteh, amamouh hoi mamouh kâkapek vaiteh a uknaeram bangtelamaw a kangdue thai han vaw.

²⁷ Kai ni Beelzebub kâuep laihoi kahraituilinaw ka pâlei pawiteh, nangmae canaw niteh, apimaw a kâuepkhai vaiteh a pâlei awh han. Hatdawkvah ahnimouh teh nangmouh lawkcengkung lah ao awh han.

²⁸ Kai ni Cathut e Muitha hah kâuep laihoi kahraituilinaw ka pâlei pawiteh, atangcalah nangmouh koe Cathut uknaeram kangdue nahane tueng teh a pha toe.

²⁹ A thakaawmpounge tami, a ma hah hmaloe katek hoehpawiteh, apinimaw ahni imthung a cei vaiteh hnopainaw hah a lawp thai han. A ma hah hmaloe katek pawiteh doeh a hnopainaw hah lawp thai lah awm tih.

³⁰ Kai koe lah kambawng hoeh e teh ka taran doeh. Kai hoi cungtalah kaawm hoeh e teh kampek e lah ao.

Muitha ka dudam e

³¹ Hatdawkvah, ka dei e teh, yonnae puenghoi Cathut dudamnae yon pueng hai taminaw ni ngaithoumnae a hmu thai aw. Hatei, Kathoung Muitha dudamnae yon teh taminaw ni ngaithoumnae hmawt thai aw hoeh.

³² Tami Capa hah a pahni hoi ka yon e yon ngaithoum thai. Kathoung Muitha hah a pahni hoi ka yon e yon teh atu a hring na hai, due hnukkhu hring nah hai ngaithoum thai mahoe.

³³ A paw dawkhoei hoi akung e coungnae a kamnue dawkvah, a paw hawi pawiteh akung hai ahawi. A paw hawihoei pawiteh a kung hai hawi hoeh.

³⁴ Hrunthoe catounnaw, laplap na thoe aw nahlangva kahawi e lawk hah bangtelamaw na dei thai aw han. Lungthung kakawi e patetlah doeh pahni ni hai a dei.

³⁵ Tami kahawi ni teh a lungthung e kahawi e hno hah a rasa.

³⁶ Ka dei e teh, taminaw ni aphu kaawm hoeh e lawk na dei e pueng hah, lawkcengnae hnin dawkvah nama ni na deicai han. Na lawknaw lahoi yah, yon hlout lah na o han.

³⁷ Hoehpawiteh, na lawk dei e naw lahoi yah. yon lawkceng lah na o han, atipouh.

Jawnah e mitnout
Luk 11:29-32

³⁸ Hat torei teh, cakathutkungnaw hoi Farasi-naw niyah, Bawipa kaimouh ni mitnoutnae buetbuet touh hmu han ka ngai, atipouh awh.

³⁹ Jisuh ni, tami kahawihoehnaw e catounnaw ni mitnoutnae na hei awh nah, profet Jonah laipateh alouke bang buet touh boehai kamnuek sak mahoeh.

⁴⁰ Jonah teh tanga von daw k hnin thum touh ao patetlah tami Capa teh talai thungvah hnin thum touh ao van han.

⁴¹ Lawkcengnae hnin navah, Nineveh kho e taminaw teh hete miphunnaw e a vang lah thaw awh vaiteh ahnimanaw a sung sak awh han. Bangkongtetpawiteh, ahnimouh teh Jawnah ni a pâpho e lawk kecu daw k pan a kângai awh. Hie hmuen koe Jawnah hlak hoe kalen e teh ao.

⁴² Lawkcengnae hnin navah, akalah e siang-pahrangnu teh hete miphunnaw e avanglah thaw vaiteh ahnimanaw hah a sung sak han. Bangkongtetpawiteh, hote siangpahrangnu teh Solomon siangpahrang e lungangnae lawk hah thai hanelah talai poutnae koehoi a tho toe. Khenhaw! hie hmuen koevah Solomon hlak ka talue e teh ao.

Kahrai kathout bout a ban

⁴³ Kakhine muitha teh tami thung hoi a tâco teh duem ao nahane hmuen hah yuengyoe a tawng.

⁴⁴ A hmu hoeh toteh ka tâconae, ouk ka onae im koe lah bout ka ban han ati teh bout a tho navah hote im teh sut ka hong e lah ao tie a hmu.

⁴⁵ Hahoi, ama hlak hoe kathoute alouke sari touh a kaw teh, hote tami thungvah bout a kâen

awh teh ao awh. Hote tami teh ahmaloe e hlak a mathoe. Kathout e hete miphunnaw koevah hot patetlah ao van han telah a dei pouh.

Jisuh e manu hoi hmaunawngaha naw

Mrk 3:31-35; Luk 8:19-22

⁴⁶ Hottelah taminaw koevah a pâpho lahun nah a manu hoi a nawngghanaw ni pato han a ngai awh dawkvah alawilah sut a kangdue awh.

⁴⁷ Tami buet touh ni na manu hoi na nawngghanaw ni na pato hane a ngai awh dawkvah alawilah sut a kangdue telah a dei pouh.

⁴⁸ Ka manu ka nawngghanaw teh api nama telah a pacei.

⁴⁹ A hnukkâbangnaw koe lah a kut a dâw teh, hetnaw teh ka manu, ka nawngghanaw doeh.

⁵⁰ Kalvan kho kaawm, a Pa e ngainae ka sak e pueng teh ka nawngaha, ka tawncanu, ka manu lah doeh ao, telah atipouh.

13

Cati kaheikung bangnuenae

Mrk 4:1-12; Luk 8:4-10

¹ Hot hnin vah Jisuh imthung hoi a tâco teh talî teng vah a tahung navah,

² moikapap e taminaw ni a kalup awh teh a kamkhueng awh. Long thung a kâen teh a tahung. Rangpuinaw teh a kawngteng lah a kangdue awh.

³ Hatnavah, bangnuenae lawknaw hah a dei pouh e teh, thai awh haw, cati kahei e tami ni cati kahei hanelah a tâco.

⁴ Cati teh a hei navah, a tangawn teh lam teng lah a bo. Lam teng a bo dawkvah tavanaw ni a tho awh teh a pâtu awh.

⁵ A tangawn teh talai a rapamnae koe lung-carawk um vah a bo. Hawvah ka bawt e cati teh tang a paw eiteh, a khawngyang a pabo hoeh dawkvah,

⁶ Kanî a tâco toteh khumbei ni a daw dawkvah, ketkamyai teh rawknae koe a pha.

⁷ A tangawn teh pâkhing um vah a bo. Hawvah ka bawt e cati teh a paw ei pâkhing ni a katek teh a rawk awh.

⁸ A tangawn teh kahawi e talai dawk a bo. Hawvah ka bawt e cati teh a let 30, 60, 100 totouh a paw teh a pung awh.

⁹ Thai nahan hnâ ka tawn e pueng ni thai na seh, atipouh.

Banguenae akungtuen

¹⁰ A hnukkâbangnaw ni a hnai awh teh, bangkongmaw hetnaw koevah banguenae la-hoi na dei pouh telah a pacei awh.

¹¹ Jisuh ni, nangmouh teh kalvan uknaeram hrolawknaw hah panuethainae kê na tawn awh. Hatei, ahnimanaw teh, tawn awh hoeh.

¹² Apipatet haiyah ka tawn e tami teh kapap a tawn nahanlah bout poe sin han. Apipatet haiyah ka mathoe e teh a tawn e ca patenghai lawp lah ao han.

¹³ Ahnimouh teh a hmu awh nahlangva nout awh hoeh. A thai a nahlangva panuek awh hoeh. Hatdawkvah banguenae hoi ka cangkhai.

¹⁴ Isaiah ni, nangmouh teh na thai awh nahlangva vah thai panuek laipalah na thai awh.

Na hmu aw h nahlangva vah nout laipalah na hmu aw h.

¹⁵ Hete miphunnaw niyah mit hmawt thai aw h hoeh, hnâthai thai aw h hoeh, a lungthin hoi panuek aw h hoeh, a hringnae kâthung aw h hoeh, a patawnae dam sak hoeh hane totouh a lungthin a hmo teh, a hnâpang aw h teh, a mit a tabuem aw h, telah sutdeilaw k, hete miphunnaw koe a kuep.

¹⁶ Nangmouh teh na mit ni a hmu teh na hnâ ni hai a thai dawkvah yawhawi lah na o aw h.

¹⁷ Atangcalah na dei pouh aw h. Nangmouh ni na hmu aw h e hah profetnaw hoi tami kalannaw ni hmu hane a ngai a ei hmawt aw h hoeh. Na thai aw h e hah thai hane a ngai a ei thai aw h hoeh.

Cati kahei e deicainae

¹⁸ Cati kaheikung bangnuenae dei ngainae teh, thai a haw.

¹⁹ Lam teng daw k ka baw t e cati tingainae teh, uknaeram law k hah sut a thai ei, a thai panuek hoeh daw kvah, kahrai ni a lung daw k hei lah kaawm e cati hah yout a la pouh tingainae doeh.

²⁰ Lungcaraw k um ka baw t e cati tingainae teh, kamthang kahawi hah a thai navah, lunghawinae lung hoi tang a dâw eiteh,

²¹ a lungthin daw k a khawngyang a payang hoeh daw kvah, dawngdengca dueng doeh ao. Law k kamthang kecu daw k rektapnae a khang toteh, hnuklah tang a kâhnawn tingainae doeh.

²² Pâkhing um ka baw t e cati tingainae teh, Law k kamthang hah a thai eiteh, talaivan hnopai daw k lungpuennae hoi hnopai tawntanae ni a

dumyen teh, hote hno ni kamthang lawk hah a katek dawkvah, a paw paw thai hoeh tingainae doeh.

²³ Talai kahawi dawk ka bawt e cati tingainae teh, kamthang kahawi hah a thai teh, a thai panuek dawkvah alet 30, 60, 100 totouh a pungdaw tingainae doeh atipouh.

Cang hoi pho mu bangnuenae

²⁴ Alouke bangnuenae bout a dei pouh e teh, kalvan uknaeram teh, a law dawk cati kahei e hoi a kâvan.

²⁵ Taminaw a i awh lahun nah taran hah a tho teh, cang hoi kâvan e pho mu hah cang um vah mak a hei sin teh yout a ceitakhai .

²⁶ Cang teh a pâw, a rounq, a vui a tâco toteh, phokungnaw hai a kamnue van.

²⁷ Hattoteh a sannaw ni imkung koe a cei awh teh, Bawipa, cati kahawi dueng nahoehmaw na law dawk na kahei vaw, phokungnaw teh nâ e na maw. atipouh awh navah,

²⁸ hethateh taran ni a sak e doeh atipouh. Hat pawiteh, ka cei a vaiteh phokungnaw hah kounq phawk sak hanelah na ngainae ao maw, telah atipouh awh navah,

²⁹ Imkung ni, hottelah ka ngainae awm hoeh. Phokungnaw hah na phawng awh pawiteh, cangkungnaw haiyah mek na phawng a payon vai ti puennae ao.

³⁰ Canga tue totouh teh, reirei rounq na yawkaw seh. Canga tue a pha toteh, phokungnaw hah hmaloe phawk vaiteh hmai phum hanlah tangoung awh. Cakang hateh capai daw

cui awh telah ka a e naw hah ka ti pouh han telah imkung ni atipouh.

Antam mu hoi Ton bangnueanae

Mrk 4:30-32; Luk 13:18-21.

³¹ Alouke bangnueanae lawk a dei pouh e teh, kalvan uknaeram teh law dawk patûe e antam mu hoi a kâvan.

³² Antam mu teh a mu pueng hlak vah a thoung eiteh, a rounng toteh phokung pueng hlak a len dawkvah, kahlun kamleng tawanaw ni a tho aw hah teh a kangnaw daw k a kamcout, a kâhat thai nahan totouh e a kung lah ao telah atipouh.

³³ Alouke bangnueanae lawk a dei pouh e teh kalvan uknaeram teh ton hoi a kâvan. Napui ni ton a la teh tavai tangthung kathum touh daw k a thum dawkvah tahawn kaawm e pueng hah a po sak atipouh.

³⁴ Jisuh ni hete bangnueanae lahoi yah, rang-puinaw hah a dei pouh. Bangnueanae laipalah dei pouh hoeh.

³⁵ Hot patet e lahoi yah, profet e lawk tie hateh, ka pahni ka ang vaiteh bangnueanae hah ka dei han. Talaivan pek a kamtawng hoiyah hro lah kaawm e naw hah ka pâpho han telah sut a dei e lawk hah kuepnae koe a pha.

Cati hoi phokung bangnueanae

³⁶ Hathnukkhu Jisuh ni tami kamkhuengnaw hah a ceisak teh, imthung a kâen hnukkhu, a hnukkâbangnaw ni a hnai aw hah teh, law daw k hei e kahrawng e pho mu hah bang tingainae maw kacaicalah na dei pouh haw atipouh.

³⁷ Jisuh ni, cati kahawi kahei e teh tami Capa doeh.

³⁸ Law hateh het talaivan doeh. Kahawi e cati teh uknaeram capanaw doeh. Kahrawng e pho mu teh kahrai capanaw doeh.

³⁹ Kahrawng e pho mu ka hei e taran hateh Kahraimathout doeh. Canga tue teh het talaivan poutnae doeh. Cang ka a e naw teh kalvantaminaw doeh.

⁴⁰ Kahrawng phokungnaw hah phawk vaiteh hmai phum e patetlah het talai apout navah kaawm han.

⁴¹ Tami Capa ni ama e kalvantami a patoun vaiteh, ka payon sak e naw hoi kahawihoehe hno ka sak e pueng hah A uknaeram thung hoi rawi vaiteh,

⁴² khuikanae, hâ katanae onae koe hmai daw k a pabo awh han.

⁴³ Hatnavah tami kalannaw teh kanî patetlah amae na Pa e uknaeram daw k a ang awh han. Thai nahan hnâ ka tawn e pueng ni teh thai naseh.

Hro e hnopai hoi aphu kaawm poung pale bangnueae

⁴⁴ Kalvan uknaeram teh law daw k hro e hno hoi a kâvan. Hote hno hah kahmawt e ni teh bout a ramuk teh, lunghawi laihoi a ban teh a tawn e pueng hah a yo hnukkhu hote law hah a ran.

⁴⁵ Hahoi, kalvan uknaeram teh aphu kaawm poung e Pale ka tawng e hno kayawtkung hoi a kâvan.

⁴⁶ Hote hno kayawtkung ni aphu kaawm poung e Pale hah a hmu toteh, a cei teh a tawn e pueng hah a yo hnukkhu hote Pale hah a ran.

Tamlawk bangnue nae

⁴⁷ Hahoi, kalvan uknaeram teh talî daw k heng nah aphunphun e tanganaw ka ramuk e tamlawk hoi a kâvan.

⁴⁸ Tanga moi a kaman toteh a kongteng lah a sawn teh, a tahungkhai awh. Kahawi e tanganaw hah a rawi awh teh sikrei daw k a pâseng awh. Kahawi hoeh e tanganaw teh a tâkhawng awh.

⁴⁹ Hot patetlah talai a pout navah kalvantaminaw ni kum awh vaiteh, tami kalannaw um hoi tamikayonnaw teh rawi ka pek vaiteh,

⁵⁰ khuikanae, hâ katanae onae koe hmai daw k a pabo awh han.

⁵¹ Hete hnonaw pueng hah na thai panuek a ou. telah a pacei toteh, ka thaipanuek awh toe Bawipa telah a hnukkâbangnaw ni atipouh awh.

⁵² Hatdawkvah, kalvan uknaeram kong ka cang tangcung e kâlawk kacangkhakungnaw, a hnukkâbang lah kaawm e tami teh, amae hno aphunphun e, a katha hoi a karuem e naw hah peng ka rasat e imkung hoi a kâvan atipouh.

Profet ouphoehnae

⁵³ Hote bangnue nae lawknaw hah koug a dei pouh hnukkhu hote hmuen hah a ceitakhai .

⁵⁴ Hathnukkhu amae khothung a pha teh sinakoknaw daw kvah a cangkhai, khothung e taminaw teh a kângairu awh daw kvah, hete tami ni hete lungangnae hoi hete thaonae heh nâ e ne a tawn.

⁵⁵ Ahni teh lettama e capa nahoehmaw. A manu teh Meri nahoehmaw. A nawnggha teh Jem, Joseph, Simon, Judah tie naw nahoehmaw.

⁵⁶ A tawncanunaw haiyah maimouh hoi kah-nai lah awm aw hoh hoh maw. Hat pawiteh hete tami ni hete hnonaw hah na e maw a hmu telah ati aw h.

⁵⁷ A lungpout aw h. Jisuh ni profetnaw teh ama kho, amae ram alawilah doeh barinae ao telah atipouh.

⁵⁸ Khothung e naw ni a yuem aw h hoh dawkvah, hote hmuen koe thaonae moikapap sak hoh.

14

Baptisma Jawhan duenae

Mrk 6:14

¹ Hatnavah, Herod bawi ni Jisuh e kamthang hah a thai navah,

² het hateh Baptisma kapoekung Jawhan doeh. Duenae koehoi a thaw toe. Hatdawkvah kângairu hnonaw hah a sak thai telah a kut rahim e naw koe a dei pouh.

³ Herod ni amae a nawnggha, Filip e a yu Herodias dawkvah Jawhan hah a man a katek teh thongim vah a paung.

⁴ Jawhan ni Herod koe hote napui na la e heh thoung hoh telah Herod hah atipouh dawkvah,

⁵ Jawhan hah thei han a ngai ei rangpuinaw a taki dawkvah thet ngam hoh. Rangpuinaw ni Jawhan hah profet buet touh lah a pouk aw h,

⁶ Herod a khenae hnin a pha teh pawî a sak navah Herodias e canu teh pawî thung a lam dawkvah, Herod lung ahawî sak.

⁷ Na hei e pueng na poe han telah thoekâbonae hoi lawk a kam.

⁸ A manu ni a uen e patetlah Baptisma kapoekung Jawhan e a lû hah hete tongben dawk na poe telah a hei.

⁹ Siangpahrang teh a lungmathoe ei lawk yo a kam toung dawkvah a huikonaw e minhmai hah a khet teh, poe hanelah kâ a poe.

¹⁰ Hatdawkvah, tami a patoun teh, Jawhan e lahuen hah thongim thungvah a tâtueng sak.

¹¹ A lû hah tongben dawk hoi napui ca a poe awî teh napui ca ni a manu koe a sin.

¹² Jawhan e a hnukkâbangnaw a tho awî teh a ro hah a sin awî. A pakawp awî hnukkhu, Jisuh koe a cei awî teh a dei pouh awî.

Tami 5000 touh rawca a paca

Mrk 6:32-44; Luk 9:10-17; Jhn 6:1-13

¹³ Jisuh ni a thai nah hote hmuen hah long hoi a ceitakhai teh kingdinae koe vah a cei. Taminaw ni a thai awî dawkvah kho thung hoi a tâco awî teh khok hoi a kâbang awî.

¹⁴ Jisuh ni a cei navah, taminaw a hmu nah a pahren dawkvah kapatawnaw pueng a dam sak.

¹⁵ Tangmin vah a hnukkâbangnaw ni a hnai awî teh, hiteh thingyeyawn doeh. Kho hai a hmo toe. Rangpuinaw teh canei ran hanlah khonaw dawk cetsak lawi atipouh awî. navah,

¹⁶ Jisuh ni ahnimouh a cei ngai hoeh. A ca awî hanelah poe awî, atipouh.

17 Ahnukkâbangnaw ni vaiyei panga touh hoi tanga kahni touh hoe laipateh kaimouh koe alouke rawca awmhoeh bout ati. Hahoi, Jisuh ni vaiyei hoi tanga hah hi sin aw haw atipouh.

18 Hattoteh rangpuinaw hah tahung hanlah kâ a poe.

19 Tamimaya hah pho van tahung hanelah kâ a poe. Vaiyei panga touh hoi tanga kahni touh hah a sin teh kalvan lah moungh laihoi, lunghawi lawk a dei hnukkhu, vaiyei hoi tanga hah a raen teh a hnukkâbangnaw hah a poe.

20 A hnukkâbangnaw ni hai rangpuinaw hah patuen a poe aw h. Rangpuinaw ni kaboumlah a ca aw h hnukkhu, ka cawi e a rakhun aw h teh tangthung hlaikahni touh akawi.

21 Ka cat e abuemlah napui hoi camo dei laipalah tongpa dueng 5,000 touh hane a pha aw h.

Jisuh tui van lam a cei

Mrk 6:45-51; Jhn 6:15-21

22 Jisuh ni kamkhueng e taminaw hah a ban sak lahun navah, a hnukkâbangnaw hah long a kâcui sak teh namran lah hmaloe a patoun.

23 Kamkhueng e naw be a ceisak hnukkhu ratoum hanlah, mon lah soumtinae koe a luen teh, tangmin vah amadueng ao.

24 Long teh tui lungui vah kahlî ni khak a ngang dawkvah tuicapa ni a hem aw h.

25 Tangmin suimilam pali nah Jisuh teh ahni-mouh koe tui van vah a cei.

26 Hottelah tui van a cei teh a tho e hah a hmu aw h navah, kahrai doeh titeh taki hoi a hramki aw h.

²⁷ Jisuh ni na lungpuen awh hanh. Kai doeh taket awh hanh atipouh.

²⁸ Piter ni Bawipa, nang boipawiteh, tui van hoi nang koe ka tho nahanlah kâ na poe haw atipouh.

²⁹ Hattoteh hi tho atipouh. Piter ni long van hoi a kum teh Jisuh koe pha hanelah tui van vah a cei.

³⁰ Kahlî a tang e hah a hmu navah a taki teh tui thung lah a bo dawkvah Bawipa na rungngang haw telah a hram.

³¹ Jisuh ni a kut a dâw teh Piter hah a kuwet. Yuemnae kayoun e tami bangkongmaw oupvoutnae na tawn atipouh.

³² Long van a pha roi toteh kahlî a roum.

³³ Long thung kaawmnaw ni a hnai awh teh, nang teh Cathut Capa tangngak doeh ati awh teh a bawk awh.

³⁴ Namran lah a ceiawh teh Gennesaret ram dawk a pha awh.

³⁵ Hot hmuen dawk e kaawm e naw ni a nout awh navah, a teng kaawm e hmuen pueng koe, tami a patoun awh dawkvah, ka pataw e pueng hah a thokhai awh.

³⁶ A kâkhu e hni pawî hah, tek thai nahanlah a kâhei awh. Katek e pueng haiyah damnae a coe awh.

15

Mintoenaw e cangkhainae

Mrk 7:1-23

¹ Hatnavah, Jerusalem e Farasinaw hoi cakathutkungnaw teh Jisuh koe a tho awh.

² Ayan e kacuenaw e phung hah bangkongmaw na hnukkâbangnaw ni a tapoe awh. Ahnimouh ni kut kamsin laipalah bu a ca awh, telah atipouh awh navah,

³ Nangmouh ni ayan e phung hah kâuep laihoi bangkongmaw Cathut e kâpoelawk hah na tapoe van awh.

⁴ Cathut e kâpoelawk teh na manu hoi na pa bari awh. Apihai manu hoi na pa hawihoehnae ka dei e teh due totouh thei lah awmseh telah a ti.

⁵ Hatei, nangmouh ni na cangkhai awh e teh apipatet ni hai a manu na ou, a na pa na ou a poe hane hno hah, het hateh Cathut koe ka poe e doeh toe tet pawiteh,

⁶ a manu nakunghai, a na pa nakunghai bari ngai hoeh toe na ti awh. Hottelah patuen patuen na tawm awh e phung hoiyah Cathut e kâpoelawk na eknae doeh.

⁷ A lai kathout e taminaw, Isaiah ni nangmouh noe lahoi,

⁸ hete miphunaw teh apâhni hoi na hnai awh teh apâhni hoi na bari a ei a lungthin teh kai hoi ahla.

⁹ Tami e kâpoelawk hoiyah a kâpâtu awh teh, ayawmyin lah na bawk awh toe telah sut a dei e hah a tang tanggak atipouh.

Khinnae

¹⁰ Hattoteh ka kamkhuengnaw hah ama koe a kaw teh, thai awh nateh panuek awh haw.

¹¹ Thung lah ka kâen e ni tami heh khin sak hoeh. Thung lahoi ka tâcawt e hno ni doeh na khin sak awh, atipouh.

¹² A hnukkâbangnaw ni a hnai awh teh atu na dei e lawk heh Farasinaw ni a thai awh navah a lung apout awh tie na panue maw atipouh awh.

¹³ Jisuh ni kalvanlae Apa ni a patûe hoeh e a kung kaawm e pueng hah ka phawk han.

¹⁴ La awm awh nah yawkaw seh. Ahni-mouh teh mitdawnnaw kahrawikung mitdawnnaw doeh. A mit ka dawn reira kâhrawi pawiteh kahni touh hoi tangkom dawk ka bawt roi han doeh atipouh.

¹⁵ Piter ni Cathut e bangnuenae hah kaimouh koevah pâpho haw atipouh navah,

¹⁶ Jisuh ni nangmouh teh atu sittouh lungang laipalah maw na o a rah.

¹⁷ Thung lah kâen e pueng teh von dawk ka cet ni teh alawilah a tâcawt tie heh na panuek awh hoeh rah maw.

¹⁸ Thung lahoi ka tâcawt e hno teh lung dawk hoi ka tâcawt e a tho dawkvah tami hah kakhin sak e hno doeh.

¹⁹ Kahawi hoeh e pouknae, tami theinae, kamsoumhoeh napui tongpa yonnae, napui kahlout hoi yonnae, ayâ e hno parunae, kamsoumhoeh kapanuekkhaikung lah kangduenae, ayâ minhmai mathoe saknae teh lungthung hoi a tâco dawkvah,

²⁰ Tami kakhin sak e hnonaw doeh. Kamsin laipalah rawca canae ni tami khinsak hoeh atipouh.

Kanaan napui e yuemnae

Mrk 7:24-30

²¹ Hathnukkhu Jisuh teh hote hmuen koehoi a kamthaw teh, Taire hoi Sidon kholah a cei.

²² Kanaan napui buet touh teh a tâco teh, Devit Capa kai hah na pahren haw. Ka canu teh kahrai ni puenghoi a rek atipouh eiteh kam touh hai pathung hoeh.

²³ A hnukkâbangnaw ni a hrawi awh teh, hote napui bout ban sak leih. Maimouh hnuk a kâbang teh a hram atipouh awh.

²⁴ Jisuh ni Isarel miphun kahmat e tunaw hloilah alouke miphunnaw onae koe kai hah na patoun hoeh atipouh.

²⁵ Hote napui ni tabo laihoi Bawipa na rungnang ei bout atipouh.

²⁶ Hat toteh, Bawipa ni capa e rawca hah ui poe phung nahoei bout atipouh.

²⁷ Napui ni hai oe, Bawipa, uinaw tie teh kabawt e burameinaw hah ouk a luep phung nahoeimaw bout atipouh toteh,

²⁸ Oe! napui nang teh na yuemnae a len tanggak. Na ngainae patetlah nang dawkw awmseh atipouh navah, a canu teh hmawi a dam.

Tami moikapap dam saknae

²⁹ Jisuh ni hote hmuen koehoi a cei teh, Galilee tui koe a pha toteh, monsom a luen teh a tahung.

³⁰ Tami moikapap ni khokkhem, mitdawn, lawka, kamkhuen e hoi alouke patawnae ka tawn e naw hah a thokhai awh teh a khok koevah a ta awh.

³¹ A patawnae pueng hah a dam sak dawkwah, lawkanaw ni lawk a dei thai, kamkhuennaw ni a dam awh, khokkhemnaw ni lam a cei awh, mitdawnnaw ni a hmu awh e hah ka

kamkhuengnaw ni a hmu awh navah Isarelnaw e Cathut hah a pholen awh.

Tami 4,000 touh rawca a pacanae

Mrk 7:31-37

³² Hattoteh Jisuh ni a hnukkâbangnaw hah a kaw teh, hete taminaw hah ka pahren poun. Hnin thum touh thung canei tawn laipalah kai koe ao awh toe. Lam vah tawn a langvaih, ka ti dawkvah, rawca cat laipalah ceisak hane ka ngainae awm hoeh atipouh.

³³ A hnukkâbangnaw ni, het yit touh e tami kapap e naw ni kaboumlah a ca awh hane rawca hah hi kahrawngum vah kaimouh ni bangtelamaw ka hmu thai awh han atipouh awh.

³⁴ Jisuh ni nangmouh koe vaiyei na yit touh maw kaawm atipouh. Ahnimouh ni vaiyei sari touh hoi tanga youn touh ao bout atipouh awh.

³⁵ Hattoteh tami kamkhuengnaw hah talai dawc tahung sak hanelah kê a poe.

³⁶ Vaiyei sari touh hoi tanganaw hah a la teh lunghawinae lawk a dei hnukkhu, vaiyei hoi tanga hah a raen teh a hnukkâbangnaw hah patuen a poe.

³⁷ Rangpui ni a boum awh toteh, ka cawi e hah a racawng awh navah tangthung sari touh akawi.

³⁸ Ka cat e naw abuemlah napuinaw hoi camonaw e dei laipalah 4,000 touh a pha.

³⁹ Hote taminaw hah a ceisak hnukkhu Magadan kho lah long hoi a cei.

16

Kângairu mitnout a hei awh

Mrk 8:11-21

¹ Farasinaw hoi Sadusinaw a tho awh teh kalvan hoi e mitnout kamnue sak hanlah a kâhei awh teh Bawipa hah a tanouk awh.

² Bawipa ni ouk na dei awh e teh tangmin lah tâmai a rapam teh a paling navah kho kahawi han na ti awh.

³ Amom lah toteh tâmai akawi, bout a paling dawkvah kahlî ka tho han na ti awh. A laikathoutnaw nangmouh ni teh kalvan minhmai hah na kapek panuek awh. A tu e mitnoutnaw hatteh na kapek panuek awh hoeh.

⁴ Tami kahawilah kâsak e catounnaw, noutnae na hei awh navah profet Jonah e mitnoutnae hloilah alouke noutnae bangpatet e haiyah na sak pouh awh mahoeh atipouh teh, ahnimouh onae koehoi alouklah a cei.

Farasi hoi Sadusinaw e ton

⁵ Namran lah a cei awh toteh a hnukkâbangnaw ni vaiyei sin hane hah yout a pahnim awh.

⁶ Jisuh ni Farasinaw hoi Saddusinaw e ton hah kâhruetcuete nateh roun awh, atipouh.

⁷ Maimouh ni vaiyei sin awh hoeh dawkvah hete lawk heh a dei telah a hnukkâbangnaw ni buet touh hoi buet touh a kâpankhai awh.

⁸ Jisuh ni a panue dawkvah, yuemnae dawka tha kayoun e naw, vaiyei na sin awh hoeh e dawkvah na kâpankhai a vaw.

⁹ Vaiyei panga touh hah, tami 5,000 touh ni a ca awh teh tangthung nâyittouh maw kacawi,

vaiyei sari touh hah tami 4,000 touh ni a ca teh, tangthung nâyittouh maw kacawi tie hah,

¹⁰ na pâkuem, na pouk awh laipalah, maw na o awh rah.

¹¹ Farasinaw hoi Saddusinaw e ton hah kâhruetcuwet awh, ka ti navah vaiyei heh ka dei ngai e nahoe hah na thai panuek a laipalah bangtelamaw khuet na o a vaw atipouh.

¹² Hat toreï teh ton e vaiyei hah roun awh tie nahoe hah. Farasinaw hoi Sadusinaw e cangkhai nae hah roun awh, tinae doeh telah a hnukkâbangnaw ni a thai panuek awh.

Jisuh teh Khrih doeh telah Piter ni a kam-pangkhai

Mrk 8:27-29; Luk 9:18-20

¹³ Kaisarea Filippi ram e kho buet touh daw k a pha awh toteh, Jisuh ni Kai heh taminaw ni api na ti a maw telah a hnukkâbangnaw hah a pacei.

¹⁴ Tami tangawn ni Baptisma Jawhan; a tangawn ni Elijah; a tangawn ni Jeremiah, hoeh-pawiteh alouke profet buet buet touh doeh telah atipouh awh.

¹⁵ Nangmouh ni hai Kai hah api na ti a maw telah a pacei.

¹⁶ Simon Piter ni nang teh kahring e Cathut Capa, Khrih doeh atipouh.

¹⁷ Hatnavah Jisuh ni Simon Barjonah, nang teh na yawhawi. Bangkongtetpawiteh hete hno teh thi hoi tak ni nang koe a pâpho e nahoe hah, kalvan kho kaawm e a Pa ni a pâpho pouh e doeh.

¹⁸ Nang koevah ka dei, nang teh Piter doeh. Hete lungsong dawkvah Kaie kawhmoun ka

kangdue sak han. Hot teh duenae longkha ni hai tâ thai mahoe.

¹⁹ Kalvan uknaeram cabinaw teh nang koevah na poe han. Talai van na katek e pueng teh kalvan hai katek lah ao han. Talai van rathap lah kaawm e naw pueng teh kalvan hai rathap lah ao han, telah atipouh.

²⁰ Hahoi, Bawipa ni Kai teh Khrih doeh tie hah api koehai dei hoeh nahanelah a hnukkâbangnaw kâ a poe.

A due hnukkhu bout thaw nahane kong, sut deinae

Mrk 8:31—9:1; Luk 9:22-27

²¹ Hahoi, Jisuh ni Jerusalem ka cei vaiteh kacuenaw, vaihma bawinaw hoi cakathutkungnaw e kut dawk rektapnae moi a khang hnukkhu a thei aw h vaiteh apâthum hnin vah bout a thaw nahane kong hah a hnukkâbangnaw koe a dei pouh.

²² Hatnavah Piter ni Bawipa yue hanelah aloukcalah a kaw teh, nang daw k bawt nahan seh atipouh.

²³ Hahoi, Bawipa ni a kamlang sin teh Piter koe, nang Setan ka hnuk lah kâhnawnh. Nang teh kai hanlah payonnae lah na o atipouh. Bangkongtetpawiteh nang ni Cathut hoi ka kâkuen e hno daw k na lungthin pen laipalah tami hoi kâkuen e hno daw k lung na pen.

Nama e thingpalam hrawm

²⁴ Hattoteh Jisuh ni a hnukkâbangnaw koe api-hai ka hnukkâbang han ka ngai e teh amahoima

kâpahnawt vaiteh, amae thingpalam hrawm hoi ka hnuk kâbang naseh.

²⁵ Bangkongtetpawiteh apihai amae hringnae ka rungngang e teh hringnae a sung han. Kai kecu dawh hringnae ka sung e teh hringnae a hmu han.

²⁶ Tami ni talaivan abuemlah koung ka coe nakunghai muitha hringnae sung pawiteh bangmaw aphu kaawm. A hringnae hah bang hno hoi maw a ratang thai han.

²⁷ Tami Capa teh Apa e bawilenna hoi kalvan-taminaw hoi a tho han. Hattoteh tami pueng ni a tawh e phu a hmu aw h han.

²⁸ Atangcalah na dei pouh aw h. Tami Capa amae uknaeram dawh a kum toteh hi kangdout e tami tangawn duena kâhmo mahoeh rah, atipouh.

17

Jisuh mei kâthungnae

Mrk 9:2-13; Luk 9:28-36

¹ Jisuh ni Piter, Jem, Jem e nawng ha Jawhan tinaw hah, hnin taruk a poung hnukkhu a kaw teh ka rasang e mon dawh soumtinae koe a ceikhai.

² Ahnima hmalah a mei a kâthung pouh. A minhmai teh kanî patetlah a ang teh, a khohna e teh raeng patetlah a pangaw.

³ Mosi hoi Elijah hai a kamnue teh Bawipa hoi lawk a kapan aw h.

⁴ Hatnavah Piter ni Bawipa hete hmuen koe o a nep. Nang hanlah buet touh, Mosi hanlah buet touh, Elijah hanlah buet touh rim kathum touh

hah na ngainae awm pawiteh kaimouh ni ka sak awh han atipouh.

⁵ Hottelah a dei lahun nah ka ang e tâmai ni a ramuk awh teh, het hateh ka pahren e Capa doeh, ahni dawk ka lungkuep tangngak. Ahnie lawk hah tarawi pouh awh, telah tâmai thung hoi lawk a tho.

⁶ A hnukkâbangnaw ni a thai awh navah a taki awh teh a tabo awh.

⁷ Jisuh ni a tho teh ahnimanaw hah kut hoi a tek teh, thaw awh, taket awh hanh telah atipouh.

⁸ Ahnimouh ni a mounng awh teh a khet awh navah, Jisuh hloilah apihai hmawt awh hoeh.

⁹ Monsom hoi a kum a torei teh Jisuh ni tami Capa teh duenae koehoi a thaw hoehroukrak, atu na hmu awh e hno hah api koehai dei awh hanh telah a hnukkâbangnaw hah a kê a poe.

¹⁰ Hattoteh a hnukkâbangnaw ni Elijah hmaloe a tho han telah bangkongmaw cakathutkungnaw ni ati awh, telah a pacei awh.

¹¹ Jisuh ni Elijah teh hmaloe a tho vaiteh bangpueng hah kahawicalah a pathoup han tangngak.

¹² Ka dei e teh Elijah a tho toe. Taminaw ni a panue awh hoeh dawk a ngai awh e pueng patetlah a tak dawk a sak awh toe. Hot patetvanlah tami Capa haiyah hote taminaw kut dawk a khang han atipouh.

¹³ Baptisma kapoekung Jawhan doeh a dei ngai nah tie hah a hnukkâbangnaw ni a thai panuek awh.

Khek ka man e tami a dam sak

Mrk 9:14-28; Luk 9:37-42

¹⁴ Tami ka kamkhuengnaw koe a pha awh toteh tami buet touh ni rek a hnai teh, a khokcuengkhuem teh,

¹⁵ Bawipa ka capa hah pahren nateh runngang haw. Khek a man teh puenghoi a patang toe. Hmai dawkw, tui dawkw voutsout a rawp toe.

¹⁶ Na hnukkâbangnaw koe ka thokhai ei toe, ahnimouh ni hawi sak thai awh hoeh atipouh.

¹⁷ Jisuh ni yuemnae ka tawn hoeh e naw, lung kalen e phun, nangmouh hoi cungtalah nâ totouh maw ka o han rah. Nangmouh hah nâ totouh maw na panguep awh han rah. Camo hah hi thokhai awh, atipouh.

¹⁸ Jisuh ni kahrai hah a yue toteh, kahrai teh hote camo thung hoi a tâco. Camo teh hmawi a dam.

¹⁹ Hattoteh a hnukkâbangnaw ni soumtinae koe, Jisuh a hnai awh teh, kaimouh ni teh hote kahrai hah bangkongmaw ka pâlei thai awh hoeh vaw atipouh awh.

²⁰ Jisuh ni, nangmouh teh yuemnae na tawn awh hoeh dawkvah, na pâlei thai awh hoeh. Atangcalah na dei pouh awh, nangmouh ni antam mu tittouh mah yuemnae na tawn awh pawiteh, hote mon hah hmuen koehoi kâtakhoe na tetpawiteh, hmuen koehoi a kâtakhoe han. Yuemnae na tawn awh pawiteh na tithai awh hoeh e awm mahoe.

²¹ Hatei, ratoumnae, rawcahainae laipalah hot patet e muithakathout tâcawt thai hoeh atipouh.

Jisuh ni a due nahane kong bout a dei

²² Jisuh ni Galilee ram ao awh lahun nah, tami Capa teh taminaw e kut dawк pahnawt nahane tueng a hnai toe.

²³ Ahnimouh ni a thei awh han. Apâthum hnin bout a thaw han telah a hnukkâbangnaw koe a dei pouh. Ahnimouh teh a lung puenghoi a mathoe awh.

Bawkim tamuk cawngnae

²⁴ Kapernuam kho dawк a pha toteh, bawkim dawк tamuk kacawngkungnaw Piter koe a tho awh teh, nangmae Bawipa ni cawng e tamuk poe hoeh maw atipouh awh. Hatnavah Piter ni a poe telah atipouh.

²⁵ Piter ni imthung a kâen toteh, Jisuh ni Piter bangtelamaw na pouk. Talai bawinaw ni na maw tamuk a cawng awh. Ama e Capa koe maw a cawng. Ayâ koe maw a cawng telah a pacei.

²⁶ Piter ni ayâ koe doeh a cawng atipouh navah, Jisuh ni hat pawiteh, Capa teh a hlout. Hatei, hotnaw ni maimouh kecu dawк a payon awh hoeh nahanlah talî koe cet nateh hradang hah sawn haw.

²⁷ A pasuek na man e tanga hah lat nateh, a pahni baw pouh. Shekel tangka buet touh na hmu han. Hote tangka hah lat nateh kai hane hoi nama hane ahnimouh koe poe atipouh.

18

Apimaw ka talue poung
Mrk 9:33-37; Luk 9:40-48

¹ Hatnavah a hnukkâbangnaw ni Jisuh koe a tho awh teh, kalvan uknaeram dawkvah apimaw kalenpoung han telah a pacei awh.

² Jisuh ni camo ca buet touh a kaw teh a hnukkâbangnaw rahak vah a ta.

³ Atangcalah na dei pouh awh. Nangmouh ni na kâthung awh teh camo patetlah na coung awh hoehpawiteh kalvan uknaeram dawknâtuek hai na phat awh mahoe.

⁴ Hatdawkvah apipatet hai hete camo patetlah kârahnoum e teh kalvan uknaeram dawknalenpoung lah ao han.

⁵ Apipatethai ka min lahoi camo buetbuet touh ka dâw e teh, kai ka dâw e lah ao toe.

⁶ Kai na ka yuem e hete camo buetbuet touh hah ka yon sak e teh lahuen dawktalungsum awi laihoi kadung poung e talî dawkpabawtpawiteh ahni hanlah bet ahawi.

⁷ Sak payonnae dawkvah talaivan taminaw teh a yawthoe awh. Sak payonnae kaawm han. Hatei, payonnae ka sak sak e teh a yawthoe.

⁸ Na kut khok ni na payon sak pawiteh kut khok hah tâtueng. Kut khok kuep laihoi ayungyoe hmai dawka yungyoe na bo hlah teh kut khok kuep laipalah hringnae dawknakâen pawiteh bet ahawi.

⁹ Na mit ni na payon sak pawiteh na mit hah cawngkhawih. Na mit kahni touh hoi hell hmai dawknabo hlah teh mit vang dueng hoi hringnae dawknakâen pawiteh bet ahawi.

*Tu kahmat bangnuenae
Luk 15:4-7*

¹⁰ Nangmouh ni hete camo buetbuet touh hah na hnep awh hoeh nahanlah kâhruetcuete awh. Na dei pouh awh. Ahnimae kalvantaminaw ni kalvan kho vah kaawm e Pa e minhmai hah pou a hmu awh toe.

¹¹ Hothloilah, tami Capa teh kahmat e naw rungngang hanlah doeh a tho.

¹² Bangtelamaw na pouk awh. Tu 100 touh ka tawn e ni tu buet touh lam payon lah kahmat pawiteh, ahni ni tu 99 touh e hah mon vah cetakhai vaiteh, lam ka payon ni teh kahmat e tu buet touh hah tawng mahoe na maw.

¹³ Atangcalah na dei pouh awh. A hmu toteh lam ka payon hoeh ni teh kahmat hoeh e 99 touh hlakvah kahmat e buet touh dawkhoe a konawm.

¹⁴ Hot patetvanlah kalvan kho kaawm e nangmae na Pa ni hete camo buet touh boehai rawk sak hanlah a ngainae awh hoeh.

Kawhmoun thung kâhruetcuete poenae

¹⁵ Na hmaunawngaha ni nang dawkhoe a sakpayon e awh pawiteh cet sin nateh namamouh roi dueng a yonnae pâpho pouh nateh yue. Na lawk hah tarawi pawiteh na hmaunawngaha teh na hmu toe.

¹⁶ Na lawk hah tarawi hoehpawiteh tami kahni kathum touh kapanuekkhaikung lah kaw ei. Hahoi, kaawm e lawk pueng caksak awh.

¹⁷ Hotnaw e lawk hah tarawi hoehpawiteh kawhmoun koe dei pouh. Kawhmoun e lawk hah ngai hoehpawiteh Jentelnaw hoi tamuk kacawngnaw patetlah pouk awh.

¹⁸ Atangcalah na dei pouh awh, talai van na katek awh e pueng teh kalvan kho hai katek lah ao han. Talai van rathap e pueng teh kalvan kho hai rathap lah ao han.

¹⁹ Bout ka dei e teh, talai van vah nangmouh thung dawk tami kahni touh ni lungkânging lahoi na ratoum awh pawiteh, na ratoum e pueng hah kalvan kho kaawm e a Pa ni na poe han.

²⁰ Bangkongtetpawiteh, bangpatet e hmuen koehai ka min lahoi tami kahni kathum touh kamkhueng pawiteh ahnimaee lungui kai ka o atipouh.

Ngaithoum hoeh e san

²¹ Hatnavah Jisuh hah Piter ni rek a hnai teh, Bawipa hmaunawngaha ni kai dawk a sakpayon e hah avai na yit touh maw ka ngaithoum han telah a pacei teh, Jisuh ni vai sari touh na ngaithoum han ka tet hoeh.

²² Avai rui sari let sari totouh na ngaithoum han ka ti.

²³ Hatdawkvah kalvan uknaeram teh, amae sannaw hah tangka lai ka dei pouh e siang-pahrang buet touh hoi a kâvan.

²⁴ Cayin koug to hoiyah tangka a thong cum touh laiba ka tawn e san buet touh hah a hmalah a thokhai awh.

²⁵ Ahni ni laiba patho nahan a tawn hoeh dawkvah ama hoi a yucanaw a tawn e hnonaw pueng yawt nateh laiba patho naseh telah a bawi ni kâ a poe.

²⁶ Hote san ni a tabo teh Bawipa, na pahren ei, laiba kaawm e pueng hah na patho han atipouh navah,

²⁷ A bawipa ni a pahren teh laiba kaawm e pueng hah a raphoe pouh teh a hlout sak.

²⁸ Hote san teh a cei navah ama koe tangka 100 touh ka ba e san van hai a hmu toteh, tangka na patho leih ti teh a lahuen dawk a kara pouh.

²⁹ Hote san van ni hai a khok rahim a tabo pouh teh, kai hah na pahren ei, laiba kaawm e pueng hah na patho han doeh telah a kâhei ei nakunghai,

³⁰ tha laipalah laiba a patho hoehroukrak thongim thung vah a paung.

³¹ Hottelah e hno hah alouke sannaw ni a hmu aw h navah, a lung puenghoi a pataw aw h teh, a sakyoe e pueng hah amamae bawipa koe a cei aw h teh a dei pouh aw h.

³² Hat toteh, a bawipa ni hote san hah a kaw teh, Oe! san kathout, nang ni na kâhei dawkvah na laiba pueng hah ka raphoe teh na hlout sak.

³³ Kai ni na pahren e patetlah nang ni na san hui hah, na pahren kaw i nahoehmaw atipouh.

³⁴ A bawipa teh a lungkhuek dawkvah a laiba pueng koug a patho hoehroukrak rektapkung-naw kut daw k patang palai sak hanlah a poe.

³⁵ Nangmouh haiyah hmaunawng ha reira hah lungthin katang hoi na ngaithoum aw h hoeh-pawitech kalvanlae Apa ni hot patetvanlah nang-mouh lathueng vah a sak van han.

Kâ kapeknae
Mrk 10:1-12

¹ Jisuh ni, hete lawknaw be a dei hnukkhu, Galilee ram a ceitakhai teh Jordan tui namran, Judea ram lah a cei.

² Taminaw ni a hnuk a kâbang awah, hote hmuen koe kapatawnaw a dam sak.

³ Farasinaw ni atengvah a tho awah teh, sak payonnae pueng dawkh hoi tami ni amae yu hah ama kawi maw titeh a tanouk awah.

⁴ Bawipa ni apuengcue vah sak lah kaawm e teh tongpa hoi napui kahni touh dueng doeh sak lah kaawm.

⁵ Hote dawkvah tongpa ni a na pa hoi a manu a ceitakhai teh, a yu hoi a kâpahlawm dawkvah hote kahni touh roi teh buet touh lah ao han telah Cakathoung dawkh a dei e hah na touk awah boihoeh maw.

⁶ Hatdawkvah yuvâ roi teh kahni touh nahoe, buet touh doeh. Cathut ni buet touh lah a pahlawm tangcoung e hno hateh tami ni kapek hanh naseh atipouh.

⁷ Farasinaw ni hottelah pawiteh manae ca poe hoi ma hanlah bangkong Mosi ni kâ a poe atipouh awah.

⁸ Nangmae lungthin a pata dawkvah yu hoi kama hanlah Mosi ni a dei. Apuengcue teh hottelah na hoe.

⁹ Na dei pouh awah, uicuknae laipalah a yu heh a ma teh alouke napui ka lat e tami teh amae a yu koe a yon. Ma lah kaawm e napui hah ka lat e tami haiyah ayâ yu koe a yon atipouh.

¹⁰ A hnukkâbangnaw ni yuvâ dawh hettelah awm pawiteh yu lat laipalah o e heh ahawi atipouh.

¹¹ Bawipa ni hote lawk hah tami pueng ni koug dâw a mahoe. Dâw thinae kâ kahmawt e ni dueng doeh a dâw thai.

¹² Tami tangawn teh a manu von thung hoi a bokhai e lah a tho. A tangawn teh yu la hoe hanelah ayâ ni cingthui e lah ao. Atangawn teh kalvan uknaeram kecu dawh yu lat laipalah ao. Hete lawk heh ka dâw thai e teh dâw naseh atipouh.

Camonaw yawhawi a poe

Mrk 10:13-16; Luk 18:15-17

¹³ Hatnavah camonaw lathueng vah kut toung sin hoi ratoum pouh hanlah atengvah camonaw hah a thokhai aw h e hah a hnukkâbangnaw ni a yue aw h.

¹⁴ Jisuh ni, hote camonaw hah thokhai a ngoun seh kai koe a tho aw h hoe h nahanlah ngang aw h hanh. Kalvan uknaeram teh hot patet e camonaw e ram doeh atipouh teh,

¹⁵ Camonaw e van vah kut a toung hnukkhu alouklah a cei.

Ka tangreng e thoundoun

Mrk 10:17-30; Luk 18:18-30

¹⁶ Hathnukkhu, tami buet touh a tho teh, Bawi kahawi, yungyoe hringnae coe thai nahanlah bangpatet e hnokahawi maw ka sak han telah a pacei.

17 Jisuh ni Bangkok, kai hah Bawi kahawi na tipouh. Cathut buet touh dueng doeh kahawi. Hringnae dawk kâen na ngai pawiteh kâpoelawknaw hah tarawi atipouh.

18 Bangpatet e, kâlawnaw maw ka tarawi han kawi telah bout a pacei toteh, tami thet hanh, uicuk hanh, ayâ e hno parawt hanh, laithoe kampanghai hanh,

19 manu na pa barih, ma hoi kâkuen e tami hah nama patetlah lungpataw telah atipouh.

20 Hote tami ni, hote kâlawnaw pueng teh kanawca hoi koung ka tarawi toe. Bangmaw sak hane a panki rah atipouh.

21 Kuepnae koe pha na ngai pawiteh cet nateh na hnopai pueng hah yawt nateh mathoemara pueng hah kabawm. Hottelah na sak pawiteh kalvan kho vah hno na tawn han. Hathnukku ka hnukkâbang haw, telah atipouh.

22 Hote tami teh hnopai moi ka tawn e lah ao dawkvah, hote lawk hah a thai navah lung-mathoe laihoi a ban.

Tangreng hoi Kalvan uknae ram

23 Bawi Jisuh ni atangcalah na dei pouh awh, tangka moi ka tawn e ni teh kalvan uknaeram thung a kâen han a ru.

24 Bout na dei pouh awh. Bawi tangreng ni Cathut uknaeram thung daw k a kâen hlak teh Kalauk ni phuengvang khu daw k a kâen heh bet a yawi. Telah a hnukkâbangnaw koe atipouh.

25 Ahnimouh ni a thai awh nah a kângairu awh dawkvah, hat pawiteh apimaw hloutnae daw k ka phat thai han atipouh awh.

²⁶ Jisuh ni ahnimanaw hah a khet teh, het heh tami hanlah teh coung thai hoeh, hatei, Cathut hanelah teh, a cawngca e hnopueng a coung thai atipouh.

²⁷ Hattoteh Piter ni, kaimouh ni teh ka tawn awh e pueng ceitakhai hoi na hnuk ka kâbang awh toe. Bangpatet e tawkphu maw ka coe awh han atipouh.

²⁸ Jisuh ni atangcalah na dei pouh awh. A cawngca e hnopueng a katha lah pathou-
nae tueng dawkvah tami Capa ni a bawilen-
nae bawitungkhung dawkvah a tahung toteh,
ka hnukkâbang e nangmouh teh tungkhung
hlaikahni touh dawkvah tahung laihoi Isarel mi-
phun hlaikahni touh hah lawk na ceng awh han.

²⁹ Apipatethai ka min kecu dawkvah imlaw, hmau-
nawngaha, manu napa, yucanaw buetbuet touh
ka cettakhai e teh a let cum touh a coe vaiteh a
yungyoe hringnae râw hah a pang han.

³⁰ Hnukkatengnaw ni hma ahman vaiteh
hmakahmannaw ni hnuk a teng awh han.

20

*Misur takha thung thaw katawnaw bangnue-
nae*

¹ Bangnuenae lah, kalvan uknaeram teh misur
takha dawkvah thaw tawk hanelah, amom vah
ka tâcawt ni teh thawkatawkung ka tawng e
imkung hoi a kâvan.

² Katawnaw hoi haiyah lawk a kâcat awh teh,
hnin touh e tawk e hah tangka phekkouh pouh
hanlah misur takha koe a patoun.

³ Amom suimilam tako nah bout a tâco teh, alouke taminaw ni hno yonae koe thaw tawk laipalah sut a kangdue aw hah a hmu dawkvah,

⁴ nangmouh hai misur takha koe cet aw h, kâki lah na poe aw h han atipouh. Ahnimouh ni a cei aw h.

⁵ Hahoi, suimilam hlaikahni hoi tangmin suimilam kathum nah haiyah, a tâco teh ahmaloe e patetlah bout a coun.

⁶ Tangminlah suimilam panga na haiyah bout a tâco boteh, alouke taminaw sut a kangdue aw h e hah a hmu navah, thaw tawk laipalah hete hmuen koe bangkongmaw sut na kangdue aw h, atipouh navah;

⁷ Ahnimouh ni apinihai na coun aw h hoeh atipouh aw h toteh, nangmouh hai kaie misur takha koe cet aw h. Kâki lah na poe aw h han atipouh.

⁸ Tangmin a pha toteh misur takha katawnkung ni amae tangka ka kuenkung hah a kaw teh, thaw katawnkaw heh koug pâkhueng nateh a hnukteng ka taw k e koehoi ahmaloe ka taw k e totouh kutphu poe leih atipouh.

⁹ Hatdawkvah tangminlah suimilam panganae koehoi katawnkaw ni tangka phek touh a dâw aw h.

¹⁰ Ahmaloe katawnkaw ni teh kapap hmu han doeh telah pouknae hoi a tho aw h eiteh, tangka phek touh a dâw aw h.

¹¹ Hottelah be a dâw a hnukkhu imkung koe a phuenang aw h.

¹² A hnukkhu e ka kêennaw teh suimilam buet

touh dueng a tawk awh ei, kanî rui rui khumbei khang laihoi ka tawk e kaimouh hoi reikâvan lah na poe atipouh awh.

¹³ Imkung ni hai ka hui, nang dawk kam-soumhoeh hno ka sak hoeh. Tangka phek touh hoi nouh kai hoi lawk kâdaw roi ei, nama e hno hah lat nateh cet leih.

¹⁴ A hnukkhu kâen e naw hai nang hoi reikâvan lah poe hanlah ka ngainae ao.

¹⁵ Kai ni kama e hno hah ka sak ngai e patetlah ka sak mahoe na maw. Kai kahawi e heh nang ni na ut maw atipouh.

¹⁶ Hot patetlah hnukteng e ni hma ahman han. Hma kahman e ni hnuk a teng han. A kaw e tami apap ei nakunghai a rawi e tami ayoun atipouh.

*Jisuh ni a due nahan apâthum lah bout a dei
Mrk 10:32-34; Luk 18:31-37*

¹⁷ Jisuh ni Jerusalem lah a cei nah lam vah, a hnukkâbang hlaikahni touh hah soumatinae koe a kaw teh,

¹⁸ maimouh teh atuvah Jerusalem kho lah cei awh. Tami Capa teh vaihma bawinaw hoi cakathutkungnaw e kut daw na poe awh han. Ahnimouh ni a due hanlah ao telah yon na pen awh han.

¹⁹ Tami Capa hah panuikhainae, hemnae, thingpalam daw het sak hanlah Jentelnaw kut daw a poe awh han. Apâthum hnin vah bout ka thaw han atipouh.

*A manu ni a hei pouh
Mrk 10:35-45*

²⁰ Hatnavah Zebedee e a canaw e a manu ni a capanaw hoi Bawipa koe a hnai awh teh, a baw

awh hnukkhu hno hah a hei awh. Bawipa ni bangpatet e hno maw na ngai telah a pacei.

²¹ Ahni nihaiyah hete ka capa roi hah na ram thungvah aranglah buet touh avoilah buet touh tahung thainae kâ poe haw atipouh.

²² Jisuh ni a canaw koe, na hei e hah na panuek awh hoeh atipouh. Ka nei han kawî manang na nei thai han maw. Ka khang hane Baptisma hah na khang thai awh han maw telah a pacei navah, kaimouh roi ni ka sak thai roi han atipouh roi dawkvah,

²³ Kaie manang teh na nei thai yawkaw han. Ka khang hane Baptisma haiyah na khang thai yawkaw awh han. Hatei, kaie avoilah aranglah tahung thainae kâ teh Pa ni a rakueng pouh tangcoung e naw koe dueng doeh poe lah awm ti atipouh.

²⁴ Alouke a hnukkâbang hra touh ni a thai awh toteh hote hmaunawngaha roi koe a lungkhuek awh.

²⁵ Jisuh ni a kaw awh teh na panue awh e patetlah Jentel bawinaw teh kâtawnnae a tawn awh.

²⁶ Sak thainae kalen ka tawn e lah ao awh.

²⁷ Nangmouh teh hottelah sak awh hanh. Tami Capa teh amae thaw hah ayâ patoun hanlah tho hoeh.

²⁸ Ayâ e thaw tawk hanlah, tami kapap ratang hanlah a hringnae poe hanlah a tho dawkvah, hot patetlah nangmouh thung dawk kalen lah o ka ngai e teh nangmae thaw katawkkung lah awm naseh. Nangmouh thung dawk a lû lah tawk han ka ngai e teh nangmae san lah awm

naseh atipouh.

Jisuh ni mit ka dawn a dam sak

Mrk 10:46-52; Luk 18:35-43

²⁹ Jeriko kho hoi a tâco aw h navah tami moikapap ni a hnuk a kâbang aw h.

³⁰ Lam teng sut ka tahung e mitdawn kahni touh roi ni Jisuh a tho tie a thai roi nah, Devit Capa Jisuh, kaimouh roi hah na pahren ei telah a hram roi.

³¹ Taminaw ni duem ao roi nahanlah kâhruetcuetae a poe aw h eiteh, Devit Capa Bawipa kaimouh roi hah na pahren ei telah hoehoe a hram roi.

³² Jisuh ni a kangdue teh ahnimouh roi hah a kaw. Bangmaw sak sak hane na ngai roi atipouh.

³³ Bawipa, kaimouh roi e ka mit hah ang sak haw atipouh roi.

³⁴ Jisuh ni ahnimouh roi hah a pahren dawkvah ahnimouh roi e mit hah a kut hoi a tek pouh. Hat nah tahma vah a mit hmawi a ang roi dawkvah a hnuk a kâbang roi.

21

Jerusalem vah bawilenna hoi a kâen

Mrk 11:1-10; Luk 19:29-38; Jhn 12:12-25

¹ Jerusalem kho teng Olive Mon rahim kaawm e Bethphage kho a pha aw h navah Jisuh ni a hnukkâbang kahni touh hmalah a patoun.

² Hmalae kho daw k cet roi nateh hawvah sut pâkhi e Lamanu hoi a ca hah na hmu roi han. Arui rasu roi nateh kai koe hrawi roi haw.

³ Tami buetbuet touh ni bangkongmaw na rasu tetpawiteh, Bawipa ni a panki tet pouh roi.

Hottelah na tet pouh roi pawiteh ahni ni tang na poe han telah lawk a thui.

⁴ Hete hno pueng hateh profetnaw ni sut a dei e lawk a kuep nahane doeh.

⁵ Zion canu teh dei pouh. Kenhaw! na siangpahrang teh nang koe a tho lahun, Ama teh tami nuen kahawicalah ao teh La manu hoi Laca a kâcui.

⁶ Jisuh ni kâ a poe e patetlah a hnukkâbang roi ni hmalah a cei roi teh a sak roi.

⁷ Lamanu hoi a ca hah a hrawi roi teh, La van vah amamae hni a phai pouh teh Bawipa ni, a kâcui.

⁸ Touk thai hoeh e tami moikapap ni amamae hninaw hah lam dawk a phai awh. Atangawnaw ni thingbunaw a bouk awh teh lam dawk a phai awh.

⁹ A hnuk lah, a hmalah ka cet e taminaw ni Devit Capa koevah Hosanna kahring Cathut min lahoi ka tho e teh yawhawinae awm lawiseh. Kalvan kadeng lah Hosanna telah a hram awh.

¹⁰ Jerusalem kho thung a kâen navah kho thung abuemlah a puen awh teh hete tami heh apimaw telah a kâpacei awh.

¹¹ Ka kamkhueng e taminaw ni, het hateh Galilee ram Nazareth kho e profet Jisuh doeh atipouh awh.

*Bawkim teh ratoumnae im
Mrk 11:15-18; Luk 12:45-47*

¹² Jisuh ni Cathut e bawkim thung a kâen teh, bawkim thung hno kayawtnaw hoi ka ran e naw hah a hrek, tangka kathungnaw e caboinaw hoi

âbakhu kayawtnaw e tungkhungnaw hai koung a tanawt pouh.

¹³ Cakathoung dawkvah ka im teh ratoumnae im telah a kaw awh han ati e, hote im hah nangmouh ni dingca im lah na sak awh, atipouh.

Camonaw Jisuh ni a oup

¹⁴ Hatnavah, mitdawnnaw hoi a khokkhemnaw ni bawkim ama koevah a tho awh teh ahnimae patawpanatnae pueng a dam sak pouh.

¹⁵ Jisuh ni kângairu hno a sak e naw hoi camonaw ni hai bawkim vah Devit Capa teh Hosanna awmseh telah a hram awh e lawk hah vaihma bawinaw hoi cakathutkungnaw ni a thai awh navah a lungkhuek awh.

¹⁶ Hetnaw ni bangtelamaw a dei awh, tie hah na thai ou telah Jisuh hah a pacei awh. Jisuh ni oe, ka thai, sanu kanetnaw e pahni daw k hoi Bawipa pholenna hah ka rakueng tie lawk hah vai touh boehai na touk boi awh hoeh maw atipouh.

¹⁷ Hattoteh ahnimanaw hah Bethani kho lah a ceitakhai teh hote karum hah aloum sak.

A paw ka paw hoeh e thaibunglung

Mrk 11:20-26

¹⁸ Amom lah khopui koe bout a ban navah a von a hlam.

¹⁹ Lam teng vah a hna dueng kanaw e thaibunglung kung buet touh hah a hmu. A kung koe a cei sin navah a paw banghai ao hoeh daw k atu hoi nâtuék hai nang daw k a paw paw sak hanh lawih atipouh. Hote thaibunglung kung teh tang a ke.

²⁰ A hnukkâbangnaw ni a hmu aw h dawkvah, thaibunglung kung ni tang a ke toe telah kângairu hoi a dei aw h.

²¹ Jisuh ni, Atangcalah na dei pouh aw h. Nangmouh ni oupvoutnae kaawm hoeh e yuemnae na tawn aw h pawiteh, thaibunglung kung daw k sak e patetlah na sak thai a hloilah, hote mon patenghai a onae hmuen koehoi kampuen nateh tuipei daw k baw t haw na tet pouh pawiteh, na tie patetlah kaawm han.

²² Yuemnae na tawn pawiteh, ratoum laihoi na hei aw h e hno pueng na hmu aw h han atipouh.

Jisuh kâtaw nnae

Mrk 11:27-33; Luk 20:27-40

²³ Bawkim daw k bout a kâen teh a cangkhai lahun nah vaihma bawinaw hoi kacuenaw ni a tho aw h teh, na e kâtaw nnae lahoi maw het patet e hnonaw hah na sak, apini maw hete kâtaw nnae na poe, telah a pacei aw h.

²⁴ Jisuh ni buet touh na pacei a van han, na dei thai aw h pawiteh doeh hete hnonaw hah na e kâtaw nnae lahoi maw ka sak tie hah ka dei van han.

²⁵ Jawhan e Baptisma heh nâ lahoi e maw. Kalvan koehoi e maw, tami koehoi e maw telah a pacei. Hatnavah amamouh hoi amamouh a kâpacei aw h teh, Kalvan koehoi tet pouh pawiteh, nangmouh ni Jawhan hah bangkongmaw na yuem aw h hoeh telah bout na pacei han.

²⁶ Tami koehoi tet pouh pawiteh tamimaya taki bout a tho, Jawhan hah tami pueng ni profet patetlah a pouk aw h dawkvah, ati aw h.

²⁷ Hatdawkvah Jisuh koe, ka panuek awh hoeh atipouh awh. Jisuh ni hai hot patetvanlah hete hnotithainae hah apie kâawnae lahoi maw ka sak tie hah ka dei van mahoe.

Capa kahni touh hoi bangnueae

²⁸ Bangtelamaw na pouk awh. Tami buet touh ni capa kahni touh a tawn. Kacue koevah a cei teh, ka capa, sahnin kaie misur takha dawc cet nateh thaw tawc loe atipouh.

²⁹ A capa ni ka cet mahoe atipouh. Hatei, a hnukkhu vah pan a kângai teh bout a cei.

³⁰ A na pa ni kanaw e capa koe a cei teh ahmaloe e patetlah bout a dei pouh. Oe! Ka cei han bawipa, atipouh eiteh cet hoeh.

³¹ Hote capa kahni touh roi dawc api hah maw a na pa ngainae ka sak telah a pacei. Capa kacue e ni atipouh awh. Jisuh ni, atangcalah na dei pouh awh. Tamuk kacawngnaw hoi a tak kâyawtnaw ni nangmouh hlakvah Cathut uknaeram dawc a kâen awh.

³² Jawhan ni lannae lahoi nangmouh koe a tho eiteh nangmouh ni ama na tang awh hoeh. Tamuk kacawngnaw hoi a tak kâyawtnaw ni a yuem awh. Hote hah na hmu a ei teh na lungkâhung awh hoeh, yuemnae na tawn awh hoeh.

Misur takha katawnkung bangnueae

Mrk 12:1-12; Luk 20:1-19

³³ Bangnueae lawc alouke heh thai awh haw. Imkung buet touh ni misur takha buet touh a tawn. Khoup a tumdum teh, misur katinnae tangkom a tai. Imrasang buet touh a sak.

Takhakatawkkungnaw koe a hlai sak teh alouke ram daw koe a cei.

³⁴ A paw tue a pha toteh, a paw khi sak hanlah a sannaw hah takhakatawkkungnaw onae koe a patoun.

³⁵ Hahoi takhakatawkkungnaw ni a sannaw hah a man awh teh buet touh hah a hem awh. Buet touh hah a thei awh. Buet touh hah talung hoi a dei awh.

³⁶ Ahmaloe e hlak kapap lah takha katawnkung ni bout a patoun. Takha ka ring e naw ni ahmaloe e patetlah bout ati awh.

³⁷ A hnukteng vah takha katawnkung ni, hotnaw ni ka capa hah a bari awh han doeh ati dawkvah, amae capa hah a patoun.

³⁸ Takhakatawkkungnaw ni capa hah a hmu awh toteh het hateh râw kacoekung doeh. Tho awh, thei awh vaiteh, a râw hnouaw hah lat a sei telah a kapan awh teh,

³⁹ Takha katawnkung e Capa hah a man awh teh takha alawilah a thei awh.

⁴⁰ Takha katawnkung, a tho toteh, hote takhakatawkkungnaw hah bangtelamaw ati han telah a pacei.

⁴¹ Tamimaya ni hote tami kahawihoehnaw hah, ka patawpoung lah a raphoe vaiteh, a paw paw tue nah a paw ka poe hanelah, alouke takhakatawkkungnaw a hlai sak han atipouh awh.

⁴² Jisuh ni im kasaknaw ni a hnoun awh e talung ni im takin a rasang poungnae koe bout a pha. Hot hateh kahring Cathut ni a sak e doeh. Maimae mithmu hai kângairu hanlah ao tie lawk

hah Cakathoung dawk na touk boi awh hoeh maw.

⁴³ Hatdawkvah na dei pouh awh. Cathut uknaeram hah nangmouh koehoi lat vaiteh, ram e a paw kapaw hane naw koevah poe lah kaawm han.

⁴⁴ Apipatethai hote talung van kabawt e teh ka rek han. Apipatethai a van vah hote talung ni a bosin e teh vitkatip lah ao han atipouh.

⁴⁵ Hote bangnuenae hah vaihma bawinaw hoi Farasinaw ni a thai awh navah kaimouh doeh na dei sin nah tie hah a panue awh.

⁴⁶ Bawipa man hanlah a tawng awh ei, tami-maya hah a taki awh, ahnimouh ni profet patetlah khak a pouk awh dawkvah.

22

Yu paluennae pawl bangnuenae

Luk 14:16-24

¹ Jisuh ni kamkhuengnaw koe, bangnuenae lawk bout a dei pouh.

² Kalvan uknaeram teh siangpahrang buet touh ni, a capa hanlah yu paluennae ka sak pouh e hoi a kâvan.

³ Yu paluennae buven hanlah a sannaw hah, a patoun teh a coun tangcoung e naw, akawsak ei teh ahnimouh ni tho laipalah ao awh.

⁴ Alouke a sannaw hah bout a patoun teh ka coun tangcoung e naw koevah hettelah dei pouh awh. Buven hane kawl teh coungkacoe koug kalawng toe. Maito hoi alouke saring kathâw kathâwnaw hai ka thei teh hnopai pueng teh

atangcounghalah ao toe. Yu paluennae koe tho a leih tet pouh awh atipouh.

⁵ Hatei, ahnimouh ni banglahai pouk a laipalah a tangawn ni law a ceitakhai awh, a tangawn ni hno yonae koe a ceitakhai awh.

⁶ Kaawm rae naw ni a sannaw hah a man awh teh a rektap awh, a thei awh.

⁷ Hote siangpahrang ni a thai navah a lungkhuek, amae ransanaw a patoun teh a tuk sak dawkvah tami ka thet e hotnaw hah koug a thei sak. Ahnimae kho hai hmai a sawi pouh awh.

⁸ Hathnukkhu siangpahrang ni amae a sannaw hah a kaw teh kaie yu paluennae bu teh coungek-lawng lah ao. Ka coun e naw ni a kamcu awh hoeh dawkvah,

⁹ cet awh nateh lamsalun, lamcawngket koe na hmu awh e pueng hah yu paluennae buven hanlah kaw awh nateh coun awh, atipouh.

¹⁰ A sannaw ni hai lam tangkuem dawkh a cei awh teh tami kahawi, kahawihoe, a hmu awh e pueng hah a pâkhueng awh toteh yu paluennae bu hah kakawi lah a ven awh.

¹¹ Siangpahrang ni ka tho e naw khet hanlah a kâen navah, Yu paluennae khohna ka kho hoeh e tami buet touh a hmu.

¹² Ka hui, yu paluennae khohna laipalah bangkongmaw na kâen, atipouh. Ahni ni lawk tho thai laipalah ao.

¹³ Hattoteh siangpahrang ni a sannaw koe, ahnie a kutkhok katek awh nateh khuika hâ katanae, alawilah hmonae koe tâkhawng awh.

¹⁴ Hot patetvanlah, ka kaw e apap eiteh ka rawi e a youn ca atipouh.

*Cathut hoi Sizar**Mrk 12:13-17; Luk 20:20-26*

¹⁵ Hattoteh Farasinaw a tâco awh. Bangtelah hoi maw a lawk dei e lahoi maimouh ni a yon man thai awh han titeh a kâdei awh.

¹⁶ Ama e hnukkâbangnaw hoi Herod e hnukkâbangnaw hah a patoun awh teh, Bawipa, nang teh lawkkam na cak. Apihai na taket hoeh, apie minhmai hai na khen laipalah Cathut e lamthung lawkkatang hah na pâtu tie hah ka panue awh.

¹⁷ Hatdawkvah bangtelamaw na pouk. Sizar koe tamuk poe kawi maw, poe hoeh han kawi maw, na dei a pouh haw, telah a pacei awh.

¹⁸ Jisuh ni ahnimae hawihoehnae hah a panue dawkvah, a lai kathoutnaw, bangdawkmaw kai heh na tanouk cak awh.

¹⁹ Tamuk tangka buet touh ma na patue awh, atipouh teh rahum tangka phek touh a sin pouh awh.

²⁰ Hete mei, hete a ka pâphonae heh apie maw telah a pacei.

²¹ Sizar e mei, Sizar e ka pâphonae atipouh awh. Jisuh ni Sizar e hno teh Sizar koe poe awh. Cathut e hno teh Cathut poe awh, atipouh.

²² Hote lawknaw hah a thai awh navah, a kângairu awh teh alouklah a cei awh.

*Sadusinaw hoi boutthawnae**Mrk 12:18-27; Luk 20:27-40*

²³ Hat hnin vah bout thaw hringnae awm hoeh ka tet e Sadusinaw ateng vah a tho awh teh a pacei awh.

²⁴ Saya, Mosi nihaiyah tongpa teh ca sak laipalah dout pawitech catoun a pout hoeh nahanlah a nawngha ni hote napui hah a yu lah a la han telah a dei.

²⁵ Kaimouh thung dawk hmaunawngha sari touh kaawm e ao. Apasueke ni a yu a la teh ca khe laipalah a due dawkvah a yu hah a nawngha hanlah a ceitakhai pouh.

²⁶ Hot patetvanlah buet touh hnukkhu buet touh, hmaunawngha sari touh ni hote napui hoi ao awh hnukkhu a due awh.

²⁷ A hnukteng vah hote napui hai a due van.

²⁸ Hottelah ao dawkvah boutthawnae hnin dawk teh hote napui hah hmaunawngha sari touh thung dawk apie yu lah maw ao han. Ahnimouh ni be bout a yu na awh, telah atipouh awh.

²⁹ Jisuh ni, nangmouh teh Ca Kathoung lawk hah na thai panuek awh hoeh, Cathut e bahu hai na panue awh hoeh dawkvah na tawm payon awh.

³⁰ Boutthawnae hnin dawk teh yuvânae awm mahoehtoe, yu paluennaehai awm mahoehtoe.

³¹ Kalvan tami, Cathut e taminaw patetlah doeh o awh han.

³² Hothloilah, kadout tangcoungnaw boutthawnae dawk teh, Cathut ni kai teh Abraham e Cathut, Isak e Cathut, Jakop e Cathut lah ka o telah nangmouh koe a dei e hah na touk boi awh hoeh maw. Cathut teh kadoutnaw e Cathut nahoeh. Kahringnaw e Cathut doeh telah atipouh.

³³ Rangpui ni hote cangkhae lawk hah a thai awh toteh a kângairu awh.

Kalenpounge kâlawk

Mrk 12:28-31

³⁴ Sadusinaw hah lawk tho sak thai hoeh toe tie hah Farasinaw ni a thai aw h toteh cungtalah a kamkhueng aw h.

³⁵ Ahnimouh thung daw k kâlawk ka cangkhai e buet touh ni a tanouk nahanlah buet touh a pacei.

³⁶ Saya, kâlawk thung daw k bangpatet e kâpoelaw k hah maw kalenpoung atipouh.

³⁷ Jisuh ni, na Cathut, kahring Cathut hah na lungthin abuemlah, na muitha abuemlah, na pouknae abuemlahoi na lungpataw han.

³⁸ Het hateh apasuekpoung e hoi kalenpoung e kâpoelaw k doeh.

³⁹ Hothloilah, nama hoi kâkuen e hah nama hoi kâvan lah na lungpataw han tie apâhni e kâpoelawknaw teh apasuek e hoi a kâtarawi.

⁴⁰ Hete kâpoelawknaw kahni touh hateh kâlawk puenghoi profetnaw ni dei e pueng e a kung lah ao atipouh.

Jisuh Khrih teh api capa maw

Mrk 12:35-37; Luk 20:41-44

⁴¹ Farasinaw a kamkhueng aw h navah Jisuh ni a pacei.

⁴² Khrih heh banglah maw na pouk aw h. Apie Capa lah maw na pouk aw h, atipouh. Ahnimouh ni Devit Capa atipouh aw h.

⁴³ Hat pawiteh Devit ni Khrih hah muitha lahoi Bawipa telah bangkongmaw a kaw.

⁴⁴ Devit ni a dei e teh, kahring Cathut ni na taran pueng hah na khok rahim ka ta

hoehroukrak kaie aranglah tahung telah Bawipa ni kaie Bawipa koevah atipouh.

⁴⁵ Hottelah Devit ni Khrih hah Bawipa telah kaw pawiteh bangtelamaw a capa lah ao han telah atipouh.

⁴⁶ Api buet touh ni hai lawk kam touh boehai pathung thai awh hoeh. Hat hnin hoi teh apinihai lawk bout pacei ngam awh hoeh toe.

23

Thoebonae sari touh

Mrk 12:38-39; Luk 20:45-46; 13:34-35

¹ Hathnukkuh Jisuh ni a hnukkâbangnaw hoi tamimaya koe lawk a dei pouh.

² Cakathutkungnaw hoi Farasinaw teh Mosi e tahungnae daw k a tahung awh.

³ Hatdawkvah ahnimouh ni a dei awh e pueng hah tarawi a nateh sak pouh awh. Ahnimae sak e patetlah teh sak awh hanh. Bangkongtetpawiteh, a dei awh e patetlah a sak awh hoeh daw k doeh.

⁴ Ahnimouh ni ka ri ni teh phu ka ru e hnonaw hah a roup awh teh taminaw e loung daw k ouk a patue awh. Amamouh ni hote hnonaw teh a kutdawn ca hoi boehai takhoe ngai awh hoeh.

⁵ A sak awh e hno pueng hah ayâ ni hmu nahanlah doeh a sak awh. A tampa daw k a kawm sin awh e akana a len sak awh teh, khohna daw k e akana a saw sak awh.

⁶ Buvennae hoi sinakoknaw koe kahawi e tahungnae hah a lungpataw awh,

⁷ hno yonae koe barinae, kacangkhakung telah kawnae hah a ngai awh.

⁸ Nangmouh teh Rabbi telah kawnae hah dâw awh hanh. Khrih buet touh dueng doeh nangmouh na kacangkaikung na tawn awh. Nangmouh pueng teh hmaunawnggha lah na o awh.

⁹ Talai van vah apihai apa telah kaw awh hanh. Kalvan kho vah nangmae na Pa buet touh dueng doeh kaawm.

¹⁰ Saya telah kawnae hai dâw awh hanh. Khrih dueng doeh nangmouh na kacangkaikung lah ka awm.

¹¹ Nangmouh thung daw k kalenpounge tami teh nangmae patoun patang e lah ao han.

¹² Apipatethai amahoima kârasang e teh a rahim vah pabo lah kaawm han. Apipatethai amahoima kârahnoum e teh tawm lah kaawm han.

¹³ A laikathout e cakathutkungnaw hoi Farasinaw yawthoe lah na o awh. Kalvan uknaeram teh ayânaw hanlah na khan awh teh namamouh hai na kâen awh hoeh, kâen han kangainaw haiyah na ngang awh.

¹⁴ A laikathout e cakathutkungnaw hoi Farasinaw yawthoe lah na o awh. Lahmainu e im hah na lawp awh teh a kamphawng hoeh nahanlah kasaw poug lah na ratoum awh. Hatdawkvah hoe kalen e yonphukhangnae hah na khang awh han.

¹⁵ A laikathout e cakathutkungnaw hoi Farasinaw, yawthoe lah na o awh. Bangkoktetpawiteh, tami buet touh hai namamae bawknae daw k kâen sak hanlah talí hoi a oung pheng na katin awh teh, na kâen sak hnukkhu teh

namamouh hlak let hni e hell ca lah na o sak awh.

¹⁶ Kahrawikung mit ka dawnnaw, yawthoe lah na o awh. Bangkongtetpawiteh, Bawkim hah noe lahoi thoe ka bo e teh cak hoeh. Bawkim thung e sui hah noe hoi thoe ka bo e doeh ka cak na ti awh.

¹⁷ Tamipathu, mitdawnnaw, nâ e hno maw ka talue. Sui maw, nahoe pawiteh sui ka thounsak e Bawkim na ou.

¹⁸ Thuengnae khongroe noe lahoi thoe ka bo e teh cak hoeh, thuengnae khongroe van kaawm e thuengnae hno hah noe lahoi thoe ka bo e teh a cak na ti awh.

¹⁹ Mitdawnnaw, bangpatet e hno maw hoe ka talue. Hote thuengnae hno na ou, Hote thuengnae hno hah ka thounsak e thuengnae khongroe na ou.

²⁰ Hatdawkvah thuengnae khongroe hah noe lahoi thoe na bo pawiteh thuengnae khongroe khuehoi avan e kaawm hno pueng hah mek na noe teh thoe na bo toe.

²¹ Bawkim hah noe lahoi thoe na bo pawiteh a thung kaawm e khuehoi thoe mek na bo toe.

²² Kalvan kho noe hoi thoe ka bo e teh Cathut e bawitungkhung hoi, a van ka tahung e khuehoi mek na noe teh thoe na bo toe.

²³ A laikathout cakathutkungnaw hoi Farasinaw yawthoe lah na o awh. Nangmouh ni teh anhla a pawhiknaw hoi sawngpam totouh hra touh dawk buet touh na hmoun awh. Hatei, kâlawk thung dawk hoi hoe alawkpui e lannae, pahrennae yuemnae hah lat na hnoun awh. Hete

hnonaw na sak han roeroe lah ao. A lathueng lah dei e hai sak laipalah awm awh hanh.

²⁴ Kahrawikung mitdawnaw, tui dawk mang-ing buet touh boehai ao hoeh nahanlah na raci awh ei kalauk hah na payawp awh.

²⁵ A laikathout e cakathutkungnaw hoi Farasinaw yawthoe lah na o awh. Manang hoi tongben hah avanlah na pâle awh ei a thung lah teh lawpnae hoi dумыennaе hoi na kawi awh.

²⁶ Mit ka dawn e Farasinaw, manang hoi tongben hah a thung lah hmaloe pâle awh. Hottelah na sak pawiteh doeh alawilah hai thoung tih.

²⁷ A laikathout e cakathutkungnaw hoi Farasinaw yawthoe lah na o awh. Avan ka pangaw dui hluk e tangkom hoi na kâvan awh. Hote tangkom teh alawilah hroung ahawi. Athung teh tami hru, khinnae a cawngca hoi akawi.

²⁸ Hot patetvanlah alawilah, taminaw hmalah teh tamikalan patetlah na o awh, athunglah teh laithoenaе hoi dумыennaе hoi na kawi awh.

²⁹ A laikathout e cakathutkungnaw hoi Farasinaw, yawthoe lah na o awh. Profetnaw e phuen hah na sak awh teh tami kalannaw e phuen hah na pathoup awh.

³⁰ A mintoenaw e se nah kaawm awh pawiteh profetnaw theinae dawк ka bawк awh mahoe h na ti awh.

³¹ Hottelah na tet awh pawiteh profetnaw ka thet awh e catoun lah ka o awh tie hah namamouh hoi namamouh ni na kampangkhai awh toe.

³² Hatdawkvah mintoenaw e a sakyoe awh e totouh phat awh.

³³ Hrunthoe catounnaw bangtelamaw lawk-cengnae hell thung hoi na hlout a thai han raw vaw.

³⁴ Hatdawkvah thai awh haw, nangmouh koevah, profetnaw, a lungkaang naw, cakathutkungnaw ka patoun han. A tangawn teh na thei awh vaiteh thingpalam dawk na pathout awh han. Atangawn hah sinakoknaw dawk na hem awh teh, kho buet touh hoi buet touh na rektap awh teh na hrek awh han.

³⁵ Hatdawkvah, tamikalan Abel e thi koehoi athung bawkim hoi thuengnae khoungroe rahak na thei awh e Berekhiah capa Zekhariah e a thi totouh talai van dawk rabawk lah kaawm tangcoung e tami kalannaw e thi teh nangmae lû dawk ka bawt han.

³⁶ Atangcalah na dei pouh awh. Hete hno pueng heh, hete catounnaw van vah ka phat han.

Jisuh ni Jerusalem hanlah a ka

³⁷ Oe! Jerusalem, Jerusalem, profetnaw kathetkung, nang koe patoun lah kaawm e naw talung hoi kadêikung, Âpui ni a canaw hah a rathei rahim a pâkhueng e patetlah na canaw hah kamkhueng sak hanlah avai moikapap ngainae ka tawn toe. Hatei, nang ni teh na ngai hoeh.

³⁸ Thai haw, na onae im teh tami kingkadi lah doeh ceitakhai lah ao toe.

³⁹ Na dei pouh awh, Bawipa min lahoi ka tho e hah yawhawinae awm naseh telah na dei awh hoehroukrak, atu hoi teh nangmouh ni ka minhmai hah na hmawt a mahoeh toe atipouh.

24

Jisuh ni bawkim rawk nahan kong sut a dei
Mrk 13:1-37; Luk 21:5-36

¹ Jisuh ni bawkim dawk hoi a tâco teh alouklah a cei navah, bawkim saknae imnaw hah pâtué hanlah a hnukkâbangnaw ni rek a hnai aw h.

² Jisuh ni hete hnonaw pueng hah na hmu aw h nahoe hmaw. Atangcalah na dei pouh aw h. Raphoe laipalah talung buet touh e avan, buet touh kangna hai kamhmung mahoe h atipouh.

Runae kalen a tho nahane sut a dei

³ Hathnukkhu, Olive Mon daw k a tahung navah, a hnukkâbangnaw ni alouknaw baw k laipalah Jisuh koe rek a hnai aw h teh, hote hnonaw teh nâtuék maw a tho han, let na tho nahane hoi talaivan a pout nahane minoutnaw teh bangtelamaw ao han na dei pouh haw atipouh aw h.

⁴ Jisuh ni, ahnimouh koevah, apipatet ni hai na dum aw h hoe h nahanlah kâhruetcué aw h.

⁵ Tami kapap ni kai doeh Khrih ati vaiteh, Kaie min lahoi haiyah tho a vaiteh, tami kapap hah a dum aw h han.

⁶ Taran kâtuknae hoi, tarankâtuk nahane kamthang hai na thai aw h han. Hatei, na puen aw h hoe h nahanelah, kâhruetcué aw h. Hote hnonaw teh kaawm han. Hatei a poutnae nahoe h rah.

⁷ Miphun buet touh hoi buet touh, uknaeram buet touh hoi buet touh a kâtaran aw h han. Kho tangkuem a takang vaiteh, lacik a pung han, tâlí a no han.

⁸ Hotnaw hateh runae kamtawngnae doeh.

Rektap khang nahan kong sut a dei

⁹ Hat torei teh taminaw ni rektap hanlah, thei hanlah na man awh han. Ka min kecu daw k tami pueng ni na pahnawt awh han.

¹⁰ Hat torei teh tami kapap ni lawkkam raphoe vaiteh, buet touh hoi buet touh a kâpahnawt awh vaiteh, buet touh hoi buet touh a kâmaithoe awh han.

¹¹ Profet kaphawk pap vaiteh tami kapap a dum awh han.

¹² Hounlounnae apap han, lungpatawnae a roum han.

¹³ Apipatethai apout ditouh ka khang e teh hloutnae a hmu han.

¹⁴ Uknaeram kamthang kahawi heh miphun pueng koe lawkpanuesaknae lah ao na hanlah, talaivan pueng daw k pâpho lah kaawm han. Hahoi, teh poutnae a pha han.

Rucatnae kalenpoung

¹⁵ Hatdawkvah profet Daniel ni a dei e patetlah panuethopounge karaphoekung kathounge hmu en daw k kangdue e na hmu awh torei teh, Cakathoung ka touk e ni thai panuek naseh.

¹⁶ Hottelah hmu lah awm pawiteh, Judea ram kaawm e naw ni monsom lah yawng awh naseh.

¹⁷ Lemphu kaawm e ni imthungkhu e hno la hanlah kum hanh naseh.

¹⁸ Laikaw koe kaawm e ni hai a khohna la hanlah hnuklah kamlang hanh lawiseh.

¹⁹ Hot na hnin toteh camo ka neng e napui hoi camosen kaawm e napuinaw teh puenghoi a ru awh han.

²⁰ Na yawng awh nahane teh pânding tue hoi sabbath hnin daw k a kâvoe hoeh nahanlah ratoum awh.

²¹ Bangkongtetpawiteh, talaivan pek a kamtawng hoi atu totouh kaawm boihoeh rae, ao hnukkhu hoi hai bout kaawm hoeh hane puenghoi runae teh hatnae tueng nah a tâco han.

²² Hote tueng teh saw pawiteh apipatet ni hai hlout thai mahoeh. Rawi e taminaw hane kecu daw k hote tueng hah a duem sak han.

²³ Hattoteh apipatet ni hai hi doeh Khrih ao, haw doeh Khrih ao ka tet nakunghai yuem awh hanh.

²⁴ Bangkongtetpawiteh, khrihkaphawknaw hoi profetkaphawknaw tâcawt vaiteh, rawi tang-coung e naw patenghai dum thai pawiteh dum thai nahanelah, kalenpounge mitnout hoi kângairunae hnonaw hah a kamnue sak awh han.

²⁵ Thai awh haw, sut na dei pouh awh.

²⁶ Hatdawkvah, ahnimouh ni Khrih teh thingyeyawn doeh ao ka tet awh nakunghai tâcawt awh hanh. Imthung doeh ao ka tet nakunghai yuem awh hanh.

²⁷ Sumpa teh kanîtho koehoi apalik nah kanîloum totouh a ang e patetlah tami Capa teh ka tho han.

²⁸ Ro aonae koe langtanaw ni a kamkhueng han.

Tami Capa bout a tho han

²⁹ Hatnae tueng runae hnukkhu, kanî teh vaitalahoi a hmo han. Thapa teh ang mahoeh.

Âsinaw teh kalvan hoi a bo awh han. Kalvannaw e bahu teh a kahuet awh han.

³⁰ Hattoteh tami Capa e mitnout teh kalvan vah a kamnue han. Talai van tami pueng ni a khuika awh vaiteh, tami Capa ni kalenpounge bahu hoi kalenpounge bawilennae tâmai kâcui vaiteh a kum e hah na hmu awh han.

³¹ Hahoi a kalvantaminaw hah kacaipounge mongka lawk hoi patoun vaiteh, talai takin pali touh koe e kalvan apoutnae koehoi avanglae apoutnae koe totouh, a rawi tangcoung e taminaw hah a pâkhueng awh han.

Thaibunglung kung bangnuenae

³² Thaibunglung kung hoi bangnuenae hah pâkuem awh. Thaibunglung kung ni a dawn a cawn teh a hnanaw a naw toteh, kompawi a hnai toe tie hah na panue awh.

³³ Hot patetlah hote a konglam abuemlah na hmu awh toteh, tami Capa teh takhang koe totouh a tho toe tie hah panuek awh.

³⁴ Atangcalah na dei pouh awh. Atu e catounaw be a due awh hoehnahan hote konglam pueng ka tâcawt han.

³⁵ Kalvan hoi talai teh a rawk han, hatei ka lawk teh a kangning han.

Atueng teh apinihai panuek hoeh

Luk 17:26-27

³⁶ Hote tueng teh apinihai panuek hoeh. Kalvan e kalvantaminaw ni hai panuek hoeh. Apa ni dueng doeh a panue.

³⁷ Tami Capa a kum toteh Noah senae patetlah kaawm han.

³⁸ Noah ni tuikamuem hoehnahlan hoi long thung a kâen ditouh tami pueng ni a canei awh, a kâpaluen awh, a kâhâ awh.

³⁹ Tui kamuem a tho toteh taminaw pueng koug raphoe ditouh a thada e patetlah tami Capa a kum toteh hotpatetlah ka tâcawt han.

⁴⁰ Hattoteh law kaawm e tami kahni touh daw k buet touh a la vaiteh buet touh a ceitakhai han.

⁴¹ Cakang ka phawm roi e napui kahni touh daw k buet touh a la vaiteh buet touh a ceitakhai han.

⁴² Nangmae Bawipa teh nâtuek maw a tho han ti na panue awh hoeh dawkvah ring awh.

⁴³ Tamru a tho nahane tueng heh imkung ni panuek pawiteh a paru thai hoeh nahanlah a ring han doeh tie teh na panue awh.

⁴⁴ Hatdawkvah cungkacoe awm awh. Bangkongtetpawiteh na poukhoehnae tueng daw k tami Capa teh ka tho han.

Yuemkamcu e hoi kâhruetcu et e san

⁴⁵ Bawipa ni amae imthungnaw hah atueng a pha toteh rawcanaw poe sak hanlah kaukung lah a rawi e yuemkamcunae hoi lungangnae hoi kakuep e san kahawi teh apimaw .

⁴⁶ Bang patet e san hai hottelah a sak e hah a Bawipa ni a hmu pouh e teh a yawhawi.

⁴⁷ Atangcalah na dei pouh awh. Bawipa ni hot patet e san koevah a hnopai kaawm e pueng hah a poe han.

⁴⁸ Hatei, san kathout ni teh a lungthin daw k hoi ka Bawipa heh tho hnai mahoehtelah a pouk laihoi,

⁴⁹ a huinaw hah a hem a bo teh hounloun, yamuhrinaw hoi a canei awh.

⁵⁰ A bawipa teh a poukhoehnae hoi a panuehoehnae tueng dawk a tho teh,

⁵¹ hote san hah puenghoi yue vaiteh khuikanae, hâ katanae hmuen koe ka kâsak e naw hoi cungtalah hmuen a hmoun pouh awh han.

25

Tanglakacuem hra touh bangnuenae

¹ Kalvan uknaeram teh yupaluenkung dawn hanlah hmaiim patuep hoi ka cet awh e tanglakacuem hra touh hoi a kâvan.

² Hote tanglanaw thung dawk panga touh teh a lungang awh. Hatei, panga touh e teh a pathu awh.

³ Ka pathu e naw teh, hmaiim dueng a sin awh teh, atui sin awh hoeh.

⁴ A lungkaangnaw teh, hmaiim hoi, satuium dawk, atui khuehoi a sin sin awh rah.

⁵ Yupaluenkung a tho hoeh navah, hote tanglanaw ni a ngam awh teh, muet a i awh.

⁶ Karumsaning toteh, kenhaw! yupaluenkung a tho toe, tâcawt awh nateh, dawn a leih, telah a oung.

⁷ Hote tanglakacuemnaw ni a thaw awh teh hmaiimnaw hah a kârakueng awh.

⁸ A lungkaang hoeh e naw ni kaimae hmaiim hmai a due toe. Nangmae satui hah youn touh na poe awh haw telah a lungkaangnaw koe a hei awh.

⁹ A lungkaang e naw van ni hai nangmouh hane khuehoi atui khout hoeh. Hatdawkvah na hno aw hanelah atui kâyawt e koe na ran aw h pawiteh bet kahawi han telah atipouh aw h.

¹⁰ Hotnaw ni atui ran hanelah a cei aw h lahun navah, yupaluenkung a tho toteh, councakoe kaawm e tanglanaw teh yupaluenkung hoi cung-talah paw i thung a kâen a hnukkhu takhang hah a khan aw h.

¹¹ Hathnukkhu alouknaw a tho aw h. Bawipa, Bawipa kaimouh han tho paawng ei telah a kâhei aw h.

¹² Bawipa ni atangcalah na dei pouh aw h, nangmouh na panuek aw h hoeh, telah atipouh.

¹³ Hatdawkvah tami Capa a tho nahane hnin hoi atueng teh na panue aw h hoeh dawkvah ring aw h.

Talen hoi bangnuenae

Luk 19:12-27

¹⁴ Kalvan uknaeram teh ahlanae ram koe kahlawng ka cet e hoi a kâvan. Ahni ni, kho louk lah cei hane pouknae a tawn dawkvah, a kut rahim e naw hah a kaw teh a hnonaw hah a hnawng. Ahnimouh teh amamae a coung thai aw h e patetlah buet touh koe talen panga,

¹⁵ buet touh koe kahni, buet touh koe buet touh a poe hnukkhu a ceitakhai (Talen buet touh heh Deinari 6,000 hoi a kâvan).

¹⁶ Talen panga touh ka dâw e ni a cei teh a yoran dawkvah alouke apung talen panga touh a hmu.

¹⁷ Hote patetvanlah talen kahni touh ka dâw e van nihai, alouke apung talen kahni touh a hmu.

18 Talen buet touh ka dâw e niteh, Bawipa e talen hah talai a tai teh talai thungvah a hro.

19 A hnin a tha moi a saw hnukkhu hotnaw e Bawipa a tho teh, tangka e a kong hah a dei.

20 Talen panga touh ka dâw e ni yah, apung e talen panga touh a sin teh, Bawipa nang ni kai koe talen panga touh na pâkuem sak. Alouke talen panga touh ka pung sak atipouh.

21 Bawipa ni, ahawi nang teh kahawi e hoi yuemkamcu e san., nang teh titca e hno dawkw yuemkamcu dawkvah, kapap e hno hai na kuem sak han. Na Bawipa lunghawinae thungvah kâen van leih atipouh.

22 Talen kahni touh ka dâw e nihai, Bawipa talen kahni touh na kuem sak teh, alouke talen kahni touh ka pung sak atipouh.

23 Bawipa ni, ahawi. Yuemkamcu e san kahawi. Hno titca e dawkw yuemkamcu toe. Hno kapap e hai na kuem sak han. Na Bawipa lunghawinae thung kâen van haw, atipouh.

24 Talen buet touh ka dâw e nihai, Bawipa nang teh pacipali lah na kaawm e na tho dawkvah, na patuehoehnae hmuen koe na ka a niteh, na heihoehnae hmuen koe na ka pâkhueng e na tho tie hah ka panue.

25 Hatdawkvah, ka taki teh, nange talen buet touh hah talai thung ka hro toe. Atu na talen roup ao atipouh.

26 A bawipa ni, ka pangak pasa e san kathout, atipouh.

27 Ka heihoehnae koe ka pâkhueng tie hah na panuekatang pawiteh kaie talen hah bangkong-maw hno yorannaw kut dawkw na hruek hoeh

vaw. Hottelah na hrueng pawiteh kai bout ka tho toteh, tangka a manu hoi apung hah ka hmu han ei.

²⁸ Hatdawkvah, talen buet touh e hah a kut dawk hoi lawmh awh. Talen hra touh ka tawn e hah poe sin awh.

²⁹ Bangkongtetpawiteh, apipatet hai ka tawn e teh, hoe kapap a tawn nahanlah rek poe sin han rah. Apipatethai ka mathoe e teh a tawn e ca patenghai he lawp pouh lah ao han.

³⁰ Cungkeihoehe hote san hah, khuikanae hoi hâ katanae aonae koe, alawilah hmonae thungvah tâkhawng awh, atipouh.

Tu hoi hmae

³¹ Tami Capa teh a Bawilenna hoi kalvantami kathoungnaw hoi a tho toteh, a bawilenna bawitungkhung dawkvah a tahung han.

³² A hmalah miphun pueng a kamkhueng sak vaiteh, tukhoumkung ni tu hoi hmae a kapek e patetlah tami pueng hah a kapek han.

³³ Tunaw hah aranglah, hmaenaw hah avoilah a ta han.

³⁴ Hat toteh, siangpahrang ni aranglah kaawm e koevah, tho awh, a Pa e yawhawinae kacoenaw, talaivan sak pasuek hoi nangmouh hanlah sut pathoup e uknaeram hah pang awh.

³⁵ Bangkongtetpawiteh, ka vonhlan nah na paca awh. Tui kahran nah nei han tui na poe awh. Imyin lah ka o nah na khetyawt awh.

³⁶ Caici lah ka o nah na khohna sak awh. Ka patawpanat nah na khetyawt awh. Thongim ka bo nah na hloe awh, ati pouh.

³⁷ Hat torei teh tami kalannaw niyah, Bawipa nâtuék maw na vonhlam e hah ka hmu aw h teh na paca aw h. Tui na kahran e hah nâtuék maw ka hmu aw h teh na nei hanlah tui na poe a vaw.

³⁸ Imyin lah na o e hah nâtuék maw na hmu aw h teh na khetyaw t aw h. Caici lah na o e hah nâtuék maw na hmu aw h teh, na khohna sak aw h.

³⁹ Na patawpanat nah nâtuék maw na hloe aw h teh, nang koe ka tho aw h, telah ati aw h han.

⁴⁰ Hattoteh siangpahrang ni atangcalah na dei pouh aw h. Nangmouh ni hete ka nawngghanaw thung dawkvah kathoengpounge koevah na sak aw h e pueng hateh, kai koe na sak aw h e doeh toe telah bout ati pouh aw h han.

⁴¹ Hat toteh, siangpahrang ni, avoilah kaawm-naw koevah, nangmouh thoeb o lah na kaawm-naw, kahraimathout hoi amae a hunaw hanlah sut rakueng pouh e a yungyoe hmai thungvah kai koehoi kâtakhoe aw h.

⁴² Bangkongtetpawiteh, ka von a hlam nah ca han rawca na poe aw h hoeh, tui kahran navah nei hane tui na poe aw h hoeh.

⁴³ Imyin lah ka o navah na khen na yawn aw h hoeh, caici lah ka o navah na kho na hnat sak aw h hoeh, ka patawpanat nahai thoseh, thongim thung ka o nahai thoseh, na tho na awm sin aw h hoeh.

⁴⁴ Hotnaw ni vah, Bawipa, na vonhlam e, tui na kahran e, imyin lah na o e, caici lah na o e, na patawpanat e, thongim thung na onae hah nâtuék maw na hmu aw h teh na khenyawn laipalah, na paca laipalah ka o aw h, ati aw h han.

⁴⁵ Hattoteh siangpahrang ni, atangcalah na dei pouh awh. Nangmouh ni hete ka nawngghanaw thung dawck, ka thoung poung e koe na sak awh hoeh e pueng teh kai koe na sak awh hoeh toe, ati pouh awh han.

⁴⁶ Hotnaw teh a yungyoe reknae koe cet awh vaiteh, tami kalannaw teh a yungyoe hringnae koe a cei awh han a ti.

26

Jisuh thei hanlah a kâcai awh

Mrk 14:1-2; Luk 22:1-2

¹ Jisuh ni hete lawknaw koung a dei hnukkhu, a hnukkâbangnaw koevah,

² Hnin hni touh a loum hnukkhu teh, ceitakhai pawî hnin ao han toe titeh na panue awh. Hattoteh tami Capa hah thingpalamnae dawck thei sak hanlah, poe e lah kaawm han atipouh.

³ Hatnavah, vaihma bawinaw, cakathutkungnaw hoi kho thung e kacuenaw teh vaihma kacue Kaiaphas e toeim vah a kamkhueng awh teh,

⁴ Jisuh hah huenghai hoi bangtelah ne man thai vaiteh thei thai awh han tie hah a kâpankhai awh.

⁵ Hatei, pawî na hnin vah man awh hanh ei sei. Tami pueng ruengrueng tet a langvaih ati awh.

Napui buet touh ni Jisuh hah hmuitui a awi

Mrk 14:3-9; Luk 7:37-38; Jhn 12:1-8

⁶ Bethani khovah ka hrikbei e Simon im Jisuh ao navah,

⁷ napui buet touh ni hmuitui apfu kaawm poung e talungpangaw bom a sin teh bu a ca lahun nah a lû dawk a awi pouh.

⁸ A hnukkâbangnaw ni a hmu awh navah, bangkongmaw a kaseikasak ati awh teh a lungkhuek awh.

⁹ Hote hmuitui hah apfu moikapap lah yo vaiteh karoedengnaw poe hanelah ao ati awh.

¹⁰ Jisuh ni a panue toteh hote napui hah bangkongmaw na tarawk awh. Ahni ni kai koe hnokahawi a sak toe.

¹¹ Karoedengnaw teh nangmouh koe doeh pou ao awh. Kai teh nangmouh koe pou kaawm mahoe.

¹² Hete hmuitui hah ka tak dawk a awi e teh, ka ro pakawp nahanlah a rakuengnae doeh toe.

¹³ Atangcalah na dei pouh awh. Talaivan kamthang kahawi deinae hmuen pueng koevah, hete napui pou pouk nahanelah, a hnosak e heh dei lah kaawm van han atipouh.

Judah Isakarot ni Jisuh a yo

Mrk 14:10-11; Luk 22:3-6

¹⁴ Hatnavah a hnukkâbang hlaikahni touh thung dawk e Judah Isakarot ni vaihma bawinaw koe a cei teh,

¹⁵ Jisuh hah nangmae kut dawk na poe thai pawiteh, nangmouh ni kai hah tangka nâyittouh maw na poe awh han atipouh. Ahnimouh ni ngun tangka 30 touh na poe han atipouh awh.

¹⁶ Hahoi teh, Bawipa hah pahnawt thai nahanelah, Judah ni atueng kanhlongnae hah sut a ring.

Tangmin buvennae

Mrk 14:12-16; Luk 22:7-13

¹⁷ A hnukkâbangnaw ni tonphuenhoehe pawî apasuek hnin vah, ceitakhai pawî ca nahane hmuen hah nâ e koe maw rakueng sak hanlah na ngai atipouh awh.

¹⁸ Bawipa ni, kothung tami buet touh e im vah cet awh nateh, Bawipa ni lawk na thui e teh, a tue a hnai toe, a hnukkâbangnaw hoi cungtalah ceitakhai pawî heh nangmouh im vah ka hno awh han ati tet pouh awh, atipouh.

¹⁹ A hnukkâbangnaw ni a dei pouh e patetlah a sak awh teh, ceitakhai pawî hah atangcungcalah a rakueng pouh awh.

²⁰ Tangmin lavah, a hnukkâbangnaw hlaikahni touh hoi bu cungtalah a ven awh.

²¹ A ca awh lahun navah Bawipa ni, atangcalah na dei pouh awh. Nangmouh thung dawî buet touh ni kai hah na pahnawt awh han atipouh.

²² Hat torei teh, a hnukkâbangnaw a lung puenghoi a mathoe awh teh, Bawipa kai maw telah lengkaleng a pacei awh.

²³ Bawipa ni kawlung dawî kai hoi rei ka tapu e ni kai na pahnawt han.

²⁴ Cakathoung dawî thut e patetlah tami Capa teh ka cet han. Hatei, tami Capa ka pahnawt e teh a yawthoe. Ahni teh khe hoeh ngala pawiteh bet ahawihnawn atipouh.

²⁵ Bawipa ka pahnawt e Judah Isakarot ni hai Rabbi kai maw telah a pacei navah, na dei e patetlah oe nang doeh atipouh.

Bawipa e bu apasuek venna

²⁶ A ca awh lahun navah, Jisuh ni vaiyei a la teh, lunghawi lawk a dei hnukkhu, a raen teh, hete vaiyei teh ka tak doeh. Lat awh nateh cat awh, telah a hnukkâbangnaw koe atipouh.

²⁷ Manang hai a la teh lunghawi lawk a dei hnukkhu ahnimanaw hah a poe teh, nangmouh pueng ni net awh.

²⁸ Hete manang teh lawkkam katha doeh. Taminaw hlout nahanlah ka rabawk e ka thi doeh.

²⁹ Na dei pouh awh. Hete misurtui patet e a katha e misurtui nangmouh hoi cungtalah a Pa e uknaeram dawk bout ka nei hoehroukrak, atu hoi bout ka net mahoeh toe.

³⁰ Hahoi teh la a sak awh teh Olive Mon lah a luen awh.

A hnukkâbangnaw paringparang a yawng awh

Mrk 14:27-31; Luk 22:31-34

³¹ Hat toteh, Cakathoung dawk a thut e teh, tukhoumkung hah hem awh vaiteh, a tunaw ni paringparang lah ao awh han ati e patetlah, sahnin tangmin lah nangmouh pueng ni kai kecu dawk na lung a pout awh han.

³² Hatei, bout ka thaw hnukkhu nangmouh hmalah, Galilee ram lah ka cei han, telah Jisuh ni atipouh.

³³ Hetnaw ni nang kecu dawk a lung ka pout awh nakunghai kai teh ka lung khoeroe pout mahoeh, telah Piter ni a ti.

³⁴ Jisuh ni, atangcalah na dei pouh. Sahnin tangmin ahlui a khawng hoehnahlan kai hah vai thum touh na pahnawt han atipouh.

35 Piter ni, nang hoi rei due han nakunghai kai ni na pahnawt mahoeh bout atipouh. Alouke a hnukkâbangnaw ni hai hot patetvanlah a dei awl.

Gethsemani takha thung ratoumnae

Mrk 14:32-42; Luk 22:40-46

36 Hatnavah Jisuh ni Gethsemani hmuen koe ahnimouh hoi rei a pha toteh, kai teh hote hmuen koe ratoum hanlah ka cei han, hete hmuen koe la tahung awl lah a, telah a hnukkâbangnaw koe atipouh.

37 Piter hoi Zebedee e a capa roi a hrawi. Hatnavah Bawipa teh a lungmathoe, lungpuen hoi ao dawkvah,

38 Jisuh ni due han totouh ka lungreithai. Hie a hmuen koe awm awl nateh kai hoi cungtalah ring awl, telah a hnukkâbangnaw kathum touh koe a dei pouh.

39 Hathnukkuh hmalah hrawt bout a cei teh, a tabo laihoi oe a Pa coung thai pawiteh hete manang na takhoe pouh haw. Hatei, kaie ka ngainae patetlah tho laipalah, na ngainae patetlah tho lawiseh telah a ratoum.

40 A hnukkâbangnaw aonae koe a pha navah, ahnimouh ni di a i takhai e a hmu navah, nangmouh ni suimilam buet touh kangna hai kai hah na ring thai awl hoeh maw.

41 Tacueknae koehoi na hlout thai awl nahan ratoum laihoi ring awl. Muitha ni teh a ngai poung ei, takthai ni teh coung thai hoeh telah Piter koe atipouh.

42 Hahoi bout a cei teh Oe a Pa hete manang hah ka net laipalah roun thai hoehpawiteh,

na ngainae patetlah phat lawiseh telah bout a ratoum.

⁴³ Hat hnukkhu a hnukkâbangnaw onae koe bout a tho teh, ahnimanaw teh muet bout a i aw h e a hmu navah,

⁴⁴ a ceitakhai teh ahmaloe a ratoum e patetlah apâthum lah bout a ratoum.

⁴⁵ A hnukkâbangnaw onae koe bout a tho teh, atuteh duem ip aw h lawih. Tami Capa teh tamikayonnaw e kut daw k pah naw t nahane tueng teh a pha toe.

⁴⁶ Thaw aw h, cet a lei sei. Kai na kapahnawtkung teh a tho toe atipouh.

Jisuh mannae

Mrk 14:45-50; Luk 22:47-53

⁴⁷ Hottelah a dei lahun navah a hnukkâbang hlaikahni touh daw k ka baw k van e Judah Isakarot teh a tho. Vaihma bawinaw hoi khothung e tami kacuenaw ni a patoun aw h e naw teh tahloi hoi bongpainaw a sin aw h teh a tho aw h.

⁴⁸ Bawipa kapahnawtkung niyah, kai ni ka paco e teh Jisuh doeh, ahni hah man aw h telah hote taminaw koe noutnae a poe e patetlah,

⁴⁹ Bawipa koe rek a hnai teh, kancanghaikung yawhawinae awmseh ati teh a paco.

⁵⁰ Jisuh ni ka hui bang panki e daw k maw na tho atipouh navah, hote taminaw a tho aw h teh Jisuh hah a man aw h.

⁵¹ Hatnavah Jisuh hnukkâbang e buet touh ni a kut a dâw teh tahloi a rasa hnukkhu, vaihma kacue e a san buet touh hah a bouk navah a hnâ thouk a pet.

⁵² Jisuh ni na tahloi hah amae tabu dawk bout tat leih. Tahloi ka patuem e tami pueng teh tahloi hoi a due awh han.

⁵³ Atu roeroe vah a Pa koe kahei thai tie hai thoseh, kâhet pawiteh kalvan ransahuipui apfu hlaikahni touh hlak kapap lah Kai koe a patoun han tie hah nang ni na pouk hoeh maw.

⁵⁴ Hat pawiteh, Cakathoung dawk a thut e patetlah, hettelah o han tie hnonaw hah bangtelavai a kuep thai telah a ti.

⁵⁵ Hatnavah Jisuh ni Dingca man e patetlah kai man hanlah rama, bongpainaw na sin awh teh na tho a bo vaw. Kai ni Bawkim thung hnin ka due na cangkhai eiteh, nangmae rahak ka tahung navah nangmouh ni kai hah na man awh hoeh.

⁵⁶ Hot hateh, Cakathoung akuiep nahane doeh telah tami kamkhuengnaw hah a dei pouh. Hattoteh a hnukkâbangnaw pueng ni Bawipa hah parang a yawng takhai awh.

Lawkcengnae koe a phanae

Mrk 14:53-65

⁵⁷ Jisuh ka man e naw ni Bawipa hah, cakathutkungnaw hoi kacuenaw a kamkhuengnae vaihma kacue Kaiaphas koe a ceikhai awh.

⁵⁸ Piter hai vaihma kacue e toeim totouh, Bawipa hoi kahlat lah a kâbang. A hnukteng bangtelamaw ati awh tie a panue nahanlah athung a kâen teh ka ring e naw hoi reirei a tahung.

⁵⁹ Vaihma bawinaw hoi kacuenaw, sanhedrin lawkcengkungnaw pueng ni Jisuh thei thai nahanlah laithoe kampangkhae a tawng awh ei hmawt awh hoeh.

⁶⁰ Laithoe kampangkhai hanelah moi a tho aw h ei, Bangpatete kapanuekkhaikung hai tawn aw h hoeh. A hnukteng vah laithoe kampangkhakung kahni touh a tho roi teh,

⁶¹ ahni ni, kai ni Cathut e Bawkim hah ka raphoe vaiteh hnin thum touh hoi bout ka cum thai han telah a dei titeh kapanuekkhaikung lah a kangdue roi.

⁶² Vaihma kacue ni a kangdue teh, kam touh boehai bout na dei mahoe h maw. Hetnaw ni bangtelamaw kapanuekkhaikung lah a kangdue aw h, atipouh navah Jisuh teh lawkkamuem lah ao.

⁶³ Vaihma kacue ni nang teh Cathut e Capa, Khrih hoi Khrih hoeh e hah kaimouh koe na dei nahanlah kahring Cathut noe lahoi ka na poe atipouh.

⁶⁴ Hatnavah, Jisuh ni na dei e patetlah atueng. Hothloilah ka dei e teh, hmalae atueng daw k tami Capa ni bawilennae aranglah a tahung teh kalvan e tãmainaw daw k tahung lahoi a tho e hah na hmu aw h han atipouh.

⁶⁵ Hatnavah vaihma kacue ni amae angki a phi teh hete tami ni Cathut ka tapuet lah a dei toe. Bangpatet e kapanuekkhaikung maw bout a ngai rah. Cathut ka tapuet lah a dei e hah atu roeroe vah nangmouh ni na thai aw h toe.

⁶⁶ Bangtelamaw na pouk aw h, atipouh navah, hotnaw ni ahni teh due han a kamcu telah bout a dei aw h.

⁶⁷ Hattoteh a minhmai hah tamtui hoi a tamthawi aw h.

⁶⁸ Kut hoi a thaw aw h, tangawn ni a tambei aw h, oe Khrih nang hah apinimaw na tambei tie

hah profet lahoi dei leih, atipouh awh.

Piter ni Jisuh a pahnawt

Mrk 14:66-72; Luk 22:55-62; Jhn 18:25-27

⁶⁹ Piter ni toeim alawilah longkha koe a tahung navah sannu buet touh ni a tho teh nang haiyah Galilee tami Jisuh hoi cungtalah e doeh atipouh navah,

⁷⁰ Piter ni na dei e hah ka panuek hoeh telah taminaw e hmalah a oun.

⁷¹ Hathnukkhu Piter ni im longkha alawilah a tâco navah alouke napui buet touh ni bout a hmu teh haw kaawm e naw koe, het haiyah Nazareth tami Jisuh hoi cungtalah e doeh atipouh.

⁷² Piter ni ahni hah ka panuek hoeh telah thoe a ka bo teh bout a oun.

⁷³ Hathnukkhu moung ao teh hote hmuen koe kangdoutnaw ni Piter e a teng a tho awh teh, atangcalah nang haiyah hotnaw koe na ka bawk e doeh. Na lawk ni ma a pâpho toe telah atipouh awh.

⁷⁴ Piter ni ahni hah ka panuek hoeh ati teh thoe a kâbo. Hat nah tahma vah ahlui a khawng.

⁷⁵ Jisuh ni Ahlui a khawng hoehnahlan, vai thum touh kai hah na pahnawt han ati e lawk hah Piter ni hlawt a pouk navah alawilah a tâco teh khawngsauek laihoi a ka.

27

Jisuh teh Pailat hmalah a tâcokhai awh

¹ Amom vah vaihma bawinaw hoi tamimaya dawk e kacuenaw ni Jisuh thei hanelah a kâpankhai awh.

² Hahoi Bawipa hah a katek aw h teh Pailat siangpahrang kut daw k tawngtang a poe aw h.

Judah a kaithinae

³ Hatnavah, Bawipa ka pahnavt e Judah Isakarot ni Bawipa a dum e hah a hmu navah, pan a kângai teh, tangka 30 touh hah vaihma bawinaw, bawknae koelah kacuenaw koevah bout a poe.

⁴ Ka payon toe, yon ka tawn hoeh e tami e a thi hah ka pahnavt payon toe telah ati. Ahnimouh van ni hai kaimouh hoi bangtelamaw kâkuet a vaw. Nama e hno hah nama ni khen lawih atipouh aw h.

⁵ Ahni ni hote tangka hah Bawkim daw k vu a tâkhawng teh alouk lah a cei hnukkhu a kaithi.

⁶ Vaihma bawinaw ni hote tangka a la aw h teh a thi phu doeh. Hno kuemnae daw k pâseng kawi nahoe telah a kapan aw h teh,

⁷ Hlaam ka bo e talai hmu en hah Jentelnaw e phu en hanelah hote tangka hoi a ran aw h.

⁸ Hote kecu daw kvah atu totouh hote talai hmu en hah 'thi talai telah a kaw aw h.

⁹ Profet Jeremiah ni a dei e teh, Isarelnaw ni aphu khoe e tami e aphu tangka 30 touh hah a la aw h teh Cathut ni lawk na thui e van patetlah,

¹⁰ Hlaam ka bo e talai hmu en hah ka ran aw h tie lawk hah, hatnavah a kuep.

Pailat koe Jisuh a phanae
Mrk 15:2-15; Luk 23:2-3

11 Jisuh teh ram kaukkung hmalah a pha navah, ram kaukkung ni nang teh Judah siang-pahrang katang maw telah a pacei. Jisuh ni na pacei e patetlah atang doeh atipouh.

12 Vaihma bawinaw hoi kacuenaw ni yon a pen awh navah kam touh boehai pathung hoeh.

13 Pailat bawi ni nange avanglah moikapap ni a kampangkhai e hah na thai hoeh maw atipouh nakunghai,

14 Kam touh boehai a pathung hoeh e hah ram kaukkung ni a ka ngai lah a ru.

15 Hote pawu dawkvah ram kaukkung ni thongkabawtnaw thung dawk hoi tami kapap ni a ngai e tami buetbuet touh hah ouk tha e lah ao.

16 Hatnavah paung e naw thung dawk Barabas tie min kamthang e tami buet touh ao.

17 Taminaw a kamkhueng awh toteh Pailat bawi ni nangmouh ni apimaw hlout sak hanlah na ngai awh, Barabas maw hoehpawiteh Khrih tie Jisuh hah maw, telah taminaw hah a pacei.

18 Hettelah a paceinae teh ahnimouh ni a ut awh dawkvah Jisuh a man sak ati e hah Pailat bawi ni a panue dawk doeh.

19 Hothloilah, lawkcengnae tungkhung dawk a tahung navah a yu ni tami a patoun teh, hote tamikalan hah bang telah hai tet hanh. Sahnin roeroe vah kai ni ahni kecu dawk ka mang lah puenghoi ka khang toe, telah lawk a thui.

20 Tami ka kamkhuengnaw ni Barabas hlout sak vaiteh Jisuh thei sak hanlah vaihma bawinaw hoi kacuenaw ni taminaw hah a uen awh.

21 Hatdawkvah ram ka uk bawi ni het tarawi thung dawk, nangmouh ni api hah maw hlout

sak han na ngai awh telah bout a pacei navah; 'Barabas doeh hlout sak ka ngai awh telah a dei awh.

²² Pailat bawi ni 'hah pawiteh Khrih tie Jisuh hah te bangtelamaw ti han telah bout a pacei navah; ahnimouh pueng ni 'ahni hateh thingpalam dawck hetnae khang seh telah ati awh.

²³ Ram kaukkung bawi ni hai 'bangkongmaw, bangmaw a sakpayon telah a pacei navah, ahni teh thingpalam dawck het lah awmseh telah hoe a hram awh.

²⁴ Pailat bawi ni tâ laipalah taminaw ni hoehoe a coukdouk awh e hah a hmu toteh, tui a la teh taminaw e a hmalah a kut a kamsin teh, hete tamikalan e a thi hoi kai teh ka bet hoeh, na ngai e patetlah sak a lawih a ti.

²⁵ Hote tami pueng ni, ahni e a thi teh kaimae lû dawck, ka catounnaw e a lû dawck bawt lawiseh ati awh.

²⁶ Pailat bawi ni hai Barabas hah a tha pouh. Jisuh hah a hem hnukkhu thingpalam dawck thei hanelah a poe.

Jisuh pacekpahleknæ

Mrk 15:16-20

²⁷ Hat torei teh ram kaukkung e a ransanaw ni Jisuh hah bawi imthung lah a hrawi awh teh, ransahu abuemlah a kamkhueng sak.

²⁸ A khohna hah a rading pouh awh, hni paling a kâkhu sak awh.

²⁹ Pâkhinglukhung a kâmuk sak awh. Sonron buet touh aranglah a sin sak awh teh, a hmalah

khokcuengkhuem sin awh teh, Judah siangpahrang, nang koe yawhawinae awm naseh ti hoi a pacekpahlek awh.

³⁰ Tamtui hoi a tamthawi awh sonron hah a la pouh awh teh a lû dawk a hem pouh awh.

³¹ Hottelah a pacekpahlek awh hnukkhu, a kâkhu e hah a rading pouh awh teh, amae kâkhu e hah bout a kâkhu sak awh teh, thingpalam dawk het hanlah a tâcokhai awh.

Jisuh pathoutnae

Mrk 15:22-32; Luk 23:33-43; Jhn 19:17-24

³² A cei awh lahun nah Simon tie Sairen tami, buet touh a hmu awh teh, thingpalam hah hmatara a hrawm sak awh.

³³ Luhru hmuen tie Galgotha a pha awh toteh,

³⁴ tâsi kakhat hoi a kalawt awh e misurtui kathut poung e hah nei sak hanlah a poe awh. A patek teh nei han ngai hoeh.

³⁵ Thingpalam dawk a pathout awh hnukkhu cungpam a rayu awh teh a kâkhu e hni hah a kâravei awh.

³⁶ Hote hmuen koe tahung laihoi a ring awh.

³⁷ Yon pâphonaе ca a vo pouh e teh, 'het e tami teh Judah siangpahrang Jisuh doeh, telah a thut awh teh a lû lathueng a vo pouh awh.

³⁸ Hatnavah Bawipa hoi cungtalah dingca kahni touh aranglah buet touh, avoilah buet touh thingpalamnae dawk a pathout awh.

³⁹ Lam dawk ka cet kaawm e naw ni Bawkim hah ka raphoe vaiteh hnin thum touh hoi bout ka sak han e, namahoima kâhloutsak haw.

⁴⁰ Cathut e Capa katang lah na awm pawiteh namahoima rungngang nateh, thingpalamnae

dawk hoi kum leih telah a lû kahek awh teh pacekpahleknae lawk a dei awh.

⁴¹ Hot patetvanlah vaihma bawinaw, cakathutkungnaw, tami kacuenaw niyah ayânaw teh a rungngang thai,

⁴² Amahoima teh kârungngang thai hoeh bo. Judah siangpahrang katang na tetpawiteh thingpalamnae dawk hoi atu kum naseh. Kum pawiteh ka yuem awh han.

⁴³ Ahni teh Cathut a kâuep toe. Kai teh Cathut Capa doeh ati toe. Hatdawkvah Cathut ni ahni dawk a ngainae awm pawiteh atu roeroe vah kârungngang na seh telah a dudam awh teh a dei awh.

⁴⁴ Hot patetlah Bawipa hoi cungtalah thingpalamnae dawk a het awh e dingcanaw ni hai a pathoe awh teh yon a pen awh.

Jisuh a duenae

Mrk 15:33-41; Luk 23:44-49

⁴⁵ Kanî tuengtalueng a thunnae koehoi suimilam kathum totouh talai van pueng dawk kho a hmo.

⁴⁶ Tangmin lah suimilam kathum navah Jisuh ni 'Eli, Eli, Lama Sabakhthani. telah a hram. Hot hateh, Ka Cathut, ka Cathut bangkongmaw na pahnawt tinae doeh.

⁴⁷ Hote hmuen koe kangdout e a tangawn ni a thai awh navah Elijah doeh a kaw ati awh.

⁴⁸ Tami buet touh ni tang a yawng teh, napon a sin teh, misurtui kathut e hoi a kalawt hnukkhu rayung dawk a takei teh nei sak hanlah a poe.

⁴⁹ Alouknaw ni tat yawkaw, Elijah ni ahni rungngang hanlah a tho ou, tho hoeh ou tie heh khen a haw sei ati awh.

⁵⁰ Jisuh ni tha hoi bout a hram teh hringnae a thouk.

⁵¹ Hattoteh Bawkim thung e yaphni a lû hoi a khok totouh a kâphi. Talai a kâhuët. Lungsongnaw a kâbawng.

⁵² Tangkom pueng a kamawng teh, ka ip tangcoun e tami kathoungnaw moikapap a thaw awh teh,

⁵³ Bawipa a thaw hnukkhu, ahnimanaw teh tangkom thung hoi a tâco awh teh khopui kathoung thungvah a kâen awh, tami moikapap koe a kamnue awh.

⁵⁴ Jisuh ka ring e ransabawi hoi ransahu ni talai a kâhuët e a hmu awh toteh a taki awh dawkvah Cathut e Capa tangngak doeh ati awh.

⁵⁵ Galilee kho e Jisuh khetyawt hanlah a hnukkâbang e napuinaw ni hote hmuen koevah ahlanae koehoi a khet awh.

⁵⁶ Hote napuinaw dawkvah Meri Magdalin, Jem hoi Joseph e a manu Meri hoi Zebedee e capanaw e manu tinaw a bawk awh.

Jisuh pakawpnae

Mrk 15:42-47; Luk 23:50-56

⁵⁷ Tangmin lah a pha toteh Arimathea kho e kabawipounge Joseph, a hnukkâbang van e buet touh a tho teh,

⁵⁸ Pailat bawi koe a kâen teh Jisuh e ro hah a hei. Pailat ni a ro hah poe lah awmseh telah kâ a poe.

⁵⁹ Joseph ni a ro hah a la teh lukkarei ka pangaw e hoi a kayo hnukkhu,

⁶⁰ ama hanelah lungsong dawk thuk e tangkom katha thung vah a ta. Lungphenpui hoi takhang a teng teh a ceitakhai .

⁶¹ Meri Magdalin hoi alouke Meri teh hote tangkom hmalah a tahung roi.

Phuen a ringnae

⁶² Atangtho toteh vaihma bawinaw hoi Farasinaw ni Pailat bawi koe a kamkhueng aw h teh,

⁶³ 'hot e kadumyengkung ni kai teh apâthum hnin kathâw han telah a due hoehnahlan a dei e hah ka panue aw h rah.

⁶⁴ Hatdawkvah a hnukkâbangnaw ni tangmin vah a ro hah a la aw h teh, ahni teh duenae koehoi a thaw toe telah tami pueng koe dei aw h pawiteh ahmaloe e payon e hlak a hnukkhu e payon e hoe kalen han telah ngaihrinae a tawn aw h dawkvah, tangkom hah hnin thum touh thung ring hanlah kâ na poe haw atipouh aw h.

⁶⁵ Pailat ni 'nangmouh koe ka ring e tamihu touh ao. Cet aw h nateh a coung thai totouh a uep thai nahanlah ring aw h atipouh.

⁶⁶ Ahnimouh ni a cei aw h teh talung hah mitnoutnae tacik a kin aw h hnukkhu ka ring e naw a ta aw h teh, tangkom hah kahawicalah a ring aw h.

28

*Duenae koehoi jisuh boutthawnae
Mrk 16:1-8; Luk 24:1-10*

¹ Sabbath aloum hnukkhu, hnin sari touh dawk apasuek hnin amom kho meimei dai nah Magdalin hoi alouke Meri tinaw hai, tangkom khet hanlah a cei awh.

² Hatnavah puenghoi Tâli a no. Cathut e kalvantami ni kalvan hoi a kum teh tangkom khannae talung a paawng teh hote talung van a tahung.

³ A minhmai teh sumpapalik e patetlah a kamnue. A khohna e hai tâmai patetlah a pangaw.

⁴ Karingnaw ni kalvantami hah a taki awh lawi a pâyaw awh teh meimei a due awh.

⁵ Kalvantami niyah taket awh hanh. Thing-palamnae dawk thei e Jisuh doeh na tawng awh, tie ka panue.

⁶ Hete hmuen koe awm hoeh toe. A dei tangcoung e patetlah a thaw toe. Tho awh nateh Bawipa a yannaeh hah kenhaw.

⁷ Karang poung lah ban awh nateh duenae koehoi a thaw toe tie hah a hnukkâbangnaw koe dei pouh awh. Nangmouh hmalah Galilee ram vah a kamnue han. Hawvah nangmouh ni Bawipa hah na hmu awh han ka ti toe telah kalvantami ni napuinaw koe a dei.

⁸ Hote napuinaw ni a taki awh eiteh, a lung-hawi awh dawkvah, tangkom koehoi karanglah a ban awh teh a hnukkâbangnaw koe hote kamthang hah dei pouh hanelah a yawng awh.

⁹ A cei awh lahun nah Jisuh ni sut a dawn teh, na konawm awh atipouh. Hote napuinaw ni rek a hnai awh teh a khok hah a tapam awh laihoi a tabo awh teh a bawk awh.

¹⁰ Jisuh ni takinae tawn awh hanh. Cet awh nateh, hete kamthang lawk hah dei pouh awh. Hote ram dawkvah ahnimouh ni kai hah na hmu awh han atipouh.

Ransanaw a tadawng awh

¹¹ Hote napuinaw ni a cei awh navah ka ring e atangawnnaw ni kothung a kâen awh teh kaawm e hno pueng hah vaihma bawinaw koe a thaisak awh.

¹² Hahoi vaihma bawinaw ni kacuenaw hoi pouknae kapoenaw hoi a kamkhueng awh teh, a kâpan awh. Ka ring e ransanaw hah tangka moikapap a poe awh teh,

¹³ tangmin ka i awh lahun navah a hnukkâbangnaw a tho teh a ro hah a paru awh, telah a dei awh.

¹⁴ Hote kong hah siangpahrang ni bout thai pawiteh kaimouh ni ka dum awh vaiteh nangmouh koe a lungkhuek hoeh nahanlah ka sak awh han, telah atipouh awh.

¹⁵ Hatdawkvah ransanaw ni tangka a la awh teh a dei pouh e patetlah a sak awh. Hettelah hoi hote kamthang teh Judahnaw rahak vah sahnin ditouh a kamthang.

Kalenpounge kâpoelawk

¹⁶ Hlaibun touh e a hnukkâbangnaw ni Galilee ram lah a cei awh. Bawipa ni lawk a thui e mon daw k a luen awh navah Bawipa hah a hmu awh teh a baw k awh.

¹⁷ Atangawnnaw teh a lunghring awh.

¹⁸ Jisuh ni ahnimouh koe rek a hnai teh kalvan hoi talai van e kâtawnnae pueng teh kai koe poe lah ao toe.

¹⁹ Nangmouh ni cet awh nateh miphun pueng hah ka hnuk kâbang lah coung sak awh. Pa, Capa, Kathoung Muitha e min dawk Baptisma poe awh.

²⁰ Kai ni nangmouh koe kâ na poe e pueng hah a tarawi awh nahanlah cangkhai awh. Kai teh talai van a pout totouh nangmouh hoi cungtalah pou ka o telah a hnukkâbangnaw koe atipouh.

Thai Phum Holy Bible
The Holy Bible in the Thaiphum Chin language of
Myanmar

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

PDF generated using Haiola and XeLaTeX on 15 May 2025 from source files dated 15 May 2025

84c7fe95-3b68-5ab6-b17e-a642d33ac078